

Ælinjil wa n Luqa Æsænti

1-3 Ya Tayofil wa ækneḡ saḡmar, aytedan aggotnen a æktabnen isalan n awa ḡur-naḡ igan, s æmmæk iman-net was dana-tan-æssonalan aytedan win tan-æggəyatnen æs šittawen-nasan harwa ḡur ænætti-nasan, æqqalan aytedan æšḡâlnen daḡ amel n awal æn Mæššina. Awen da fæl di-d-iggaz nak da, dæffær as æššiggaray isalan di kul s ælluḡ a d-ibazan ḡur ælæsæl-nasan, a dak-in-aga y-asan akatab innizzaman,

4 fæl ad tækkəsəḡ aššak as tæssunen šin tətəwasasaḡra ættiddanat.

Təhəwt æn ḡaysa æd tæmmædrəyt-net

Ætæmæl æn təhəwt n ænnæbi ḡaxya wa isalməḡan aytedan daḡ aman

5 Elan win daḡ imos Herod æmænokal n akal æn Yahudəyya, ill-ay ælimam iyyan igân esəm Zakarayya ihân taggayt æn limaman win hayawan n Abəya. Tantut-net tahayawt æn Harun, esəm-net Elizabet.

6 Ænta dær-æs æmosan alḡadilan dat Mæššina, æḡân y alwajiban n Æmæli d alamaran-net lækkum daḡ wær ælen lahan waliyyan.

7 Wær ælen barar waliyyan fælas Elizabet a wær nətalu bararan, ægmâdan-tan deḡ elan wællen.

8 Ǝzəl iyyan itaggu Zakarayya dat Məššina əššəxəl wa taggin limaman fəlas taggayt ən limaman ta iha as d-issəxlay igi n awen.

9 Ǝbaznat-tu taşaxeren, əmosnen as, ənta a z'iggəzan edag wa zəddigan day Ahan wa Zəwwəran n Ǝlyibada n Ǝməli, issəqqəd day-as ađutan fəl majmar wa iskatan y awen. Šišaxeren šin imos igi-nasnat alxadat ən limaman.

10 As iga alwaq wa day taqqadan ađutan, tamattay ketnet təbdād day təfərray n Ahan wa Zəwwəran n Ǝlyibada, tətattar.

11 Wala a ihogan inafalal-as-du angalos n Ǝməli ibdād day əxil ən majmar wa n əsəqqəd n ađutan.

12 Inay Zakarayya angalos xas irmaş, təggaz-tu tasa.

13 Mişan inn-as angalos: «Zakarayya! A kay wər təggəz tasa fəlas Məššina iqbâl mansay-nak, tantut-nak Elizabet ad təgrəw barar, amaran ag-as esəm Yaxya.

14 Ad taddawex, təfəliwəsax; təsəddəwət dey təhəwt-net aytedan aggotnen,

15 amaran ad iqqəl awedan zəwwəran dat Ǝməli. Wər mad as z'aşu esmad n alxanab wala dey esmad waliyyan. Ad t-idnəy Infas Wa Zəddigan harwa da iha tadist n anna-net.

16 Ad d-issuxəl Kəl-Israyil aggotnen Ǝməli-nasan Məššina.

17 Ǝnta a du-z-izaran y Ǝməli imos anammazul-net, igrâw Infas Wa Zəddigan əd tarna šilat ən win igrəw ənnəbi Ilyas, fəl a d-awəy alxer gər aytedan əd bararan-nasan, awəy-du inəmməzray s ad ilen tayttay ta əlan aytedan win

əxdalnen. Təməwit tədi as z'isəmmutəg y Əməli tamattay təsimatagat i ləkkum y-as.»

¹⁸ Təzzar inna Zakarayya y angalos: «Məni aɣalamat ta di-za-təssusənat as adi ad agu? Ənta nak aɣmar waşşaran a əmosa, tantut-in deɣ əglân daɣ-as elan wəllen.»

¹⁹ Inn-as Angalos: «Awa nak Jibril, akli ən Məşşina wa dat-əs ibaddadan. Ənta a di-d-izimmazalan sər-ək y a dak-agay isalan hossaynen win di.

²⁰ Amaran dad zamas wər təzzəgzanaɣ isalan win dak-əgeɣ da, as z'andinen daɣ alwaq-nasan, ad ammadad əmi-nak. Wər za tələsaɣ awal iket wər d-osa əzəl wa daɣ z'agu arat wədi.»

²¹ Awen as itaggu tamattay təqqâl i Zakarayya, əqqânan ɣafawan-nasan y awa t-in-isahhagan daɣ adag wa zəddigan.

²² As t-id-igmad, indar-as a dasan-işşiwəl fəlas imi-net a immədadan, a dasan-isidugun. Əssanan as arat iyyan a das-d-inafalalan.

²³ As issənda adan-net win əşşəxəl daɣ Ahan wa Zəwwəran n Əlyibada, iqqal aɣaywan-net.

²⁴ Dəffər awen təga tantut-net Elizabet tadist, təzzar təgdal i man-net ətəwənaɣ har təga səmmosat təlil, təgannu:

²⁵ «Awa igi n Əməli! Ənta daɣ-i issanan, ikkas-i asakor wa di-əggatan aytedan.»

Ətəməl ən təhəwt ən Ƴaysa

²⁶ Təha Elizabet tallit-net ta n sədisat as izammazal Məşşina angalos Jibril s əɣrəm as itawannu Nazaret ihân akal ən Galilaya.

²⁷ Issok-ay təməwat iyyat wər nəzday meddan harwada təgât esəm Maryama. Amaran

Maryama tæsïmarkas d aləs igân esəm Yusəf, imosan arat daɣ əzzurrəyya n əmənokal Dawəd wa n ənnəbi.

²⁸ Os-et-du angalos, inn-as: «Maryama, ma təxlaka! Əməli izizabbat-du fall-am arraxmat-net. Issân daɣ-am.»

²⁹ Iqqan awal wen eɣaf ən Maryama, idgaztat, təzzar ad təsamadran awa imos almaɣna n assalam wen.

³⁰ Inn-as angalos: «A kam-wər-təgəz tasa Maryama, Məşşina izizzabbat-du fall-am arraxmat-net.

³¹ Ad taga tadist, təgrəwa barar, tagaɣ-as esəm Ƴaysa.

³² Ad itəwəsəɣmər, agu esəm Barar ən Məşşina di n Amadkol. Ad t-akfu Əməli Məşşina taɣmar n amaraw-net Dawəd,

³³ izar i hayawan ən Yaqub har faw, amaran təmənukəla-net ad təɣləl.»

³⁴ Təнна Maryama y angalos: «Manəmmək as z'agu adi ənta nak harwada wər əzdaya meddan?»

³⁵ Inn-as angalos: «A fall-am d-azzabbat Infas wa Zəddigan, talsim tanaya ən Məşşina di n Amadkol, təqqəl-am zun telay, awen da fəlas barar wa za tileɣ ad agu esəm Əmizdag agu deɣ esəm Barar ən Məşşina.

³⁶ Ənâm təşəqqaq-nam Elizabet! Əɣlân daɣ-as elan wəllen mişan təga tadist ən barar. Ənta tas itawannu wər tətïlu bararan, tallit-net ta n sədisat a təha əmərədda,

³⁷ fəlas wər t-illa a imosan muxal fəl Məşşina.»

³⁸ Tənn-as Maryama: «Nak taklit n Əməli, itəwəgget-i awa tənneɣ.» Təzzar ifal-tat angalos.

Iki ən Maryama Elizabet

³⁹ Tənkər Maryama dağ adan en da, təhaz təkka təxrəmt iyyat n akal ən Yahudəyya imosan akal n ədyəyan.

⁴⁰ Tos-in ehan ən Zakarayya, təssəslam fəl Elizabet.

⁴¹ Da da ɣas ad təsla Elizabet y assalam ən Maryama ənta ad izabagat barar wa ihan tadist n Elizabet, təzzar idnay-tat Infas wa Zəddigan.

⁴² Tədkal Elizabet əməsli-net, tənna: «Togara šidoden kul agaraw n arraxmat, barar deɣ wa du-z-igmədan tadist-nam igrâw arraxmat.

⁴³ Awak nak ma əmosa as di-du-tətasu anna n Əməli-nin?

⁴⁴ Da da ɣas ad əsleɣ y assalam-nam ənta ad izabagat barar wa ihan tadist-in fəl tədəwit.

⁴⁵ Təbbilaləɣ kam təzzigzanat as, awa dam-inna Əməli ad andu.»

Təmmal ta təga Maryama i Məššina

⁴⁶ Tənna Maryama:

«Əwəl-in immâl adkul n Əməli,

⁴⁷ İman-in isidawat-tan Məššina di n Əməɣlas-in.

⁴⁸ Fəlas asawad a din-iga daɣ təmmədrəyt ən təklit-net.

A ibazan ɣur əmərədda aytedan n azzaman kul ad annin əbbilaləɣ.

⁴⁹ Fəlas Wa ilan Tarna ig-i aratan zawwarnen. Esəm-net i zəddigan.

⁵⁰ İtihənəttit y aytedan n azzaman kul win t-əksudnen.

⁵¹ İga əfus-net imazalan ən təla ən tarna. İziwazawaz aytedan win ədkalnen iman-nasan.

⁵² Ikkas daw muzaran taɣmar-nasan,
idkal šiləqqawen.

⁵³ Isayyawan win əlluznen daɣ awa izodan,
oyya iməggərgas əqquran fassan-nasan.

⁵⁴ Idhal Kəl-İsrayil n eklan-net,

fəlas itihənəttit

⁵⁵ y İbrahim d əzzurrəyya-net har faw,
imos awen arkawal iga i marawan-nana.»

⁵⁶ Təmal Maryama ɣur Elizabet har təga edag
ən karadat təlil amaran təqqal aɣaywan-net.

Təhəwt ən Yaxya wa isalmayan daɣ aman

⁵⁷ Osa-du alwaq n iguz n əmzur fəl Elizabet,
təgraw barar.

⁵⁸ Əslan mahharagan-net əd šəqqayən-net
əhənəttə zəwwəran wa das-iga Məššina da,
əddəwen əntanay da.

⁵⁹ As əzəl wa n əttam osan-du y ad
səmməmkədan barar. Ərân a das-agin esəm
Zakarayya, esəm wa daɣ iga abba-net.

⁶⁰ Mišan tənn-asan anna-net: «Kala kala! Ad
agu esəm Yaxya.»

⁶¹ Ənnan-as: «Esəm ya wədi wər tələɣ
əšəqqay a t-igân!»

⁶² Təzzar ad sidugunan y abba ən barar, y a
dasan-iməl esəm was ira ad t-agu barar-net.

⁶³ Isaddagan-asan Zakarayya a t-id-akfin
əsəllum. İktab fall-as: «Esəm-net Yaxya.»
İsammaklal sər-san awen ketnasan.

⁶⁴ Təzzar okay əmədəd Zakarayya amazay
wen da, immora iləs-net, ad itaggu təmmalən i
Məššina.

⁶⁵ Təggaz tasa aytedan kul win əxsarnen daɣ ihəz-nasan, wazawazan salan n awa igan den daɣ akal ən Yahudəyya ketnet wa n ədɣaɣan.

⁶⁶ Aytedan kul win əslanen awen ətaffan-tu daɣ wallan-nasan, gannin: «Ma z'iqqəl wa da barar?» Illikan as issiwar-tu Əməli əfus-net.

Təmmal ta iga Zakarayya i Məşşina

⁶⁷ Idnay Infas wa Zəddigan Zakarayya wa n abba ən barar, isannafalal-as Məşşina awal-net, ad igannu:

⁶⁸ «Təmmal i Məşşina,
Əməli n Israyil,

fəlas masnat a iga daɣ tamattay-net,
isaddarf-tat.

⁶⁹ Ikkas-ana-du daɣ ahan n əkli-net
Dawəd Amaɣlas ilân tarna,

⁷⁰⁻⁷¹ a dana-z-agəzan daɣ zənga-nana,
ikkəs-ana daɣ fassan ən maksanan-nana kul.

Imos awen arkawal iga daɣ mawan n ənnəbitan-
net

win irəw, isinafran.

⁷² Emmək wədi as issəkna təhanint-net
i marawan-nana,

issənda arkawal ən tassaɣ-net
zəddigan.

⁷³ Arkawal wen ihâd fall-as
y amaraw-nana Ibrahim as,

⁷⁴ a danaɣ-assafsu daɣ zənga-nana,
fəl a tu-nəɣbəd ši wala tasa ən waliyyan.

⁷⁵ Nəzəddig noɣâd iket nəddar.

⁷⁶ Amaran kay barar-in,

a kay iwər esəm ənnəbi ən Məşşina di n Amad-
kol,

kay a du-z-izaran y Æmæli
 fæl a dat-æs takna tarrayt-net,
⁷⁷ tæssusæna tamattay-net
 as efsan ællân ġur tæsuredft æn bakkadan.
⁷⁸ Awen itagg-ay Æmæli-nana Mæššina
 fæl æssæbab æn tæhanint tagget ta tu-tæhat.
 Adi a fæl dana-du-z-asu Ælmæsix
 ola æd gæmmud æn tæfuk,
⁷⁹ fæl ad imælæwlew ænnur-net
 fæl aytedan win æqqimnen daġ šiyay,
 æhân telay æn tæmattant,
 izæzzælulæġ takkolen-nana daġ tarrayt ta n alxer.»
⁸⁰ Ad idaggal Yaxya, tætawad-t-id tayttay-net.
 Izdaġ ikallan æn saffan har æzæl wad issosan Kæl-
 Israyil fæl man-net.

2

Tæhæwt æn Ķaysa

¹ Azzaman win daġ z'ihæw Ķaysa a daġ omar
 Qaysara Ogæstæs wa n ættæbæl n Ærrum s ad
 uddanan aytedan kul win taġmar-net.

² Tuddant ten ænta a tazzarat. As tæġa Kir-
 inøyas a imosan æmuzar n akal wa n Suræya.

³ Aytedan kul gallin ad uddanan. Ækkulluk n
 awedan ikka aġræm æn marawan-net.

⁴ Adi fæl igmad Yusæf ænta da aġræm wa n
 Nazaret ihân akal æn Galilaya, igæzzay s aġræm
 n aljad-net æmænokal Dawæd a t-imosan aġræm
 æn Betalxam, ihân akal æn Yahudøyya,

⁵ fæl a daġ-as uddan. Iddew æd Maryama dær
 isimarkas. As itaggu awen da tæġa tadist.

⁶ Æhân Betalxam as fall-as iga alwaq n iguz n
 æmzur.

⁷ Təggaz Maryama amzur n aɣafadday-net. Itaggu awen dəgma n əsəgən n aharay osaxan d ahan wa ɣur əzzəbben fəlas edag a wər əgrewan daɣ ahan en. Təttal barar daɣ əfər, təssəns-ay daɣ əɣlal ilān den.

Enəfilal wa d-iga angalos i madanan

⁸ Akal en əhān-tu madanan əssimbarnen eharay-nasan.

⁹ Den da a d-inafalal dat-san angalos n Əməli, təsammalawlaw tanaya n Əməli edag wa əhan, əgan tərəmməq zəwwərat.

¹⁰ Inn-asan angalos: «Ad wər tərmeɣam, isalan olaɣnen a dawan-d-ewaya a du-z-awəynen tədəwit tagget əs tamattay ketnet.

¹¹ Azalada Əməɣlas-nawan ihəw daɣ əɣrəm n Dawəd. Ənta a imosan Əlməsix Əməli.

¹² Ənta da awas tu-za-təzdəyam: "Ad tənəyam ajanɣay ittalan daɣ əfər, isrād daɣ əɣlal."»

¹³ Wala a ihogan inafalal-du agan zəwwəran n angalosan ɣur wen, əmmālan Məššina gannin:

¹⁴ «Təmmal i Məššina daɣ jənnawan, alxer daɣ əddənət y aytedan win əhanen agna-net.»

¹⁵ Eqqalan angalosan ijənnawan ɣas, naman-nan madanan: «Əndawat Betalxam, ad nənəy awa danax-imal Əməli da.»

¹⁶ Təzzar əglañ əhāzan. Osan-in Maryama əd Yusəf d ajanɣay, isrād daɣ əɣlal.

¹⁷ As ənayan madanan barar, əssoɣalan awa dasan-itawannan sər-əs.

¹⁸ Aytedan kul win əslanen y awa ənnan madanan isimaklal sər-san awen.

19 Maryama ənta, tət̄t̄af isalan en kul daɣ man-net, tənazzar daɣ-san.

20 Təzzar əqqalan madanan əmmâlan adkul ən Məşşina, taggin-as təmmalen fəl aşşaddat n arat kul was əslan əd wa ənayan, əs ketnet iga s əmmək wa daɣ as dasan-ittəmal.

21 As əzəl wa n əttam, itawasamankad barar, itawagg-as esəm Ƴaysa, imos as esəm wa da a imal angalos y anna-net dat igi-net tadist.

Əməwəy ən Ƴaysa s Ahan wa Zəwwəran n Əlxibada

22 As d-ewad alwaq ən zazdag wa imal Əttawret n ənnəbi Musa, iddew Yusəf əd Maryama s əɣrəm ən Yerusalam fəl ad əzzəzdəgan iman-nasan. Ewâyan deɣ barar y ad tagin da təxlift ən Məşşina,

23 s əmmək as iktâb daɣ əşşəriɣa n Əməli as «*Barar kul wa n aɣafadday, ad iskət y Əməli.*»

24 Yusəf əd Maryama issiwar-tan əşşəriɣa n Əməli daɣ tarrayt n əzəzdəg-nasan ad akfin təzəgzəmt ən sanatat tədəbren šin əsuf madeɣ sanatat šin əɣrəm.

25 Aɣrəm ən Yerusalam ixsâr daɣ-as aləs igân esəm Simɣon n alɣadil n əmiksad ən Məşşina. Igâ attama n Ənəssesməd a du-z-asin assafsu Israyil. Simɣon en izzîbbad-du fall-as Infas wa Zəddigan,

26 s ənta a das-isannafalan as wər tu-z-iba wər inay Əlməsix n Əməli.

27 Eway-t-id Infas ən Məşşina s Ahan wa Zəwwəran n Əlxibada. Imazayyat-du əd marwan

ən Ƴaysa tamazalan s alxadat ta tan-issəwar əşşərixa daɣ batu ən barar-nasan.

²⁸ Idkal Simxon barar, iga təmmal i Məššina, inna:

²⁹ «Əmərədda Əməli ad tayyaɣ akli-nak

ad t-iba daɣ alxer,

id awa di-tənnəy inda,

³⁰ fəlas ənaya əs šittawen šin-da-nin

Əmaɣlas wa dana-du-təssoka,

³¹ wa du-təsammataɣay i təmattiwen kul,

³² imos ənnur

as z'ikkəsan daɣ šiyyay

aytedan win wər nəmos Kəl-Əlyəhud,

awəy-du deɣ adkul əs tamattay-nak Kəl-İsrayil.»

³³ Abba-net d anna-net əqqānan ɣafawan-nasan y aratan win sər-əs tawanninen da.

³⁴ Təzzar ittar-asan Simxon a dasan-igan al-baraka, amaran inna i Maryama anna ən Ƴaysa: «Əssən as barar a isinafran-tu Məššina fəl ad d-awəy agadal əd tanakra ən Kəl-İsrayil aggotnen, iqqəl əssəbab n ənəməzray gər aytedan.

³⁵ Emmək wədi as z'isəffəggu awa ihan iwallan n aytedan aggotnen. Kam iman-nam a kam-izzuzər əwəl zun tu-tərzâg takoba.»

³⁶ Təll-ay deɣ tənnəbit iyyat təkñât tuşaray təgât esəm Xənnətu wələt Fanwal ən tawşet ta n Aşşir, ədâsan əssa elan n azalaf daɣ təmmədrəyt-net.

³⁷ A aba aləs-net wər təles azalaf, har təga əttamat təmərwen n awatay d əkköz. Faw təha Ehan wa Zəwwəran n Əlyibada. Təɣbâd Məššina ehad ezal, tətuzam, tətattar.

38 Tamazayt tenda a daq-qan du-tosa, təga igodan i Məššina. Ad tətəggu isalan ən Ƴaysa y aytedan kul win əganen attama n ad d-izəzzəbbət Məššina tədarfit-net fəl Yerusalam.

39 As əssəndan marwan ən Ƴaysa igi n arat kul wa tan-issəwar əššərixa n Ƴməli, əqqalan aɣrəm-nasan Nazaret ihan akal ən Galilaya.

40 Idəggal barar, itilu tayttay d əgərri, izazabbat-du fall-as Məššina arraxmat-net.

Assa ən Ƴaysa Ehan wa Zəwwəran n Ƴlyibada imos aw maraw elan d əššin

41-42 Awatay kul əggizzayan marwan ən Ƴaysa s aɣrəm ən Yerusalam y əmud was itawannu wa n Akkay, imos awen alɣadat n əmud wen. As iqqal Ƴaysa aw maraw elan d əššin əddewan dər-əs s əmud wen.

43 As əɣradan adan win amud, əqqalan aɣaywan, Ƴaysa amaran iqqim-in daɣ Yerusalam wər əssenən daɣ awen.

44 A əɣilan iha aljamaɣat ən məššukal win dər əddewan. As əgan əšikəl n əzəl, a das-səggadan daɣ šəqqaxan-nasan əd təməzdəyt-nasan.

45 Mišan wər t-əgrewan, təzzar əqqalan Yerusalam, səggadan-as.

46 As əzəl-nasan wa n karad gar-essən dər-əs, osan-t-id daɣ Ahan wa Zəwwəran n Ƴlyibada inixama əd musanan n Ƴttəwret, issisam-asan, isastan-tan deɣ.

47 Aytedan kul win əslanen y awa igannu, təsimaklal sər-san tayttay-net d aljawaban-net.

48 As t-ənayan marwan-net əhagan, tənn-as anna-net: «Barar-in ma imos awa dana-təge da?

Nak d abba-nak təššiwaš-ana taɣara-nak, nosa edag kul nəsaggad-ak.»

⁴⁹ Inn-asan: «Ma fel za as di-təsaggadam? Masnat a wər təgem as təlzâm-i təɣimit daɣ ahan n Abba-nin?»

⁵⁰ Mišan wər əgren awa dasan-inna den.

⁵¹ Iddew Ƴaysa əd marwan-net, zagadayan əqqalan aɣrəm ən Nazaret, ibbirdag-asan. Annanet tətât aratan en kul daɣ man-net.

⁵² Idaggal Ƴaysa, tətittəy təla-net əgərri, ikannu gərrezat i Məššina d aytedan.

Ƴaysa əd Yaxya wa isalmayan daɣ aman

3

Təlɣutbat ən Yaxya

Təsəntit n əššəɣəl ən Yaxya

¹ Awatay wa n maraw əd səmmos ən Qaysara Tabirəyas da taɣmar, Fons Bilatəs a imosan əmuzar n akal wa n Yahudəyya, amaran Herod ixkâm fəl akal wa n Galilaya, amaqqar-net Filibus ixkâm fəl wa n Iturayya əd wa n Tərakonit, Lisanəya ənta ixkâm fəl akal wa n Abila.

^{2a} Xânan əd Kayif əntanay əmosan ilimaman win zawwarnen.

^{2b} Awatay wen da a d-izzəbbat awal ən Məššina fəl Yaxya ag Zakarayya daɣ əsuf.

³ Dəffər awen illil Yaxya ikallan kul win ahanen attayan n agarew wa n Yordan, itaggu y aytedan təlɣutbat, igann-asan ad təwəsəlməɣan

dağ aman imos awen arat issiknan tətubt-nasan, fəl ad əgrəwan təsureft ən bakkadan-nasan.

⁴ Emmək əddi was tənda batu ta iktab Ənnəbi Isayas, as inna: «*Aləs iyyan idkâl əməsli-net dağ əsuf igannu: "Səmmutəgat abaraqqa y Əməli! Təsəssiğədam tarrayen dat-əs!*

⁵ *Id t-illa ənahoy ketnet ad inbəl. Idyağan əd gefan ad ərəsan, tarrayen šin əfraynen ad ayədnat, ibaraqqaqan win wər nogda ad agdin*

⁶ *Inəy awedan ketnet əlyillas wa d-izazzabbat Məşşina."*»

Təlxutbat ən Yaxya

⁷ Adi a fəl igannu Yaxya i təmattiwen šin t-idu-tasinen y a tanat-issəlməğ dağ aman: «*Xa taşşolen šin! Ma kawan-issosanan ədərrəğ y attadib ən Məşşina wa d-izayan.*

⁸ Dağ adi taggiwat imazalan olaynen təsəttəddim sər-san tətubt-nawan! Wər igda ad təgannim dağ man-nawan: "Nakkanay əzzurrəyya n ənnəbi İbrahim a nəmos", fəlas silakanax-awan as Məşşina ifrâğ ad isəmməttəy šihun šin təhannayam da, ixlək-du dağ-asnat əzzurrəyya y İbrahim!

⁹ Agat ənnəyat! Tazəft harwa əmərədda da təmmotag y a du-təsəddəngər y eşkan. Dağ adi aşək kul wa wər nətirəw aratan olaynen ad itəwəxtəs, itəwəgər-in dağ təmsay.»

Emmək was za nagu alxal wa imal Yaxya

¹⁰ A tu-sastanan aytedan, gannin-as: «*Dağ adi mas danağ-iwar a tu-nagu?*»

¹¹ Inn-asan: «Awedan wa ilan əşšin səlsa, akfet iyyan i wa tu-wər-nəla; wa ilan a itsa, akfet dağ-as wa tu-wər-nəla.»

¹² Inabazan n amana əntanay da, tasin-du Yaxya fəl a tan-issəlməx dağ aman, ənnan-as: «Əşşex, mas danağ-iwar a tu-nagu?»

¹³ Inn-asan: «Ad wər təzzərzəmam a ogaran awa dawan-itawannan.»

¹⁴ Əssəstanan-tu dəx sojitan, ənnan-as: «Nakkanay za, mas danağ-iwar a tu-nagu?» Inn-asan: «Ad wər tərəkəbam dağ awedan waliyyan azrəf-net, wala dəx təssəwəram-tu bahu. Agdat s alxaq-nawan.»

Assa n Əlməsix

¹⁵ Aytedan kul win əslanen y awa igannu Yaxya, əgân attama; akk awedan isamadranan dağ əwəl-net kud Yaxya en da a imosan Əlməsix wala.

¹⁶ Awen da fəl dasan-inna Yaxya ketnasan: «Nak, aman a daq qawan-salmağa, mişan izaydu aləs s awa di-iga dağ şigrat, wər eweda wala arra ən suğan ən yəteman-net. Ənta Infas Wa Zəddigan əd təmsay a daq qawan-z-issəlməx.

¹⁷ İha əlmital n awedan ittâfan tesayt y ad izzəzər alkama-net. İşadaw alkama dağ tadangawt-net, şixal amaran ag-enat dağ təmsay təbilaglagat faw.»

Iguz ən Yaxya kasaw

¹⁸ İgla Yaxya dağ amel n Əlinjil, itaggu y aytedan ənnəsixatan wiyyad aggotnen.

¹⁹ Herod amaran wa n əmənokal n akal ən Galilaya əruşmatan a das-iga dağ batu ən

Herodəyas təmosat tağur amadray ən Herod en da igân esəm Filibus, ig-âs değ wiyyad əruxmatan fəl arak mazalan labasnen kul win hadatnen iga.

²⁰ İşşota Herod fəl arak mazalan win den kul igi ən Yaxya dağ kasaw.

İtəwəsəlməğ ən Ƴaysa day aman

²¹ As tawasalmağ aytedan kul dağ aman, itawasalmağ dağ-san Ƴaysa ənta da. Itattar alwaq wen da as ənnolaman jənnawan,

²² izzəbbat-du fall-as Infas wa Zəddigan iha şaşşelan ən tədabert, igmad-du əməsli ijənnawan, inna:

«Kay a imosan Barar-in əkneğ tara, təssinda-du agna-nin.»

Aljad ən Ƴaysa Elməsix

²³ İla Ƴaysa edag ən karadat təmərwən n awatay as issənta əşşəğəl-net.

İttâfan aytedan as ag Yusəf wa n ag Heli.

²⁴ Heli ənta ag Mâtat, Mâtat ag Lebi,

Lebi ag Malki, Malki ag Yannay, Yannay ag Yusəf,

²⁵ Yusəf ag Matasiyas, Matasiyas ag Amos,

Amos ag Nahum, Nahum ag Xasli, Xasli ag Naggay.

²⁶ Naggay ag Matti, Matti ag Matasiyas,

Matasiyas ag Samxi, Samxi ag Yosax, Yosax ag Yoda,

²⁷ Yoda ag Yohanan, Yohanan ag Ƴaysa,

Ƴaysa ag Zərubabil, Zərubabil ag Assalat, Assalat ag Nayri,

²⁸ Nayri ag Malxi, Malxi ag Addi, Addi ag Kosam, Kosam ag Almadama, Almadama ag Er,

- 29 Er ag ʃaysa, ʃaysa ag Alyazar, Alyazar ag Yorim,
 Yorim ag Mâtat, Mâtat ag Lebi,
 30 Lebi ag Simxon, Simxon ag Yahuda,
 Yahuda ag Yusəf, Yusəf ag Yunam, Yunam ag Ilyakim,
 31 Ilyakim ag Malaya, Malaya ag Mayna,
 Mayna ag Mâtat, Mâtat ag Natan, Natan ag Dawəd,
 32 Dawəd ag Yasay, Yasay ag ʃubayd,
 ʃubayd ag Boxaz, Boxaz ag Sala, Sala ag Nasun,
 33 Nasun ag ʃaminadab, ʃaminadab ag Admin,
 Admin ag Arni, Arni ag Xasrun, Xasrun ag Farəs,
 Farəs ag Yahuda,
 34 Yahuda ag Yaqub, Yaqub ag Isəhaq,
 Isəhaq ag Ibrahim, Ibrahim ag Terax, Terax ag Naxur,
 35 Naxur ag Sarux, Sarux ag Raggaw,
 Raggaw ag Falax, Falax ag ʃabbir, ʃabbir ag Salax,
 36 Salax ag Kaynam, Kaynam ag Arfakšad,
 Arfakšad ag Sam, Sam ag Nux, Nux ag Lamax,
 37 Lamax ag Matusala, Matusala ag Henox,
 Henox ag Yarit, Yarit ag Malelyal, Malelyal ag Kaynam,
 38 Kaynam ag Enus, Enus ag Set, Set ag Adəm,
 Adəm ənta Məššina t-id-ixlakan.

4

Etəwəjərrab ən ʃaysa

1 Igməd ʃaysa tamawen n agarew wa n ʃordan idkâr-tu Infas wa Zəddigan. Infas wa da a t-issokan teneray.

² Iga day-as ækkozat tæmærwæn n æzæl itajarrab-tu Iblis. Adan win kul ig-en wær itša wala, as ægradan ih-ay laz.

³ Inn-as Iblis: «Kud kay Barar ən Məššina, tamæra tæhunt ta s ad tæqqæl amensay.»

⁴ Inn-as Үaysa: «Wærgex ænnan Ælkəttaban: "Awedan wær itæddær æs mensewan Үas."»

⁵ Ikka dær-æs Iblis edag iknan æhuki, issæswad-tu day taҫmaren kul n æddænet day ellaf ən šat.

⁶ Amaran inn-as: «A kay-akfa taҫmaren en kul æd tæhussay-nasnat fəlas tiwakfanat-i hakkaq-qanat deҫ i was tanat-æreҫ.

⁷ Day adi as di-tæssəjada ad tægrəwəҫ awen kul.»

⁸ Inn-as Үaysa: «Wærgex ænnan Ælkəttaban: "Æmæli-nak Məššina as za tæssəjada, ænta Үas a za tæҫbæda."»

⁹ Tæzzar ikka dær-æs Iblis Yerusalām, issæbdad-tu fæl afalla n Ahan wa Zəwwəran n Ælҫibada, inn-as: «Kud kay Barar ən Məššina tətærægge,

¹⁰ fəlas ænnan Ælkəttaban: "Ad amær angalosan-net a kay aҫəzan day æššur,"

¹¹ iktâb deҫ as: "A kay-ækbəlan day fassan-nasan fæl a dak-wær-tænkæf tæhunt."»

¹² Inn-as Үaysa: «Wærgex za Ælkəttaban di ænnân: "Ad wær tətajjarraba Æmæli-nak Məššina."»

¹³ As t-iҫrad Iblis æjærræb, igla oyy-ay har sær-æs ilæs agaraw ən tarrayt.

Æššəҫæl ən Үaysa day Galilaya

Isalan ən Taҫmar ta n Məššina

Æsæssəҫri ən Үaysa day Nazaret

14 Dæffer awen, iqqal Ƴaysa akal ən Galilaya, tæh-ay tarna n Infas wa Zæddigan. Tæffæzzat sallat-net daɣ akal en ketnet.

15 Isasayru aytedan daɣ nan win ælɣibada ən Kæl-Ælyæhud, ketnasan æssiymaran-tu.

16 Osa deɣ Ƴaysa Nazaret, aɣrəm wa daɣ idwal. As æzæl wa n tæsanfawt iggaz ehan wa n ælɣibada ən Kæl-Ælyæhud imos awen arat itaggu faw. Ibdad y ad aɣru awal ən Mæššina.

17 Itawakf-ay-in ælkættab wa n ænnæbi Isayas. Ikkas y ælkættab adða wa iga, olam fæl adag a daɣ iktab as:

18 *«Iwâr-i Infas n Æmæli, fælas isinafran-i y ad æmælay isalan n Ælinjil i tælæqqawen. Izimazal-i-du y ad agaɣ isalan i win tawattafnen, ægræwan iman-nasan, æzzuzæyay imæddæryal, aytedan win tawadgaznen deɣ aga-qan daɣ tara ən man-nasan,*

19 *æmælay awatay taha arraxmat n Æmæli.»*

20 As iɣrad Ƴaysa teɣaray ihar ælkættab, issoɣal-tu y amaššaxal n ahan wa n ælɣibada ən Kæl-Ælyæhud, iqqim. Egaran daɣ-as aytedan kul win ællanen den šittawen.

21 Amaran inn-asan: «Azalada awal ən Mæššina was tæslam da, inda.»

22 Ketnasan æmmâlan-tu. Simaklalnæ sær-san batuten olaynen šin du-gammadnen imi-net, ad gannin: «Ak awa wærgæɣ ag Yusæf?»

23 Inn-asan Ƴaysa: «Illikan as a di-du-tassaktim iggi wa innan: "Anasmagal, zuzæy iman-nak," tæzzar tannim-i: "Agu daɣ akal-nak da da awas næsla as tægêq-qu daɣ æɣrəm ən Kafarnahum."»

²⁴ Inn-asan deɣ: «Ǽggəyyaɣ silakanax-awan as wər t-illa ənnəbi itiwəqbalan daɣ aɣrəm wa daɣ idwal.

²⁵ Amaran a dawan-əməla tidət: Daɣ elan n ənnəbi Ilyas akal n Israyil əhânat-tu tədoden aggotnen əs wər ədderan meddan-nasnat. Elan en da a daɣ iga akonak karad elan d aganna wər iwet, iga laz labasan daɣ akal ketnet.

²⁶ Dər iga awen da ya, wər izammazal Məššina ənnəbi Ilyas əs waliyyat daɣ tədoden en. Kalar izammazal-tu s iyyat təxsârat daɣ təxrəmt ta n Sarəfta təhât akal ən Sidon.

²⁷ Əhân deɣ kətrutan aggotnen akal n Israyil daɣ elan n ənnəbi Elisayas, mišan wər tan-iha i itawazozayan ar Naɣman wa n akal ən Surəya.»

²⁸ As əslan aytedan win əhanen ehan n əlɣibada y awen, iggaz-tan alham labasan.

²⁹ Əbdadan, əgan ifassan da Ƴaysa, əkkasan-tu daɣ əɣrəm, ewayan-tu s afalla n ədɣaɣ wa fəl ikras əɣrəm y ad t-əgəran daɣ əɣəɣi, iba-tu.

³⁰ Mišan illam Ƴaysa gar-essan igla.

Ǽššəɣəl ən Ƴaysa daɣ Kafarnahum

³¹ Dəffər awen iras Ƴaysa əs təxrəmt təgât Kafarnahum təhât ənta da akal wa n Galilaya, ad isasaɣru aytedan daɣ ahan n əlɣibada ən Kəl-Əlyəhud daɣ jilan win təsənfawt.

³² Isimaklal sər-san əmmək was isasaɣru, fəlas əsəssəɣri-net in awedan ilân tanaya.

³³ Ehan n əlɣibada wen, ih-ay aləs iha aggəsuf. Idkal aləs wen əməsli-net, ad igannu:

³⁴ «Xa! Ƴaysa wa n Nazaret, ma daɣ-na tareɣ? Ǽngəm assa a du-təgeɣ y a dana-təhləka?

Ëssanay awa təmosa: Ëmizdag wa d-izammazal Məşşina.»

³⁵ Iharaşşat-tu Ƴaysa, inn-as: «Fastu, təgməday aləs di!» Təzzar iggədlə aggəsuf aləs en gər aytedan, amaran igmad-tu wər das-ixşed arət.

³⁶ Ëhagan aytedan ketnasan, ad tinəmännin gar-essan: «Ma imos almayna n awal n aləs wa? Kələsuf da ittâf day-san tanat, itamar-tan əs tanaya, gammadan aytedan.»

³⁷ Təwazawaz sallat ən Ƴaysa day id t-illa adag day akal en kul.

³⁸ As igmad Ƴaysa ehan n əlxibada ən Kəl-Ëlyəhud, ikka ehan ən Simyon. As itaggu awen tədaggalt ən Simyon təfrâyat, tənnid wəllen, təzzar əgməyan day-as aytedan a tat-izzuzəy.

³⁹ Inaz-in fall-as Ƴaysa, isannarxam i tanaday, təzzar təwat fall-as. Tənkər day təmazayt ten da a tan-təsıməgurit.

⁴⁰ As tuda təfuk, ewayan-du sər-əs aytedan imiranan-nasan əgânen şiwərnawen əmosnen əzzənəfan. Akk iyyan issəwar-tu ifassan-net, izzozay-tu.

⁴¹ Gammadan dəy kələsuf aytedan aggotnen, saxaren kələsuf en, gannin: «Kay Barar ən Məşşina», mişan isannarxam-asan, igdal-asan awal, id masnat a əgan as ənta a imosan Ëlməsix.

⁴² As affaw, igmad Ƴaysa ayrəm, ikka edag issufan. A das-təsaggad tamattay har t-in-tosa. Ad gamməyan təməwit tas das-z-əgdəlan a tan-ifəl.

⁴³ Mišan inn-asan: «Iwâr-i ad əməla Əlinjil, imosan isalan ən Taḡmar ta n Məššina, i ɣərman win hadatnen əntanay da, fəlas adi da a fəl d-əmmoza.»

⁴⁴ Təzzar igla Ƴaysa, itaggu təlɣutbat daɣ nan n əlɣibada ən Kəl-Əlyəhud win n akal ən Yahudəyya.

5

Inəttulab ən Ƴaysa win azzarnen

¹ Əzəl iyyan ibdâd Ƴaysa daɣ təšəšwit n agaraw wa n Ganazaret, tətanabdaɣ fall-as tamattay fəl ad aslin y awal ən Məššina wa immal.

² Inay Ƴaysa əššin əɣlalan n aman daɣ təšəšwit n agaraw. Iɣlalan win əgmâdan-tan məssawsan, takkasan təjjərgənt daɣ sangaytan-nasan win as tabazan kifitan.

³ Təzzar iggaz daɣ-san wa n Simɣon, igmay daɣ-as a din-izzənkəz fəl təšəšwit, amaran iqqim ad isasaɣru tamattay.

⁴ As iraz daɣ əsəssəɣri inna i Simɣon: «Akku kay əd midawan-nak dad zagrotan aman, təgəram sangaytan-nawan, tabəzam kifitan.»

⁵ Inn-as Simɣon: «Əššex, ahad iyrâdan a nəga nəşɣâl eges wər nəbez wala, mišan ya zama adi a tənneɣ, adi za ad əgəra sangaytan daɣ aman.»

⁶ Əgan awa dasan-inna Ƴaysa, təzzar əbazan kifitan s awa əgan daɣ igət har əbukan sangaytan-nasan y azarru.

⁷ Ad tallafan i midawan-nasan win əhanen aylal n aman wa hadan y a d-aglin a dasan-ilalan. Osan-du, ədnayan əşšin əxlalan win den har əbukən y ədəkəyyi.

⁸ As inay Simyon Butros awen, issəjad i Ƴaysa, inn-as: «Ya Əməli, nəməggəg dər-i fəlas anas-bakkad a əmosa.»

⁹ Innâ awen fəlas ənta əd midawan-net ket-nasan as əhagan Ƴur anay-nasan igət ən kifitan win əbazan.

¹⁰ Eheg wa iga Simyon den, ənta a iga Yaqub əd Yaxya win maddanəs ən Zabaday dər idrâw əşşəxəl. Təzzar inna Ƴaysa i Simyon: «Ad wər tərəcə, a obazan Ƴur əmərədda, təqqalam meddan a sər-i du-za-tawaynen aytedan y a tan-assafsa dəy bakkadan-nasan.»

¹¹ Amaran əssoxalan ixlalan-nasan təgadamayt n agaraw, oyyan arat kul əlkaman-as.

Təmazaq əd Farisaytan

Əzuzəy ən Ƴaysa aləs igrâw kətru

¹² Iha Ƴaysa aƳrəm iyyan, as t-inay aləs as təlsa təwərna ən kətru elam-net ketnet. Ikk-ay-du issəjad dat-əs, onsay-tu, inn-as: «Əməli, as tarex adi, təfrâgəx a di-təzzuzəyax, izdaga.»

¹³ Izzal-in Ƴaysa əfus-net, idas-tu, inn-as: «Areş adi, əzzəy tizdaga!» Amazay wen dəy ad izzay dəy kətru.

¹⁴ Təzzar issənkad-tu Ƴaysa, inn-as: «Ənəy za, ad wər təməla y awedan waliyyan awa igan da, amaran aglu tassaknəx iman-nak y əlimam, taga takutay ən tazdak ta kay-issəwar əşşərixa n

ənnəbi Musa, ad iqqəl adi y aytedan təgəyya ən təməzzəyt-nak.»

¹⁵ Dər iga awen da ya, təgla sallat ən Ƴaysa tətittəy, tətiddaw fall-as tamattay tagget fəl a das-təssəsəm, izzuzəy dəx šiwərnawen-nasan.

¹⁶ Mišan ənta, itakku idaggan əssufnen y a daɣ-san iɣbəd Məššina.

Tarna ən Ƴaysa

¹⁷ Əzəl iyyan isasaɣru Ƴaysa, əqqiman Farisaytan əd musanan n Əttawret a d-əgmâdnen šiɣarmaten kul šin n akal ən Galilaya əd wa n Yahudəyya əd Yerusalam. As itaggu awen Ƴaysa igrâw ɣur Əməli tarna n əzuzəy n aytedan.

¹⁸ Har d-osan meddan wiyyad misawaynen aləs n anabdon daɣ təssut. Ad gammayan a dər-əs əggəzan, assansin-tu dat Ƴaysa.

¹⁹ As dasan-aba təməwit as dər-əs əggəzan fəl igət n aytedan, əwaran afalla ən taɣazamt, olaman əsəfəl-net, əssərasan-tu daɣ-as iha təssut-net har təssənsan daɣ ammas ən tamattay, dat Ƴaysa.

²⁰ As inay Ƴaysa əzəgzan-nasan, inna y anabdon wen: «İbakkadan-nak tiwasarafan-ak.»

²¹ Əslan musanan n Əttawret əd Farisaytan y awen ɣas, ad gannin daɣ man-nasan: «Ma imos aləs wa itaggin amadraw da? Ma ifragan əsurəf ən bakkadan ar Məššina ɣas?»

²² Issan Ƴaysa awa samadranan, inn-asan: «Mafəl tətihənzəmmem adi daɣ wallan-nawan?»

²³ Ma ogaran tərɣəsəy gər i innan: "Tiwasarafan-ak bakkadan-nak" meɣ ak i innan: "Əbdəd jəwənkət?"

²⁴ Amaran arex a tæssenam as nak Ag Aggadëm ələx dəx əddənet tanaya a di-təşişawadat ad əssurəfa y awedan ibakkadan-net.» Təzzar inna Ƴaysa y anabdön: «Əbdəd, tədkəla təssut-nak, takkaç ayaywan-nak.»

²⁵ İbdad aləs wen tamazayt ten da dat aytedan kul, idkal təssut-net, iqqal ehan-net, immâl Məşşina.

²⁶ Aytedan kul isimaklal sər-san awen wəllen. Əmmâlan Məşşina, təh-en tasa gannin: «Azal-ada nənây aratan as wər kala ətawanayan!»

Awa inna Ƴaysa əs nasbakkadan

²⁷ İgmad Ƴaysa edag en, ogga aləs iyyan igân esəm Lebi iqqim dəx adag wa n əzərzəm n əzrəf ən takəs, inn-as: «Əlkəm-i.»

²⁸ İbdad Lebi, oyya awa iha kul, ilkam i Ƴaysa.

²⁹ Dəffər awen iga Lebi i Ƴaysa iməgura zawwarnen dəx ahan-net. Ədrawan d aytedan aggotnen ən nəzzərzam ən takəsen d aytedan wiyad.

³⁰ Ənayan Farisaytan əd musanan-nasan win Əttawret awen ças gatantanan, ad gannin i nəttulab ən Ƴaysa: «Mafel tədrâwam əd nəzzərzam ən takəsen əd nasbakkadan?»

³¹ Inn-asan Ƴaysa: «Aytedan wər nəfray, wər əddəraran s anasmagal, imiranan a sər-əs əddərarnen.

³² Nak wər d-oseç fəl əddəlil n aytedan win çur iga as oçadân, kalar əmazal ad-əgeç fəl a d-açraç inasbakkadan əs tətubt.»

Awa inna Ƴaysa s əzum

³³ Dæffər awen ənnan-as Farisaytan əd musanan n Əttawret: «Inəttulab ən Yaxya əd win Farisaytan tuzaman faw, tattaran, win-nak amaran tattin sassin.»

³⁴ Inn-asan Yaysa: «Awak təfrâgam ad təzzuzəmam ilagatan a çur illa əmazlay?

³⁵ Mišan əlkâman adan a çur-san z'ammadkal əmazlay. Adan win di, ad uzaman.»

³⁶ Ig-asan Yaysa tangalt iyyat, inn-asan: «Wər t-illa i du-z-ikkəsan şikəst dəç tabdoq taynayət y a tat-iwət dəç iyyat waşşarat, fəlas as iga adi, ad iğşəd tabdoq ta taynayət, şikəst dəç ta dəç-as d-ikkas wər tənnəha əd tabdoq ta waşşarat.

³⁷ Wər t-illa dəç i z'agin esmad n alçanab aynayan dəç gədəd. I igan adi ad abbaqqen gədəd win, təzzar affatu dəç esmad əd gədəd.

³⁸ Kalar esmad n alçanab aynayan, ibəyəç aynaynen a dəç itawaggu.

³⁹ Awedan işwân esmad n alçanab waşşaran, wər z'iru dæffər adi tessay ən wa aynayan, fəlas ad annu: "Wa waşşaran a izodan."»

6

Yaysa d əzəl wa n təsanfawt

¹ Əzəl iyyan imosan əzəl wa n təsanfawt ən Kəl-Əlyəhud, ijiwankat Yaysa dəç təwəgas n alkama, rassaban-du nəttulab-net şığaxanen, tifəffərən-tanat gər fassan-nasan, tattin-tanat.

² Təzzar ənnan-asan arat dəç Farisaytan: «Mafəl tətəggim arat xarâman dəç əzəl wa n təsanfawt?»

³ Ijjəwwab-asan Ƴaysa, inn-asan: «Ak teƣaray a wəɾ təgəm awa iga ənnəbi Dawəd əzəl wa t-iggaz gələk ənta əd midawan-net?»

⁴ Awak wəɾgəƣ iguz a iga ehan ən Məššina, idkal šigəlwen šin əmosnen takutay təkātət i Məššina əs limaman ƣas as təxalal tattay-nasnat, itša daƣ-asnat, ikfa daƣ-asnat deƣ aytedan-net?»

⁵ Inn-asan Ƴaysa deƣ: «Nak Ag Aggadəm a ixkaman fəl əzəl wa n təsanfawt.»

⁶ Əzəl iyyan ən təsanfawt ən Kəl-Əlyəhud, iggaz Ƴaysa ehan n əlƣibada ən Kəl-Əlyəhud ad isasaƣru. Ehan-en ih-ay aləs as immût əfus-net wa n əƣil.

⁷ Əgaran daƣ-as musanan n Əttawret əd Farisaytan šittawen fəl ad əssənan kud ad iz-zuzəy awedan daƣ əzəl wa n təsanfawt wala, fəl tara n ad əgrəwan əddəlil əs təxtəst-net.

⁸ Ƴaysa ənta issân awa ihan iman-nasan. Inna y aləs was immût əfus-net: «Ənkər, əbdəd daƣ ammas n əljəməƣat.» Inkar aləs, ibdad.

⁹ Təzzar inn-asan Ƴaysa: «Əssistanaq-ƣawan, awak xalal daƣ əzəl wa n təsanfawt igi n arat olâƣan meƣ igi n a labasan, ereg n awedan daƣ təmattant meƣ awak šiyit-net iba-tu?»

¹⁰ Issəlal-tan Ƴaysa asawad-net ketnasan, amaran inna y aləs was immût əfus-net: «Əzzəl əfus-nak» Iga awa das-inna, izzay əfus-net.

¹¹ Arat wen iga daƣ-san alham labasan, ad tinəməšiwirən gar-essan fəl awa z'agin i Ƴaysa.

Ƴaysa isassaƣru inəttulab-net

Īsənnəfrən ən Ƴaysa inəttulab win maraw d əššin

¹² Adan en da a daƷ ikka Ƴaysa adƷaƷ iyyan y a fall-as agu šiwatriwen. Iga fall-as ahad iƷrâdan itattar.

¹³ As affaw iƷra-du inəttulab-net, isan-nafran daƷ-san maraw d əššin, ig-asan esəm inəmmuzal.

¹⁴ Ismawan-nasan da: SimƷon was iga esəm Butros d amadray-net Andrawəs; YaƷub, Yaxya, Filibus, Bartulamawəs,

¹⁵ Matta, Tuma, YaƷub wa n ag Alfay, SimƷon was itawannu wa Isaggatakken,

¹⁶ Yahuz wa n ag YaƷub əd Yahuza Isxarəyuti wa z'akkaddalan Ƴaysa.

Ƴaysa əd tamattay

¹⁷ Dəffər awen izzəbbat dər-san Ƴaysa adƷaƷ, ibdad daƷ ataxas iyyan a daƷ təbdâd tamattay tagget ən nalkiman-net əd tamattay tagget a du-təfâlat akal ən Yahudəyya əd Yerusalam əd Ʒərman win Tir əd Sidon əhanen tagadamayt n agaraw wa zəwwəran.

¹⁸ Aytedan en osân-du fəl ad əssəsəman y awa isasaxru Ƴaysa, təwəzuzəyan dəƷ daƷ təwərnawen-nasan. Izzozay daƷ-san dəƷ win əhan kələsuf.

¹⁹ Tamattay en ketnet təgammay d ades ən Ƴaysa fəlas tarna t-id-təgammadat təzuzəy-tan ketnasan.

Īššin əzzənəfan n aytedan a t-əllanen

²⁰ Iswad Ƴaysa daƷ nəttulab-net, inna: «Təbbilalam kawanay

win sallaqqawnen iman-nawan dat Məššina

fəlas Taymar ta n Məššina ši-nawan.

²¹ Təbbilalam kawanay

win iha laz əmərədda

fəlas ad tayyawanam.

Təbbilalam kawanay

win hallinen əmərədda

fəlas ad tadzim.

²² Təbbilalam kawanay

win əkyadan aytedan,

əkkâsan-kawan daḡ ammas-nasan,

rabbadan-kawan, ɣaššadan ismawan-nawan

fəlas di-təlkəmam nak Ag Aggadəm.

²³ Dawatat, təfəliwəsam əzəl wədi,

fəlas təlâm arozan aggotnen daḡ jənnawan.

Arat wa dawan-əgan əddi

ənta iman-net a əgan marawan-nasan y
ənnəbitan.

²⁴ Mišan kawanay iməggərgas

iket alɣazab iqqâl-awan,

fəlas awa əran man-nawan iha ifassan-nawan.

²⁵ Iket alɣazab iqqâl-awan

kawanay win əyyəwannen əmərədda,

fəlas ad tullazam.

Iket alɣazab iqqâl-awan

kawanay win dazzinoen əmərədda,

fəlas a daḡ-wan tagu təfəyyawt, talim.

²⁶ Iket alɣazab iqqâl-awan

kawanay win əmmalan aytedan;

a dida a əgan marawan-nasan y ənnəbitan win
bahu.»

Tara n aytedan

27 «Kawanay win di-əssəsammen amaran, ənnex-awan: "Iriwat izənga-nawan, ad tətamazalam əlluɣ i win kawan-əkyadnen.

28 Tattarat a igan arraxmat i win kawan-sawarnen allaxanat, tansəyam Məşşina a igan alxer i win dawan-tagginen tarşəxşad.

29 As dak-iqqas awedan, takfaq-qu amdəd-nak wa hadan. As daɣ-ak irkab awedan əbərnuz-nak, alɣaşşaba-nak da ayy-as-tu.

30 I kay-onsayan takfaq-qu. Ad wər təgməya daɣ awedan a kay-d-issuxəl awa daɣ-ak irkab."»

31 «Arat was təram a dawan-t-agin aytedan, agat-asan-tu kawanay da.

32 Kud wər tarem ar aytedan win kawan-əranen, awak ma imos aroz wa za təgrəwam? Wala ark aytedan da ərân aytedan win tan-əranen.

33 Kud wər tətəggim a olaɣan ar i win dawan-tu-tagginen, awak ma imos aroz wa za təgrəwam? Wala arak aytedan taggin adi.

34 Kud dex wər təsəmərwisam ar aytedan win as tordam as a dawan-ərzəman, awak ma imos aroz wa za təgrəwam? Ark aytedan da tinəməkfin imarwasan gar-essan fəlas əssânan as a tan-d-iqqəl awa sammarwasan ketnet.»

35 «Kalar iriwat izənga-nawan, ad tətəggim y aytedan awa olaɣan, tətizəbənem i win daɣ-wan əgmaynen əzəbəna. Tagim adi ketnet da wər təgem attama n a dawan-itəwəggu. Eddi ad igat aroz-nawan, təqqəlam bararan ən Məşşina di n Amadkol fəlas ənta itaggu əlluɣ y aytedan win wər iha agoda əd win maksanan.

36 Təggəzet-kawan təhanint ta təhat Abbanawan.»

37 «Ad wər tannim ark arat s awedan fəl a sərwan wər itəwənnu. Ad wər təssəwəram awedan lahan fəl a kawan-wər-itəwəsəwər kawanay da. Sirufat, ad təgrəwam təsureft.

38 Hakkat, ad tətəwakfim. Təsəkət tolâxat, tədkârat, təssiksakat har təfətənxəl a dawanz-itəwəggin daɣ səbbətəran-nawan. Təsəkət tas təkkatam y aytedan ənta as dawanz-ikət Məşşina.»

39 Ig-asan deɣ Ƴaysa tangalt, inn-asan: «Awak əmədderxəl ifrâg alaway n iyyan əmədderxəl? As iga adi wərgex ketnasan as z'uden daɣ anu?

40 Attalami wər oger əşşex-net, mişan attalami kul wa issəxtaman, ad agdu d əşşex-net.

41 Mafəl təhannaya tezawt ta təhat šat n amadray-nak, kay amaran wər din-təgreɣ šiləlt ta təhat šat ta-nak?

42 Manəmmək as təganna y amadray-nak: "Ayy-i a dak-əkkəsax tezawt ta təhat šat-nak?" As iga awen, kay iman-nak wər təhənnəya šiləlt ta təhat šat ta-nak. Əmunafiq, əkkəs təzzar šiləlt ta təhat šat-nak, əddi ad za tannaflayaɣ daɣ tazawt ta təhat šat n amadray-nak, təkəkəsax-as-tat!»

43 «Wər t-illa ašək isxân itârawan âratän əbrarnen, wala iyyan wər nəsxâ itârawan âratän olaɣnen.

44 Əkkulluk n ašək âratän-net as itawazday. Wər tənimidan aratan ən fig daɣ tazayt, wala deɣ itanamad alɣanab daɣ tamat.

45 Awedan wa olaɣan, əlluɣ wa ihan əwəl-net a daɣ d-itakkas awa olaɣan, mişan anallabus

ənta, talbast ta təhat əwəl-net a day d-itakkas awa labasan. Awa idkaran əwəl n awedan a d-igammadan imi-net.»

Ənalkim wa n tidət əd wa n bahu

⁴⁶ «Ma fel as di-təgannim: "Əməli, Əməli!" Mişan wər tətəggim awa dawan-ganna?»

⁴⁷ «Awedan kul wa di-d-itasin isasam y awal-in, itamazal s awa ənnex, a dawan-əməla awedan wa s tu-z-ammattala.

⁴⁸ Immittalaq-qu s awedan ikarrasan ehan. İxaz wəllen har ewad təsəlit, ikras-du fall-as ehan-net. Dəffər awen osa-du əngəy issohen, irzak-ku mişan wər t-isammatakway fəlas təsəlit a fəl d-ikras.»

⁴⁹ «Amaran awedan wa isasaman y awal-in mişan wər sər-əs itəmizil, iha əlmital n awedan ikrasan ehan-net da wər t-ixez. Osa-du əngəy, istab-as. Ibarajjat, ixrad ahluk.»

7

Təhanint n Əlməsix

Əzuzəy ən Yaysa akli ən kabtan iyyan

¹ As ixrad Yaysa emel ən salan win den kul i tamattay en, iggaz təxrəmt ən Kafarnahum.

² Təxrəmt ten ih-et kabtan iyyan ən sojitan n Ərrum ilân akli-net ikna tara irinan, ibuk y iba.

³ As isla kabtan en isalan ən Yaysa, izammazal sər-əs arat day muzaran ən Kəl-Əlyəhud fəl a t-ansəyan a d-asu izzuzəy akli-net.

⁴ Osan-in Yaysa, onsayan-tu, ənnan-as: «Aləs a, ihôr a das-tagax tənəfust ta,

⁵ fəlas irâ tamattay-nana, ənta fadda a danağ-issəkranan ehan-nana wa n əlxibada.»

⁶ Təzzar iddew dər-san Ƴaysa. As din-ihoz Ƴaysa ehan, izammazal-du sər-əs kabtan en imidawan-net y a das-annin: «Əməli, ad wər təsəlliyyəğax iman-nak, nak wər əwedəğ ad təggəzəğ ehan-in.

⁷ Adi da fəl kay-in-wər-oseğ nak iman-in. Annu arat Ƴas ad izzəy amaşşaxal-in.

⁸ Əssâna dağ adi fəlas awedan a əmosəğ a dağ əttafan wiyyad tanat, əttâfağ-qat nak iman-in dağ sojitan win daw-i əllanen. As ənnəğ y iyyan: "Aglu", ad aglu, as ənnəğ y iyyan: "Iyyaw", a di-d-asu. As ənnəğ y əkli-nin: "agu awa", ad t-agu.»

⁹ As isla Ƴaysa y awen, isammaklal sər-əs, imalallay-in aytedan win das-əlkammen, inna: «Ənnəğ-awan, wala Kəl-İsrayil wər dağ-san ənayəğ awedan igân əzəğzan ewâdan wa iga aləs a.»

¹⁰ As din-əqqalan meddan win əmmozałnen ehan, osan-in akli wa irinan izzây.

Əsənkər ən Ƴaysa əmawad iyyan dağ təmattant

¹¹ Dəffər awen ikka Ƴaysa ağrəm iyyan igân esəm Nayn, əddewan dər-əs nəttulab-net əd tamattay tagget.

¹² As din-ihoz imi n əğrəm immənay d aytedan aggotnen ewaynen ənəmməttən y a t-in-ənbəlan. Aləs wa n ənəmməttən en, wər təla anna-net ar ənta, abba-net dəğ wər idder.

¹³ As tat-inay Əməli təsahhanatat-tu, inn-as: «Ayyu tala.»

¹⁴ Ikka-du ənəmmettən, idas təssut ta daɣ im-meway, əbdadan aytedan win t-ewaynen, təzzar inna: «Əmawad ənnex-ak: Ənkər!»

¹⁵ Iqqim-du aləs wa aba, išşewal, issoɣal-tu Ƴaysa y anna-net.

¹⁶ Ərmaɣan aytedan kul, ad əmmalan Məşşina gannin: «Ənnəbi zəwwəran a d-inafalalan daɣ-na, Məşşina osa-du tamattay-net fəl a daɣ-as issən.»

¹⁷ Təzzar təffəzzat sallat ən Ƴaysa daɣ akal ən Yahudəyya ketnet, əd kallan win tu-ɣalayɣalaynen.

Ƴaysa əd Yaxya wa isalmaɣan aytedan daɣ aman

¹⁸ Igraw Yaxya isalan win den kul ɣur attalamitan-net. Iɣra-du əşşin daɣ-san,

¹⁹ izammazal-tan s Əməli Ƴaysa y a das-annin: «Awak kay da was nəqqəl y a d-asu, meɣ ak ad nəssəgəd y iyyan?»

²⁰ As din-osan Ƴaysa, ənnan-as: «Yaxya wa isalmaɣan daɣ aman a dana-d-izammazalan sər-ək, inn-ak: "Awak kay da was nəqqəl y a d-asu, meɣ ak ad nəssəgəd y iyyan?"»

²¹ Assaɣat ten da iman-net, izozay daɣ-as Ƴaysa aytedan aggotnen daɣ təwərnawen əd təlawayyen əd kələsuf, issəsbad deɣ iməddərxal aggotnen.

²² Ijjəwwab Ƴaysa i meddan win sər-əs d-əmmozaɣnen, inn-asan: «Əqqələt Yaxya təssuɣələm-as awa tənayam d awas təslam, tannim-as: Iməddərxal əhannayan, inəbdan jawanken, aytedan win igraw kətru əzzayan zaddogan, imzagan əgrawan tesalay,

inəmməttan nakkaran-du daɣ təmattant, šiləqqawen deɣ sallanat y Əlinjil.

²³ İbbilal awedan wa wər igmed əzəgzan-net fəlas wər iga aššak daɣ awa əmosa.»

²⁴ As əgłan meddan win d-izammazal Yaxya, issənta Ƴaysa amagrad i tamattay daɣ batu ən Yaxya, inna: «Ma imos arat was təkkan əsuf y a tu-tənəyam? Awak telant isiwəliwil aɟu? Kala!

²⁵ Daɣ adi ma təkkan y a t-id-tənəyam? Awak aləs ilsân tabdoq təkknat šihussay? Kala! Ənəyat za aytedan win əlsanen tabdoq ta təhossayat, əgân deɣ təməddurt daɣ ənniflayan, inan ən mənokalan a əhan.

²⁶ Adi za ma təkkan y a t-id-tənəyam? Awak ənnəbi? Wəllen z'ăs ənnəbi. Amaran Yaxya ogar tišit n ənnəbi fadda.

²⁷ Fəlas Yaxya ənta a fəl ənnan Əlkəttaban: *"Ənəy za a dat-ək assaglaɣ anammazul-in a z'aknin tarrayt-nak."*

²⁸ Ənnəɣ-awan, wər kala a d-ihəw awedan ogaran Yaxya; dər iga awen da wala ɣas wa ogaran təmmədrəyt daɣ Taɣmar ta n Məššina, da ogar Yaxya.»

²⁹ Aytedan win əslanen y awal ən Yaxya, harkid nabazan n amana, kul əqbalan as tarrayt ta n Məššina ənta a toɣadat, adi a fəl ərdan issəlmaq-qan Yaxya daɣ aman.

³⁰ Mišan Farisaytan əd musanan n Əttawret, əntanay əssəknan əs tugəyt ta əgan s a tan-issəlməɣ Yaxya daɣ aman, iba ən tərəddawt-nasan s awa ixtas Məššina.

³¹ Inna Ƴaysa: «Mas z'ammattalaɣ aytedan n azzaman win nəha da? Awak ma dər olan?

³² Olân əd bararan əqqimnen dağ əssuk tinəməxrin gannin:

"Nəwat-awan tende,
mişan wər təwəyam!

Nəg-awan isakkan ən təfəyyawt,
mişan wər təlem!"»

³³ «Ənneç-awan adi fəlas Yaxya wa isalmayan aytedan dağ aman as d-osa, issigat əzum wər isəssu deç esmad n alxanab, tənnam aggəsuf a t-izdayan.

³⁴ Amaran, nak Ag Aggadəm ose-du, ətatta əsassa, mişan tənnam: "Ənəwat aləs wen n amawwalay en, isassin esmad s igət, imos əmidi ən nabazan ən takəsen d ark aytedan!"»

³⁵ Masnat ta du-təfalat Məşşina amaran, aytedan kul win əhanen tarrayt ta n Məşşina, əntanay a sataddinen aqqad-net.

Agaraw wa təga təntut iyyat təsureft ən bakkadan-net

³⁶ Igmay Farisay iyyan dağ Yaysa a çur-əs atşu. Təzzar ika Yaysa ehan ən Farisay wen, saççamaran ad tamansawan.

³⁷ Wala a ihogan tərəz-du təntut iyyat ən tanasbakkadt təhât ayrəm en da, təslât as Yaysa imigarat i Farisay wen. As du-tosa tewây butalay n alwardi.

³⁸ Təmal-du dəffər Yaysa, çur daran-net ad təhallu har təssəbdag idaran ən Yaysa əs mətəwan-net, təmmas-tan əs jəkkad-net. A dasan-tətamallat tənəqqal fall-asan alwardi.

³⁹ As inay Farisay wa isimuguren Yaysa awen, inna dağ man-net: «Ənnar imos aləs a ənnəbi, issən as təntut ta tu-təddasat da, tanasbakkadt.»

⁴⁰ Inn-as Ƴaysa: «Simxon, a dak-annax arat.»
 Inn-as Simxon: «Šiwəl, Īššex!»

⁴¹ Inn-as Ƴaysa: «Kala a t-illa aləs iyyan irwâsan əššin meddan. Iyyan irwâs-tu səmmosat təmad ən tamma n əzrəf, wa hadan irwâs-tu səmmosat təmərwen.

⁴² Dad wər əlen as ərzaman, oyy-asan awa tan-irwas. Awak ma tənney məni dağ-san wa tu-z-iren wəllen?»

⁴³ Inn-as Simxon: «Ordey as was oyya əmarwas wa aggen.» Inn-as Ƴaysa: «Tidət-nak.»

⁴⁴ Amaran imalallay-in tantut təzzar inna i Simxon: «Tahannayax tantut ta? As d-əggazax ehan-nak wər di-təkfex aman əs əššorada idaran-in, mišan ənta təssəbdak-kan əs məttawan-net təmas-tan əs jəkkad-net.

⁴⁵ As d-osey ehan-nak wər di-du-təssəlkada, mišan ənta a d-osey tətamallat i daran-in fəl saymar a di-təga.

⁴⁶ Kay wər təzwayax eɣaf-in, mišan ənta idaran-in a fəl tənɣal alwardi.

⁴⁷ Adi a fəl dak-ənnex: tara zəwwərat ta di-təssəkna təsitadda as ibakkadan-net tiwasarafan-as kul kuddey əggətan; mišan awedan wa igrawan təsureft n a əndərran, ənta tara-net ši əndərrat.»

⁴⁸ Təzzar inna Ƴaysa i təntut ten: «Ibakkadan-nam tiwasarafan-am.»

⁴⁹ Ad gannin aytedan win dər-əs ədrawnen imensewan dağ man-nasan: «Ma imos wa dağ awedan as wala ibakkadan isuruf-tan y aytedan?»

⁵⁰ Amaran inna Ƴaysa i tǝntut ten: «Ɖzǝgzanam a kam-iɣlasan, aglu daɣ alxer.»

8

Ƴaysa isasaɣru ǝs tangalen d ǝlmitalan

Aytedan win tidawnen ǝd Ƴaysa

¹ Dǝffǝr awen illil Ƴaysa iɣǝrman ǝd tǝɣarmaten immǝl y aytedan Ɖlinjil, imosan isalan ǝn Taɣmar ta n Mǝššina. Ɖddewan dǝr-ǝs nǝttulab-net win maraw d ǝššin.

² Iddew dǝɣ ǝd tǝdoden as šiyad kǝlǝsuf a daɣ-asnat ikkas, šiyad šiwǝrnawen a daq-qanat izzozay. Ɖmosnat Maryama Madǝl, s ǝnta a d-ǝgmadan ǝssa kǝlǝsuf,

³ ǝd Jannata ta n tǝntut ǝn Xuza wa innǝttafan ǝd taɣawšiwǝn n ǝmǝnokal Herod, ǝd Suzana ǝd šiyad šidoden aggotnen. Ketnasnat ǝdhǝlnat Ƴaysa ǝd nǝttulab-net s awa ǝlanat.

Ɖlmital wa n ǝmagyak

⁴ Wǝr t-illa ǝɣrǝm a du-wǝr-gǝmmǝdan aytedan takkin-du Ƴaysa, tǝzzar tǝga fall-as tiddawat tagget, ig-asan ǝlmital wa:

⁵ «Kala ad igla ǝmagyak iyyan y ad inbǝl amasa-net. Daɣ anabal wa itaggu den imosan anabas n amasa, ǝrtaknat tǝblalen šiyad fǝl tama ǝn tarrayt, tǝzzar ǝkkokalan daɣ-asnat aytedan, ǝtšan-tanat gǝdǝd.

⁶ Šiyad ǝrtaknat daɣ adag ǝhanat tǝhun. As d-ǝgmadnat, ǝqqurnat fǝl iba ǝn bǝddug.

⁷ Šiyad ǝrtaknat daɣ tǝfǝssaɣ, ǝdwalnat dǝr-ǝsnat, ǝlmaznat-tanat.

⁸ Šiyyad ertaknat daḡ amaḡal olâḡan, tæzzar ædwalnat. Ækkulluk ən tæblalt terâw temeday n iyyat.» As inna Ƴaysa awen idkal æmæsli-net inna: «Wa isallin, isæsæmet!»

Ma fel isasaḡru Ƴaysa s ælmitalan?

⁹ Dæffær awen æssæstanan-tu nættulab-net d almaḡna n ælmital wa iga den.

¹⁰ Inn-asan: «Kawanay tægrâwam masnat daḡ æssiran ən Taymar ta n Mæššina, mišan aytedan win hadatnen tangalen as dasan-ittæmal æssir wa, fæl ad iqqæl as "æswâdan, mišan wær hænnayan; æssisaman mišan wær gærrin."»

Almaḡna n ælmital wa n æmagyak

¹¹ Iḡla Ƴaysa iššewal, inn-asan: «Ælmital wædi almaḡna-net da: amasa ælmital a imos n Awal ən Mæššina.

¹² Amasa wa irtakan fæl tama ən tarrayt, ælmital a imos n aytedan win æslanen y awal ən Mæššina, mišan ad d-asu Iblis ikkæs-tu daḡ wallan-nasan fæl ad wær æzzægzan, ægrëwan efsan.

¹³ Amasa wa irtakan daḡ tæhun, ælmital a imos n aytedan win æslanen y Awal ən Mæššina, æqbalan-tu æs man filawasnen, mišan wær ila awen ekay, æzægzan-nasan wær itihag. As tawajarraban, a tan-igmæd.

¹⁴ Amasa wa irtakan daḡ tæfæssax, ælmital a imos n aytedan win æslanen y awal ən Mæššina æqbalan-tu, mišan as tan-ædgëzan aššawašatan n æddænet æd tara n æddænet d arak deranan, æssæfalan-du dænnæg awal wen, ad igdæl awen y æzægzan-nasan alkamalat.

15 Amasa wa irtakan amaran daɣ amaɗal olaɣan, əlmital a imos n aytedan win əslanen y awal ən Məşşina əlân iwallan olaɣnen lam-modnen, təzzar əqbəlan-tu, əttəfan-tu s əlluɣ, təgmad-tan-du tənfa fəlas əzmâran y arat kul.»

Tangalt ta n fətəla

16 Inn-asan Ƴaysa deɣ: «Wər t-illa awedan isarɣin fətəla təzzar isəbbənbəy fall-as əɣəzu madəɣ ag-et daw tessat. Kalar əşiləy a tat-itaggu təşəşiləyt-net fəl ad ənəyan aytedan win du-taggaznen ehan s ənnur-net.

17 Wər t-illa a iɣbâran əs wərgəɣ ad affaggu, wala iyyan istâran əs wərgəɣ a d-inənəfiləl, itəwəssən ezal a mallan.

18 Daɣ adi ənkədat y əmmək was təsasamam. Awedan wa ilan, a das-itəwəşitu awa ila; wa wər nəla amaran, arat n awas iɣîl il-ay da a daɣ-as attarmas.»

Imarwan ən Ƴaysa win tidət

19 Tosa-du anna ən Ƴaysa əd mədrayan-net, mişan orn-en a t-in-awədan fəl igət ən tamattay.

20 Itawann-as: «Anna-nak əd mədrayan-nak əbdâdan-ak, ərân anay-nak.»

21 Mişan inn-asan Ƴaysa: «Anna-nin əd mədrayan-in aytedan win sasammen y awal ən Məşşina, tamazalan s awa inna.»

Tarna ən Ƴaysa

Ƴaysa ila tarna fəl aɗu

22 Əzəl iyyan iggaz Ƴaysa aɣlal n aman ənta əd nəttulab-net. Inn-asan: «Nəxrəset agaraw əs tagadamayt-net ta hadat.» Təzzar əgлан.

²³ Æglân fæl aman as din-ibaz etəs Ƴaysa. Wala a ihogan igar-du ađu issohen fæl agaraw, ad idakkar əxlal aman, əggazan zega n a tan-atšin aman.

²⁴ Əhozan-du nəttulab Ƴaysa, a tu-sankaran dađ etəs, gannin as: «Əššex, Əššex, nəhlak.» Inkar-du Ƴaysa isannarđam y ađu əd tanazza-maren takkinen ijənnawan, təzzar ibdad ađu, idrar arat kul.

²⁵ Amaran inn-asan Ƴaysa: «Ma iga əzəgzan-nawan?» Issirmaq-qan awen, isimaklal sər-san. Ad tinəmənnin: «Ma imos wa dađ awedan as wala ađu d aman ittâf dađ-san tanat?»

Ƴaysa ila tarna fæl kələsuf

²⁶ Dəffər awen ewadan-in akal ən Garassen-atan inimađlayan agaraw d akal wa n Galilaya.

²⁷ Da da đas a d-izzəbbat Ƴaysa ađlal n aman ənta a das-d-issəlkad aləs iyyan əhân kələsuf. Aləs wen in əđrəm ihan akal en da. Irəw as issənsa isəlsa, igmad ađaywan, ixsar dađ zəkwan.

²⁸ Inay Ƴaysa đas, ad itakkas imaslan labasnen, təzzar issəjad i Ƴaysa, idkal əməsli-net wəllen inna: «Ya Ƴaysa wa n Barar ən Məššina di n Amadkol ma dađ-i taređ? Onsâyaq-qay a di-wər-təzəđđəba.»

²⁹ Innâ awen fəlas Ƴaysa a omaran aggəsuf wa t-ihan s a t-id-igməd. Iyyəwan-du sər-əs aggəsuf en əsənkər, karradan-tu aytedan əs sassaran əd təzabagawen mišan ad ixtəs awen kul, awəy-tu aggəsuf s əsuf.

³⁰ Issəstan-tu Ƴaysa, inn-as: «Ma esəm-nak?» Ijjiwwab-as inn-as: «Esəm-in Egan.» Inn-as aləs en awen fəlas kələsuf aggotnen a t-əhanen.

³¹ Ad tansayan kələsuf win t-əhanen Ƴaysa a tan-wər-issuku anu wa wər nəla eder.

³² Illât-tu əsəgən aggen ən ladayan ədânnen fəl tasaga ən təkəşwart. Onsayan kələsuf Ƴaysa y a tan-akfu turagat n ad əggəzan iladayan en, ikf-asan-tat.

³³ Əgmadan kələsuf aləs en, əggəzan iladayan. Təzzar ozalan-du ladayan fəl azagada ən təkəşwart ad titərəgtərigan dəx agaraw, tattantan aman.

³⁴ As ənayan madanan ən layadayan awa igan den, ozalan, əgan isalan n awen dəx əxrəm en əd xələyxələyan-net.

³⁵ Əqlan aytedan y ad ənəyan awa igan. As dinosan Ƴaysa ogazan-in xur-əs aləs wa əgmadan kələsuf, iqqim xur daran-net, ilsâ, təqqâl-t-idu dəx tayttay-net, təzzar təggaz-tan tasa.

³⁶ Əgan dəx-san aytedan win əgəyyatnen y awen isalan n əmmək was itawasafsa aləs wa dəx tawakkasan kələsuf.

³⁷ Mişan ənkarand-aytedan kul win akal ən Garassenatan ad gammayan dəx Ƴaysa a tan-ugag fəlas tasa a tan-təggazat zəwwərat. Iggaz Ƴaysa aylal n aman iqqal.

³⁸ Onsay-tu aləs wa əgmadan kələsuf ad t-ayyu a dər-əs idaw, mişan issoxal-tu Ƴaysa inn-as:

³⁹ «Əqqəl ehan-nak, təməla y aytedan iket n arraxmat ta dak-iga Məşşina da.» Təzzar igla ad immal dəx əxrəm en ketnet arat kul wa das-iga Ƴaysa.

Ŷaysa ila tarna fəl təwərnawen əd təmattant

⁴⁰ As iqqal Ŷaysa əsəlim wa hadan n agaraw, təssəlkad-as-du tamattay as ketnet təqqâl-as.

⁴¹ Alwaq wen da a d-osa aləs iyyan igân esəm Jayxus imosan iyyan daɣ muzaran n ahan n əlxibada wa n Kəl-Əlyəhud ən təxrəmt ten. Issəjad dat Ŷaysa, ad t-itansay ad idawan s ahan-net,

⁴² fəlas elles təmosat wələt maraw elan d əşšin, s ənta ɣas a ila, a təbukat y iba.

Iddew dər-əs Ŷaysa, tətənanbdax fall-as tamattay.

⁴³ Tamattay en tah-et təntut təgât maraw elan d əşšin igammad-tat əzni. Tənɣa təla-net kul daɣ nasmagalan, mişan wər t-illa awedan ifrâgan əzuzəy-net.

⁴⁴ Təhoz-du Ŷaysa sa sər təxərden, tədas təbənək ən təkadkat-net, izzəkəkət əzni wa tat-igammadan tamazayt ten da. Təzzay.

⁴⁵ Təzzar inna Ŷaysa: «Ma di-idasan?» Iggad awedan kul as t-idâs, amaran inn-as Butros: «Əşşex, tamattay a ketnet as kay-taxalayɣalay, təsâs-kay.»

⁴⁶ Mişan ya inna Ŷaysa: «Awedan iyyan idâs-i fəlas əfrâya i tarna iyyat as di-təgmad.»

⁴⁷ As təssan təntut ten as təffigga, təkka-du Ŷaysa təndaw-tat taysəst, təssəjad dat-əs, təmal-as dat aytedan kul əddəlil wa fəl tu-tədas əd təməzzəyt ta təga tamazayt ten da.

⁴⁸ Inn-as Ŷaysa: «Tabarart-in, əzəgzan-nam sər-i a kam-izzozayan, aglu daɣ alxer.»

⁴⁹ Harwada išşewal Ŷaysa as d-osa awedan iyyan a d-ifalan aɣaywan ən Jayxus wa n əmuzar

n ahan wa n əlxibada ən Kəl-Elyəhud, inn-as: «Allek aba-tat, mazzay d əddaguz n Əššex.»

⁵⁰ Isla Ƴaysa y awen, inna i Jayxus: «Ad wər tərmeşa, zəgzən xas, allek ad təzzəy.»

⁵¹ As din-ewad Ƴaysa ehan ən Jayxus, igdal y aytedan ad t-əggəzan, wər oyya ar Butros əd Ƴaxya əd Ƴaqub d abba ən təbarart d anna-net.

⁵² Aytedan kul win əllanen den, hallan, sikalalan fəl təbarart mišan inn-asan Ƴaysa: «Ayyiwat tala, təbarart wər tat-aba, etəs xas a təga.»

⁵³ A daḡ-as tajaban fəlas əssānan as wər tədder.

⁵⁴ Təzzar iggaz Ƴaysa fəl təbarart, ibaz əfus-net, iḡr-et, inn-as: «Təbarart ənker-du!»

⁵⁵ Əqqalan-tat-du man-net təbdad-du daḡ tamazayt ten da, təzzar omar-tan Ƴaysa s a tat-akfin a tətša.

⁵⁶ Əhagan marwan ən təbarart, mišan irxam-asan Ƴaysa fəl amel n awen y awedan waliyyan.

9

Ƴaysa əd nəttulab-net win maraw d əššin

Əzəmmizəl ən Ƴaysa inəttulab-net

¹ Iḡra-du Ƴaysa inəttulab-net win maraw d əššin, ikf-en tarna d əlxəkum fəl kələsuf kul, ikf-en deḡ fərregat n əzuzəy ən təwarnawen.

² Izammazal-tan y ad agin isalan ən Taḡmar ta n Məššina, əzzuzəyan deḡ imiranan.

³ Inn-asan: «Ad wər tawəyam wala daḡ əşikəl, gər z'iqqal tallaq wala aḡrəg, wala allaw, wala azrəf, wala deḡ a okâyan təkadkat iyyadda.

4 As din-tosam aḡrəm, ehan wa təggazam isammagarat-kawan, zabbatat daḡ-as har təgmədam aḡrəm wədi.

5 Aḡrəm təggazam wər kawan-əqbelan aytedan-net, as tu-təgammadam təbbikbakam-in əgodrar-net wa iwaran idaran-nawan, ilkâm ad aggayyat awen fall-asan.»

6 Eḡlan nəttulab, əllilan šiḡarmaten, ad əmmâlan Əlinjil daḡ adag kul, zuzəyan daḡ-as deḡ imiranan.

Iduf wa iga Herod daḡ Ƴaysa

7 Isla Herod wa n amuzar n akal ən Galilaya aratan kul win itaggu Ƴaysa əd nəttulab-net, iqqan awen eḡaf-net fəlas əllan-tu aytedan gan-ninen əs Ƴaysa: «Awen Yaxya wa isalmaḡan aytedan daḡ aman a d-inkaran daḡ təmattant.»

8 Wiyyad gannin: «Awen ənnəbi Ilyas a d-izzəbben.» Wiyyad deḡ gannin: «Awen iyyan daḡ ənnəbitan win ərəwnen a d-inkâran daḡ təmattant.»

9 Inna Herod: «Yaxya, nak iman-in a d-issəfrasan eḡaf-net, daḡ adi ma imos aləs wa fəl sallaḡ aratan win?» Ad igammaḡ Herod d anay ən Ƴaysa.

Əṣətši ən Ƴaysa səmmos gim n aləs

10 Eqqalan-du nəmmuzal, əssoḡalan i Ƴaysa awa əgan kul. Təzzar igmad dər-san aytedan s adag issufan a din-ikitayyen, ihan anamod ən təḡrəmt ta n Betsayda.

11 Mišan təsla tamattay awen, təlkam-as. Ig-asan Ƴaysa marxaba, təzzar iṣṣewal-asan daḡ

salan ən Taɣmar ta n Məššina, izzozay daɣ-san win əddərarnen s awen.

¹² As təbuk təfuk y agadal, əhozan-t-idu nəttulab-net win maraw d əššin, ənnan-as: «Suxəl tamattay a, ad takku šiɣarmaten əd ɣawnatan win əhoznən, ad təgməy id tənəsa d a tətša fəlas edag issufan awa.»

¹³ Inn-asan: «Satšat-tan kawanay iman-nawan da!» Ənnan-as: «Nakkanay wər nəttef ar səmmosat təgəlwen d əššin kifitan, kundaba za ad nəglâ nazzanza-du imensewan i təxlək a kul.»

¹⁴ Edag ən səmmos gim n aləs a əllanen den. Inna Ƴaysa i nəttulab-net: «Saɣɣamiwat aytedan kul, tagim-tan šiɣimten ən səmmosat səmmosat təmərwen n awedan.»

¹⁵ Əgan nəttulab awen da, saɣɣaman aytedan kul.

¹⁶ Təzzar idkal Ƴaysa səmmosat təgəlwen šin den d əššin kifitan win, iggəzzay ijənnawan, iga igodan i Məššina amaran ikaramkaram šiɣəlwen šin, iga awen da i kifitan, ikf-en i nəttulab-net y a tan-uzanan i tamattay.

¹⁷ Ətšan aytedan en ketnasan har əyyəwanan. Tawašadawan-du karammutan win du-tawaglaznen, tawadnayan daɣ-san maraw əzmaman d əššin.

Awa inna Butros əs Ƴaysa

¹⁸ Əzəl iyyan itattar Ƴaysa ɣas-net, wər ɣur-əs illa ar inəttulab-net, dəffər awen issəstan-tan, inn-asan: «Awak daɣ iduf n aytedan, ma əmosa?»

¹⁹ Ənnan-as: «Wiyyad a gannin Ƴaxya wa isalmaɣan aytedan daɣ aman a təmosa, wiyyad

a gannin: ənnəbi İlyas, wiyyad dəx a gannin iyyan dəx ənnəbitan win ərəwnen a d-inkâran dəx təmattant.»

²⁰ Təzzar inn-asan: «Kawanay za ma tənnam ma əmosa?» Inn-as Butros: «Əlməsix ən Məşşina a təmosa.»

²¹ İssənkad Ƴaysa nəttulab-net, omar-tan s ad wər əməlan y awedan waliyyan isalan win den.

²² Inn-asan: «Nak Ag Aggadəm ilzâm-i ad ənəyax arkanay aggen, unkaran-i muzaran ən Kəl-Əlyəhud əd muzaran ən limaman əd musanan n Əttawret, təwəggin man-in, ənkəra-du dəx dəx təmattant əzəl wa n karad.»

Ləkkum i Ƴaysa

²³ Dəffər awen inn-asan ketnasan: «Wa iran a di-ilkəm, wədi igmədet tara ən man-net, agu imateran-net idkəl təgəttawt-net akk əzəl, ilkəm-i.

²⁴ Əssənət as awedan wa wər nəgəmməy ar aggaz ən man-net, wədi ad t-əgmədan, mişan wa iqbalan ad t-əgmədan fəl əddəlil-in, wədi ad ixləs.

²⁵ Ma z'aknu y awedan ad igrəw əddənet ket-net, ənta issixrak iman-net, iffota dəx alaxirat?

²⁶ Awedan kul wa isakkarakad ləkkum y-i, madex isikarakad-tu əsuxəl n awal-in, wədi nak da, Ag Aggadəm, a di-isəkkərəkəd əlqəbulat-net əzəl wa du-z-əqqəla aheç tanaya-nin, təmosat tanaya ta n Abba, təmos dəx ta n angalosan a zaddognen.

²⁷ Əggəyyey əsilakanax-awan as, wiyyad dəx-wan əbdâdnen da da, wər tan-z-iba wər ənayan Taçmar ta n Məşşina.»

Ītawānāy ən tanāya ən Ȳaysa

²⁸ Edag n əttaṁ adan dəffər igi wa dasan-iga Ȳaysa batuten šin den, inkar iddew əd Butros əd Ȳaxya əd Ȳaqub s ədχax iyyan fəl a fall-as ansəy Məššina.

²⁹ Itattar den da as imməttay udəm-net, təzzar əgan səlsa-net təməllay tətassamat.

³⁰⁻³¹ Īhinan-in oggān ənnəbi Musa d ənnəbi Ilyas daχ tanāya ən Məššina, mišawalan əd Ȳaysa daχ batu n agamad wa z'agu əddənet a z'attaddin daχ Yerusalem əs təməttant-net.

³² As itaggu awen Butros əd midawan-net ibāz-tan-in etəs. As d-ənkaran ənayan tanāya ən Ȳaysa, ənayan dəχ əššin meddan win dər innəbdad.

³³ As iggaz ənnəbi Musa d Ilyas šin əgəlli, inna Butros i Ȳaysa: «Īššex, olāχ as nəlla da. Īndawat ad nəkrəs karad həktan: iyyan i-nak, iyyan in Musa, iyyan in Ilyas.» Wər issen Butros a igannu den.

³⁴ Igannu Butros awen da as du-tənafalal təgarak iyyat, təlsa Ȳaysa d ənnəbitan əššin win dər innəbdad. As təlsa Butros əd midawan-net, təggaz-tan tasa.

³⁵ Igmad-du əməsli təgarak ten, inna:
«Awa Barar-in
wa sannafranax,
səsəmat-as.»

³⁶ As tənda batu ten, wər hənnəyan nəttulab ar Ȳaysa. Īffəstan fəl awen, wər t-illa awedan əs t-əmālan daχ adan en.

Īzuzəy ən Ȳaysa barar iha aggəsuf

³⁷ As əzəl wa ilkaman i wen, izzəbbat-du Ƴaysa əd nəttulab-net win karad en adxax, təzzar təssəlkad-as-in tamattay tögget.

³⁸ Wala a ihogan idkal aləs iyyan daɣ ammas ən tamattay en əməsli-net, inna: «Ya Əşşex, onsayaq-qay a di-təhənəttex i barar-in, ənta ɣas a ələx.

³⁹ Aljayn a t-itabazan, təzzar ad izayyak, itizəbərdil, isakafkaf. Gərrid as t-itayyu, issikn-ay alɣazab.

⁴⁰ Onsəyax inəttulab-nak a daɣ-as t-əkkəsan, indar-asan.»

⁴¹ Təzzar inna Ƴaysa: «Xa! Iket iba n əzəgzan d əşşur daɣ aytedan n azzaman a! Awak har əmmay əddewa dər-wan, əzmâraɣ-awan? Awəy-du barar-nak.»

⁴² As d-ihoz barar Ƴaysa, iggədl-ay aggəsuf, ad itizəbərdil. Iharaşşat Ƴaysa aggəsuf, ikkas-tu daɣ barar, izzay, issoɣal-tu y abba-net.

⁴³ Aytedan kul təsimakləl sər-san təzzəwwərt ən tarnə ən Məşşina.

Emel ən Ƴaysa təmattant-net

Harwada isimakləl s aytedan arat kul wa iga Ƴaysa den, as inna i nəttulab-net:

⁴⁴ «Təggəzet batu ta şiməzzugen-nawan, təttafam-tat: "Nak Ag Aggadəm əjwâra ad əggâzaɣ ifassan n aytedan."»

⁴⁵ Mişan wər əgren batu ta dasan-iga den, ittinkal-asan almayna-net fəl a tat-wər-agrin, amaran tah-en tasa n əsəstan-net.

Tamazaq gər nəttulab

⁴⁶ Tənkər tamazaq gər nəttulab ən Yaysa dağ batu ən wa dağ-san ogaran almaqam.

⁴⁷ Issân Yaysa awa samadranan, a di fəl d-idkal arat ən barar iyyan issəbdad-tu dəğma-net,

⁴⁸ amaran inn-asan: «I iqbalan barar a, fəl əddəlil-in, nak a iqbal. I di-iqbalan dəğ, wa di-d-izammazalan a iqbal. Wa dağ-wan wər nəmos arat, ənta a zəwwəran.»

Əsəstan dağ batu n aləs itakkasan kələsuf dağ aytedan

⁴⁹ Inna Yaxya i Yaysa: «Əššəx, nənây aləs iyyan itakkasan kələsuf dağ aytedan s esəm-nak, nənn-as ad wər iləs igi n awen, fəlas wər danağ-ihə əs ləkkum y-ak.»

⁵⁰ Inn-as Yaysa: «A das-tu-wər-təgdəlam, fəlas i wər nəgəmməy təkma-nawan, wədi əmidi-nawan.»

Iki ən Yaysa Yerusalam

Arat wa ilzaman ənalkim ən Yaysa d alak wa das-insan

Tugəyt ən təxrəmt iyyat ən Samarəya s əlqəbulat ən Yaysa

⁵¹ As d-əhozan adan win dağ z'assandu Yaysa arat wa ixtas Məššina, a t-imosan əmədkəl-net əs jənnawan, isaggatakkat y iki n əyrəm ən Yerusalam.

⁵² Issəğlə inammazalan dat-əs, əkkan təxrəmt iyyat n akal ən Samarəya y a das-aknin edag n əzəbbi.

⁵³ Mišan ugayan aytedan ən təxrəmt ten s a dasan-iməgürət fəlas ikkâ Yerusalam.

⁵⁴ As inay Yaquub əd Yaxya win nəttulab-net awen, ənnan: «Əməli, tarex ad nannu i təmsay a fall-asan du-tazzabbat, təsərrəkəmmət-tan?»

⁵⁵ Imalallay-tan-in Yaysa, isannarxam-asan,

⁵⁶ təzzar okayan əs təxrəmt iyyat.

Awa ihan ləkkum i Yaysa

⁵⁷ Jiwanken as inna aləs iyyan i Yaysa: «A dak-əlkəma s adag kul wa təkke.»

⁵⁸ Inn-as Yaysa: «Izagazan əlân enwan, igədad dəx əlân şisəllula, mişan nak Ag Ag-gadəm wər əley wala edag dəx əssənsa eɣaf-in.»

⁵⁹ Inna Yaysa y iyyan aləs: «Əlkəm-i.» Təzzar inn-as: «Əməli, akf-i turagat n ad agla har din-ənbəlay abba-nin təzzar.»

⁶⁰ Mişan inn-as Yaysa: «Ayyu inəmməttan ad ənbəlan inəmməttan-nasan, kay amaran, aglu taga y aytedan isalan ən Taɣmar ta n Məşşina.»

⁶¹ Inn-as iyyan aləs: «Əməli, arex a dak-əlkəma, mişan akf-i turagat n ad nəməgga d aytedan-in şiwatriwen təzzar.»

⁶² Inn-as Yaysa: «Awedan wa issəntan dəx ləkkum y-i, mişan wər iga awen s əwəl iyyanda, wədi wər ihor əd Taɣmar ta n Məşşina.»

10

Əzəmmizəl wa iga Yaysa inəttulab win əssayət təmərwen d əşşin

¹ Dəffər awen isannafran Əməli wiyyad inəttulab əmosnen əssayət təmərwen d əşşin, izammazal-tan s əşşin əşşin y a das-in-izaran əs xərman əd daggan win as ibuk y a tan-immər.

² Inn-asan: «Ƴarat teggət, mišan wər əggətan maššaḡalan win tat-z-aləynen. Daḡ adi əttərat s esəm ən məššis ən Ƴarat ta, a d-assaḡlu imaššaḡalan a tat-olaynen.

³ Aḡlat! Zimazalaq-qawan təmosam zun jamaran əhanen ammas ən ridalan.

⁴ Ad wər tawəyam azrəf wala aḡrəḡ wala təsəsəl ta n sanatat. A kawan-wər-səllulen assalaman daḡ tarrayt.»

⁵ «Ehan təggazam, təḡəram fall-as assalam təzzar.

⁶ Kud ih-ay awedan n alxer, wədi a kawan-iqbəl, igrəw alxer-nawan. Kud deḡ wər t-iha, wədi takəyam d alxer-nawan.

⁷ As təḡrawam ehan n awedan n alxer, təxsəram daḡ-as. Tatšim, tašwim awa kawan-itawakfan, fəlas amaššaḡal kul ihor d alxaq-net. Ad wər tilalam inan.»

⁸ «Aḡrəm a din-tosam deḡ əqbalan-kawan məssawəs, tatšim arat was kawan-sammagaren,

⁹ təzzuzəyam imiranan win t-əhanen, təzzar tannim y aytedan-net: "Taymar ta n Məššina təhōz-kawan-du."

¹⁰ Mišan aḡrəm a din-tosam wər kawan-əqbelan məssawəs, ilalat tarrayen-net təḡannim:

¹¹ "Təḡḡiyem as wala aboqqa n əḡrəm-nawan wa iwaran idaran-nana da nəbbikbakk-in, mišan əssənat as Taymar ta n Məššina təhōz."

¹² Ənney-awan, əzəl wa n tabadday, aytedan n əḡrəm wədi, ad agin alḡazab ogaran wa z'agin win əḡrəm wa n Sədom.»

13 «Iket alɣazab iqqâl-awan kæl-aɣrəm ən Koradzin! Iket alɣazab iqqâl-awan kæl-aɣrəm ən Betsayda! Fəlas təlməxjujaten šin ɣur-wan əganen ənnar əgânat daɣ əɣrəm ən Tir əd wa n Sidon, wədi irəw as əqqanan isəlsa ən bəhu əqqiman daɣ eɣəd, imos awen əsənnəfiləl n as əhdän.

14 Awen daɣ a fəlas, alɣazab wa za tagim əzəl wa n tabadday ad aɣər wa z'agin aytedan n əɣrəm ən Tir əd wa n Sidon.

15 Kawanay aytedan n əɣrəm wa n Kafar-nahum, adis ad tammadkalam s aljannat? Kalar Jahannama a daɣ za tətəwəgaram.»

16 Inna ɣaysa deɣ i nəttulab-net: «Awedan wa dawan-issəsaman, nak as issəsam; wa kawaŋ-inkuran deɣ, nak a inkur. Amaran wa di-inkuran, wədi wa di-d-izammazalan a inkur.»

Tewaylay ən nəttulab ən ɣaysa win əssayat təmərwen d əššin

17 As d-əqqalan nəttulab win əssayat təmərwen d əššin, əknân təfalawist, gannin i ɣaysa: «Əməli, wala kələsuf əttâfan tənnanana as dasan-nəɣra esəm-nak!»

18 Təzzar inn-asan ɣaysa: «Hannayaɣ Aššaytan as d-ifataqqat daɣ jənnawan zun essam.

19 Əssənat as əkfeq-qawan tarna fəl taššolen əd təzurdam d awa ilə azangaw-nana Iblis kul daɣ tarna. Wər t-illa a ifrâgan a dawan-agu təkma.

20 Mišan a kawan-wər-isəfəliwəs as əttâfan kələsuf tənna-nawan, kalar isəffəliwəset-kawan akatab wa əgan əsməwan-nawan daɣ aljannat.»

Tədawit ən Ƴaysa

²¹ Assaxat ten da ad ikna Infas wa Zəddigan əsəddəwi ən Ƴaysa, təzzar inna: «Əgeyx-ak təmmalen ya Abba, Əməli ən jənnawan d amadal fəl axabar wa təgeyx aratan win i musanan, əd malan ən tayttay, təsannafalalaq-qan y aytedan win wər nəzlay əd bararan; id adi da a imosan agna-nak ya Abba.

²² Arat kul ig-ay Abba-nin daɣ əfus-in, wər t-illa i issanan awa əmosa ar Abba, wər t-illa deɣ i issanan awa imos Abba ar nak an Barar-net d awedan was arex a das-tu-sənnəfiləla.»

²³ Imalallay-in Ƴaysa inəttulab-net, işşewalasan əntanay ɣas, inn-asan: «Əbbilalnat şittawen şin hannaynen awa təhannayam!

²⁴ Silakanax-awan as sidaranan ənnəbitan aggotnen əd mənokalan anay n awa təhannayam, mişan wər t-ənayan, sidaranan deɣ tesalay y awas təsallim, mişan wər das-əslen.»

Awa izlayan ənalkim ən Ƴaysa d aytedan win hadatnen

Əsəstan wa iga əmusan n Əttawret i Ƴaysa

²⁵ Dəffər awen inkar-du əmusan n əşşərixa iyyan iga i Ƴaysa əsəstan imosan tənagmayt, inn-as: «Əşşəx, mas di-ilzam igi-net, y ad əgrəwa təməddurt ta təɣlalat?»

²⁶ Inn-as Ƴaysa: «Ma iktaban daɣ Əttawret? Ma daɣ-as təɣreɣ?»

²⁷ Ijjəwwab-as, inn-as: «Iktâb daɣ-as as: "Ad tireɣ Əməli-nak Məşşina s əwəl iyyanda, əd man

ardânen, tireq-qu əs təxurad-nak kul əd tayttay-nak kul, tirex deş əşəqqaq-nak əs təməwit tas tareş iman-nak."»

²⁸ Inn-as Ƴaysa: «Aljawab-nak oşâd, taggu adi da ad təddəra.»

Elmital wa n aw Samarəya wa olaşan

²⁹ Mişan dad ira əmusan wen ad aknu batunet, inna i Ƴaysa: «Ma imosan za əşəqqaq-in?»

³⁰ Ijjəwwab-as Ƴaysa s əlmital wa, inn-as: «Aləs iyyan a d-igmadan aşrəm ən Yerusalam, iras ikka wa n Yerikaw har t-əgrawan baydagan. Əbazan daş-as awa ila, əggâtan-tu, as t-oyyan illa gər təməddurt d iba.

³¹ Imazayyat d awen d as d-iga əlimam iyyan tarrayt ten. Inay aləs wen, işlay-tu.

³² Illam-du iyyan daş Kəl-Lebi ənta da den, inay-tu, işlay-tu.

³³ Mişan as d-illam aw Samarəya iyyan den işşokalan, inay-tu, təggaz-tu təhanint-net.

³⁴ Ikk-ay-du, işşorad ibusan-net s azzayt d esmad n alşanab, ittal-tan, təzzar issəwan-tu təsənəyt-net, eway-tu s azazzabbaw, issan daş-as.

³⁵ As affaw, idkal-du əşşin dinaran n əzrəf ikfen y aləs wa innəttafan d azazzabbaw, inn-as: "Əssən daş aləs di, as d-əqqala, nak a dak-zirzəman arat kul wa fall-as tənşex, kud ənta oğar adi."»

³⁶ Amaran inna Ƴaysa y əmusan n Əttawret wen: «Məni daş meddan win karad a, was tordeş as ənta a igan y aləs wa ənşan baydagan a amazal wa itaggu awedan y əşəqqaq-net?»

³⁷ Inn-as: «Wa das-ihanatten.» Inn-as Ƴaysa: «Adi za aglu, taga kay da zun d awen daɗ.»

Maryama əd Marta

³⁸ Iгла Ƴaysa daɗ əşikəl-net ənta əd nəttulab-net har iggaz taɗrəmt iyyat innəftaɗ i təntut təgāt esəm Marta.

³⁹ Tantut ta təla təmadrayt-net təgāt esəm Maryama. Təqqim Maryama ɣur daran n Əməli Ƴaysa, təssisam y awa igannu.

⁴⁰ Marta amaran, işimašan-tat əşşəxəl n əsəmməguri ən Ƴaysa.

Wala ihogan təhoz-du Ƴaysa, tənn-as: «Əməli, awak zələyat a wər təgeɗ daɗ as di-toyya tamadrayt-in d əşşəxəl ketnet ɣas-in? Ann-as a di-tilal.»

⁴¹ Inn-as Ƴaysa: «Marta, Marta! Əşşiwašan-kam aratan aggotnen, əssiggadan tayttay-nam.

⁴² Ənta arat iyyanda as təga addararat olâɗ a t-imosan əsəsəm y awal-in, ənta a təsannafran Maryama, amaran wər daɗ-as z'əttərməs.»

11

Təwatray ən Ƴaysa

¹ Əzəl iyyan itattar Ƴaysa daɗ adag iyyan. As issənda, inn-as iyyan daɗ nəttulab-net: «Əməli, susən-ana təwatray zun awa iga Yaxya i nəttulab-net.»

² Inn-asan Ƴaysa: «As tətattaram, tannim: "Abba, Itəwəsəɣməret esəm-nak di zəddigan, taset-du taɣmar-nak.

³ Akf-anax akk əzəl isudar-nana,

⁴ tæssurəfaḡ-anax ibakkadan-nana,
zund əmmək as nakkanay da
nəsuruf i win danaḡ-əganen ark mazalan.
A dana-wər-taga daḡ alyarar ən jarrabatan n
Iblis."»

Gälleyat daḡ təwatriwen

⁵ Inn-asan Ƴaysa deḡ: «Məni daḡ-wan wa
z'ilen əmidi, as-ay-du adawannay n ahad ann-as:
"Zəbənət-i-du karadat təgəlwen,

⁶ fəlas iyyan daḡ midawan-in a di-d-
innəftaxan, wər ələḡ a t-əššətša."

⁷ Təzzar ann-as-du daḡ ammas n ahan: "A di-
wər-tədgəza, ehan-in əmərədda ixfâl, nak əd
bararan-in nəqqâl s etəs, wər əfrega a din-
əbdədəḡ akfaḡ-qay arat."

⁸ Ənnəḡ-awan, kud wər d-inker akf-as-tanat
fəlas imos əmidi-net, da ad d-inkər akf-ay arat
kul was iddərər fəlas wər t-isakkarakad mansay
wa t-iga den.»

Əzəgzan əs təwatriwen

⁹ Amaran nak ənnəḡ-awan: «Ansəyat
Məššina a kawan-akfu; əgməyat, ad təgrəwam.
Kawkawat təsəhərt a dawan-tannalam; aḡrat-tu,
a dawan-akkawan.

¹⁰ Awalla i onsayan ad itəwəkfu; i igmayan, ad
igrəw, i iḡran deḡ Məššina, a das-akkawan.

¹¹ Məni daḡ-wan wa daḡ z'igməy barar-net
isan, akf-ay taššolt?

¹² Wala igməy daḡ-as təkəkit akf-ay
təzardəmt?

¹³ Kud kawanay an nəllubas təssânam
tehakkay n awa olaḡan i bararan-nawan,

manəmmək as kawan-wər-z-akfu Abba-nawan wa ihan ijənnawan Infas wa Zəddigan as das-tu-tonsayam?»

Iyyat təmazaq əd Farisaytan

Tarna ən Məşşina meɣ tarna n Iblis

¹⁴ Dəffər awen ikkas Ƴaysa daɣ aləs iyyan aggəsuf a das-igaddalan awal. Igməd-tu aggəsuf ɣas išşewal, isammaklal awen əs tamattay.

¹⁵ Mişan ad gannin wiyyad daɣ-san: «Awen Aşşaytan Baɣalzabul, wa n əmənokal ən kələsuf a t-ikfan fərregat n ikus ən kələsuf daɣ aytedan.»

¹⁶ Wiyyad deɣ arân ad t-ajjarraban, gammayan daɣ-as a dasan-agu təlməɣjujat təmosat alɣalamat a du-təfâlat Məşşina.

¹⁷ Ƴaysa ənta issân awa samadranan, adi a fəl dasan-inna: «Taɣmar kul tas əmməgaran məssawəs gar-essan, əbərəjji a za tagu, təzzar əbərəjjen ɣawnatan-net s iyyan iyyan.

¹⁸ Təgannim nak Aşşaytan Baɣalzabul a di-ikfan fərregat n ikus ən kələsuf daɣ aytedan; kud adi a igan wədi manəmmək as za tihag taɣmar-net ənta iməggar əd man-net?

¹⁹ Amaran kud nak tarna ən Baɣalzabul as takkasay kələsuf daɣ aytedan, inalkiman-nawan za ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əşşəriɣa.

²⁰ Kud amaran nak tarna ən Məşşina as takkasay kələsuf, daɣ adi Taɣmar ta n Məşşina tos-iwan-du.

²¹ Aləs n əməqquerəd otâban fəl təzoli, ogâz ehan-net, wədi təla-net wər tat-in-ikka wala.

²² Mišan as t-id-ibag iyyan a t-ogaran assahat, orn-ay; a daḡ-as ibəz təzoli-net ta fəl iffəlla, irkəb daḡ-as təla-net, uzan-tat.

²³ Wa dər-i wər nəddew, azangaw-nin a imos; wa di-wər-nəllil deḡ s əšidəw, wədi əzəwwəziwəz a itaggu.»

Tewaylay ən kələsuf

²⁴ «As igmad aggəsuf awedan, ad irəs aggəsuf wen idaggan əqqurnen, igammay id imal, iqqim wər t-igrew, ad annu daḡ man-net: "Nak a za, ad əqqələḡ ehan-in wa d-əgmada."

²⁵ As t-id-iqqal, a t-id-asu ifrâd, immotag.

²⁶ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəḡan-tu. Tagu taḡara n awedan wen aḡsud ogaran was kala tu-təga.»

Əbbələl wa n tidət

²⁷ İšsewal Ƴaysa den da as tədkal təntut iyyat əməsli-net, tənn-as: «Təbbilal təntut ta kay-terawat, əd fəfan win tənkasay.»

²⁸ Mišan inn-as Ƴaysa: «Aytedan win ogarnen əbbələl da əssəsammen y awal ən Məššina, tamazalan awa inna.»

Alyalamat ta n Yunəs

²⁹ As inay Ƴaysa aytedan tiddawan fall-as, inn-asan: «Aytedan n azzaman win, inəllubas; gammayan təlməḡjujat! Kala! Təlməḡjujat ta dasan-tətawaggat iyyadda ḡas, a tat-imosan ta n ənnəbi Yunəs.

³⁰ Əmmək was kala ad iqqal Yunəs alyalamat y aytedan n əḡrəm ən Ninif, əmmək en da as

z'əqqəla nak Ag Aggadəm alxalamat y aytedan n azzaman win.

³¹ Əzəl wa n tabadday, a du-tənkər təmənokalt tas kala təxkam fall akal n agala igân esəm Şeba, taggayyat fəl aytedan n azzaman win, təzzəbəz-tan y əşşərixa fəlas d ad iraz amaḍal a du-təgmad fəl ad təssəsəm y awal ən təla n əgərri wa itaggu əmənokal Suliman. Əssənət za as, wa illan da əmərədda, oğar ənnəbi Suliman mişan tugayam s a das-təssəsəmam.

³² Əzəl wa n tabadday, ad d-ənkəran aytedan n əxrəm wa n Ninif, əzzəbəzan aytedan n azzaman win y əşşərixa fəlas tətubt a əgan əzəl wa dasan-iga Yunəs təlxutbat, imal-asan awal ən Məşşina. Əssənət za as, wa illan da əmərədda, oğar Yunəs mişan tugayam əs tətubt.

Ənnur əd şıyyay

³³ Wər t-illa awedan isaryin fətəla təzzar ixbər-tat, madey ag-et daw əxəzu, kalar əsəwər a tat-itaggu edag ihhoken fəl ad ənəyan aytedan win du-taggaznen ehan s ənnur-net.

³⁴ Şat, şilat ən fətəla a təmos i təxəssa-nak. As imos as şat-nak təhannay s əlluş, wədi təxəssa-nak ketnet təha ənnur; mişan as imos as şat-nak wər təhənnəy s əlluş, wədi təxəssa-nak ketnet təha şıyyay.

³⁵ Daş adi agu ənnəyat əd man-nak, ənnur wa kay ihan a tu-wər-alsinat şıyyay.

³⁶ Amaran kud təxəssa-nak ketnet təha ənnur, wər tat-iha adag ihân şıyyay; wədi ad təmələwləw ketnet, zun təheş edag təsimalawlaw fətəla.»

Təlmənufəqa ən Farisaytan əd musanan n Ettawret

³⁷ İxrad Yaysa awal xas igmay daɣ-as Farisay iyyan a xur-əs ammansaw. Os-in Yaysa ehan ən Farisay wen, iggaz edag wa daɣ əskaran mensewan, isayxamar, ad itattu.

³⁸ Isammaklal əs Farisay en awas issənta Yaysa tettay wər išşorad ifassan-net awa tənna alxadat-nasan.

³⁹ Təzzar inn-as Əməli Yaysa: «Kawanay Farisaytan, təzazdagam afalla n əsəlkəw d əxəzu, as iga awen, ammas ən wallan-nawan wər ədnayan ar tarkəbt əd talbast.

⁴⁰ Aljahilan! Wərgex wa d-igan afalla ən təxəssa, ənta a d-igan ammas-net da?

⁴¹ Daɣ adi əkətat i təlaqqawen awa ihan ikassan-nawan, əddi arat kul a dawan-izdag.

⁴² İket alxazab iqqâl-awan ya Farisaytan, fəlas təhakkam awa imosan təməssədək-nawan daɣ ənnixnaɣ d əzzənəfan ən yelatan kul win fərgan, as iga awen, tətamazrayam əşşərixa ən Məşşina əd tara-net, s əntanay əs kawan-iwar ləkkum y-asan, da wər din-təglemam win hadatnen!

⁴³ İket alxazab iqqâl-awan kawanay Farisaytan, fəlas tərâm təximit daɣ adag wa ilan almaqam daɣ nan n əlxibada ən Kəl-Əlyəhud, d a kawan-saslaman aytedan daɣ sammanayan.

⁴⁴ İket alxazab iqqâl-awan, fəlas tolâm əd zəkwan wər nəmmun, fəl itijəwənkit awedan wər issen, samadasan-tu.»

⁴⁵ Inna iyyan daɣ musanan n Ettawret i Yaysa: «Əşşex, daɣ awa tənney əddi, nakkanay da, təgex-ana arak batu.»

⁴⁶ Inn-as Ƴaysa: «Iket alɣazab iqqâl-awan kawanay da, imusanan n Ƴttawret, fêlas têsawaram aytedan êzuk as izzêwat aggay-net; kawanay amaran wêr tu-za-têdêsam ês wala idêdwan-nawan.

⁴⁷ Iket alɣazab iqqâl-awan fêlas têkarrasam izêkwan hossaynen y ênnêbitan as imarawan-nawan a tan-ênɣanen.

⁴⁸ Êmmêk wêdi as teggiiyyem fêl awa êgan, têrdam sêr-ês fêlas êntanay za ênɣan-tan, kawanay amaran têkrasam izêkwan-nasan.

⁴⁹ Awen daɣ a fêl inna Mêššina daɣ masnat-net wêr nêla têzêrêst: "A sêr-san zêmmizêlay ênnêbitan êd nêmmuzal, ad agin iman ên wiyyad daɣ-san, zêɣɣêzzêban win hadatnen."

⁵⁰ Adi as, aytedan n azzaman win, êhân-tan man n ênnêbitan kul win tanwanɣanen, wa n ênêtti n êddênet har azalada.

⁵¹ Awalla, illikan as, aytedan n azzaman win, êhân-tan man n aytedan di kul, a d-ibazan ɣur man win Habila har win Zakarayya, wa ênɣan daɣ Ahan wa Zêwwêran n Êlɣibada, gêr majmar wa zêwwêran n êsêqqêd ên têkutawen d adag wa zêddigan.

⁵² Iket alɣazab iqqâl-awan ya imusanan n Ƴttawret, fêlas têharam tarrayt ta têtawayat awedan ês masnat ên Mêššina; kawanay iman-nawan wêr-tat-têggezam, têgdalam deɣ iguz-net i win t-êranen.»

⁵³ As ifal Ƴaysa ehan wen, êssintan musanan n Ƴttawret êd Farisaytan daɣ êddêguz-net wêllen, taggin-as isêstanan aggotnen,

⁵⁴ day gammayan a tu-sassannin arat a tan-z-akfin tarrayt əs xəxtəst-net.

12

Əsəmmutəg

A kay-wər-təggəz tasa n əzəgzan əs Yaysa

¹ As itaggu awen təddew tamattay təkənāt igət fəl Yaysa, har əqqıman aytedan tinəməkukulan. İşşewal Yaysa, azzar əs nəttulab-net, inn-asan: «Ənkədat i xamira wa n Farisaytan a t-imosan təlmənufəqa.

² Arat kul wa ixbaran ad itəwəsənəfiləl, amaran əssir kul ad affaggu.

³ Day adi, a tənnam day šiyyay, ad itəwəslu ezal a mallan. A təsammataktakam deş day ammas ən nan-nawan, ad attamal fəl fallatan-nasan.

⁴ Kawanay imidawan-in, ənney-awan: Ad wər tiksadam aggadəm əs fərregat-net wər t-okay ikus ən man day təxəssa.

⁵ A dawan-əmələş wa za tiksadam: Iksadat Məşşina a inaqqin, ila deş tarna n a kawan-igər day Jahannama. Awalla, ənney-awan ənta en da as kawan-iwar a tu-tiksadam.

⁶ Wərgəş səmmos gədad a din-nazzinen sanatat təfelen? Dər iga awen da za, wər tan-ihə i din-itataw Məşşina.

⁷ Kawanay amaran wala anzadan ən şafawan-nawan da kul əddunan. Day adi ad wər tiksadam wala, togaram igədad aggotnen əlqimat.

⁸ Ənney-awan, awedan kul wa iggəyyen dat aytedan as nak Ag Aggadəm a t-ilan, nak da, ad

əggəyyeḡ dat angalosan ən Məššina as nak a t-ilan.

⁹ Mišan wa di-inkuran dat aytedan, wədi nak da ad t-unkarax dat angalosan ən Məššina.

¹⁰ Awedan deḡ wa di-ibyakan nak Ag Aggadəm, ifrâḡ ad igrəw təsureft; mišan awedan wa ikkasan tarna y Infas wa Zəddigan, wədi wər z'igrəw təsureft.

¹¹ As təmməwayam əs nan n əlyibada win Kəl-Əlyəhud, madeḡ əs mənokalan madeḡ əs muzaran y ad tətəwəšrəḡam; a kawan-wər-iššəwəš əmmək was za təkəkəsam iman-nawan, wala awa za tannim,

¹² Infas wa Zəddigan a kawan-z-issusənan daḡ assaxat tədi da awas inahagga a tu-tannim.»

Əlmital n əməggərgəs wa wər nəla əgərri

¹³ Inna-du awedan iyyan i Ƴaysa daḡ ammas ən tamattay: «Əššəx, annu y əmaq qar-in a dər-i uzan təkəsit-nana.»

¹⁴ Inn-as Ƴaysa: «Aləs, ma di-igan əlqalinawan, wala tuzanaḡ-awan təkəsit?»

¹⁵ Təzzar inna Ƴaysa i tamattay: «He kawanay! Agəzat iman-nawan daḡ a imosan əwwəli fəlas kud iggərgas awedan, da təməddurt-net wər təqqən daḡ ərrəzəḡ-net.»

¹⁶ Təzzar ig-asan əlmital wa, inna: «Šiwəgas n əməggərgəs iyyan a əganen igi olâḡan.

¹⁷ Ad isamadran gar-es əd man-net, igannu: "Awak ma z'agax? Nak ab'as ələḡ edag a daḡ əgəḡ attayam-in."

¹⁸ Təzzar inna: "Əssanaḡ awa z'aga. Ad arzaḡ šidangawen-in, əkrəsax šin tanat-ogarnen,

əşşidəwax daχ-asnat attaxam-in kul d awa ələχ."

¹⁹ Amaran annax i man-in: "Ya mandam, tələχ ərrəzəχ aggen a dak-igân elan aggotnen, sanfu, tatša, tašwa, tannaflaya."

²⁰ Mišan inn-as Məşşina: "Ameskel! Ahad a da a kay-z-əgmədan man-nak. Ma z'igrəwan awa təşşedawax?"

²¹ Awen daχ a igarrawan awedan wa išadawan əddənet fəl man-net amaran wər išşedaw wala daχ talxa ta gar-es əd Məşşina."»

Iba n aššawaša

²² Dəffər awen inna Ƴaysa i nəttulab-net: «Awen da fəl dawan-ənnəχ: A kawan-wər-təşşəwəš təməddurt gər awa za tatšim, wala awa za talsim,

²³ fəlas iman-nawan ogaran imensewan almaqam, taχəssa-nawan deχ togar isəlsa almaqam.

²⁴ Ənzərat daχ əχrutan, wərmad nabbalan za wər tiləyan, wərmad əlân isəχbar za wala šidangawen mišan issodar-tan Məşşina. Tofâmtan za s aggen.

²⁵ Məni daχ-wan wa ifragan s aššawaša-net əšitəy ən təχrəst-net əs wala ellaf ən šat?

²⁶ Dad zama as wər təfregam igi n a oğdân d awa təmmədrəyt, ma fel as kawan išşəwaš awa hadan?

²⁷ Ənzərat daχ əmmək was du-daggalnət təjigawen: wərmad šaqqalnət wala zattinat isəlsa, mišan ənnəχ-awan wala Əmənokal Suli-man harkid təgərgist-net kul wər kala ad ewad wala iyyadda daχ-asnat šihussay ən talassay.

28 Dad isalsu Məşşina yel əs tēməwit tədi, s azalada ibdâd, tufat ad itəwəsəryu daɣ təjəngərert; manəmmək as kawan-wər-z-assalsu, kəl əzəgzan əndərran!

29 Daɣ adi a kawan-wər-ədgəzan medranan n awa za tatšim, wala awa za tašwim, wala deɣ iššəwəšan-kawan.

30-31 Aratan win di kul aytedan win wər nəssen Məşşina, a ozalnen daɣ agamay-nasan. Mišan kawanay, ədgəzat daɣ agamay ən Taymar ta n Məşşina. Aratan win di kul a kawan-tawakfin əntanay da, fəlas Abba-nawan issân as təddiraram sər-san.

32 Təsəgərt n ayfad-in a kamət-wər-təggəz tasa, fəlas Abba-nakmat igrâz-as wəllen a kamət-akfu taymar-net.

33 Zanzat-in awa təlam, təkətam-tu i təlaqqawen, tagim i man-nawan fartamanitan wər nətəməndu, təššidəwam daɣ jənnawan ərrəzəɣ wa wər nəxərrəd, wər mad t-in-z-ihazan baydagan wala deɣ təɣšəd-tu tamaday.

34 Edag wa təggəz təgərgist-nawan, ənta a z'əggəzan wallan-nawan.»

Assa n Ag Aggadəm

35 «Eqqələt aytedan otâbnen, əs əryânat fətələten-nasan.

36 Talim d eklan əqqâlnen y ad d-ifəl məşşissan takrəst fəl a sər-əs in-əbdədan da da ad d-izzəkkat daɣ əmi n ahan.

37 Əbbilalan eklan win d-ogaz məşşissan okâyan. Silakanay-awan as, ad atəb ənta iman-net, isəxximen, isəmmənsəw-tan.

38 Gər z'iqqâl-du adawannay n ahad wala deḡ ammas n ahad, eklan win d-ogaz məššissan okâyan əbbilalan.

39 Wərgəḡ kawanay iman-nawan təssânam as, ənnâr issân məššis n aḡaywan amazay wa daḡ du-z-idəl abaydag, akəy isəmmutəḡ y a das-igdəl terazay n ahan-net?

40 Səmmutəḡat za kawanay da, fəlas nak Ag Aggadəm ad d-asa daḡ assaḡat tas wər tordem a daḡ-as d-asa.»

41 Təzzar inn-as Butros: «Əməli, nakkanay ḡas a fəl təgəḡ tangalt tədi, meḡ aytedan kul?»

42 İjjəwwab-as əməli Ḡaysa inn-as: «Əməššaḡal wa iḡdalan ila deḡ əḡərri ənta a isannafran məššis izzuzər-tu i məššaḡalan-net win hadatnen fəl a tan-ihakku idəgran-nasan daḡ sudar daḡ alwaq wa igmadan y awen.

43 İbbilal əkli wen as d-iqqal məššis, ogaz-t-id iha əššəḡəl wa daq q-id-oyya den.

44 Əḡḡəyyeḡ əsilakanəḡ-awan as, ad t-izzuzər məššis i təla-net kul.

45 Mišan ənnar inna əkli wədi daḡ man-net: "Məšši illolat-in," təzzar ad iggat imaššaḡalan əd təməššaḡalen win hadatnen, itattu, issasu esmad har ammaswad,

46 akli wədi, ilkâm a t-id-iḡdər məššis daḡ əzəl d amazay wər orda, təzzar ad t-iggât har t-iksən, ag-ay dad tawaggin aytedan win wər nəḡdel.

47 Amaran akli wa issanan awa ira məššis, iqqim wər t-iga madeḡ wər iga ənnəyat n igi-net, a das-təwəgginat təwit aggotnen.

48 Mišan akli wa wər nəssen awa ira məššis, amaran iga arat ihoran d əwəddəb, a das-təwəgginat təwit wər nəggət. Awedan igrawan a aggen, a daḡ-as itəwəgməy a aggen. I itawasaylafan a aggen, a daḡ-as itəwəgməy a ogaran awa itawasaylaf.»

Ənəməzray d əššəriḡa wa d-izayan

49 Dəffər awen inna Ƴaysa: «Oseḡ-du fəl ad assarḡa temsay daḡ əddənət. Sidaranay ad imos as tərḡâ.

50 Amaran ilkâm daḡ-i ətəwəsəlmaḡ, s iket wər t-əgeḡ əknan-i man-in əddəguz.

51 Tordâm as, assa a d-əgeḡ fəl a d-awəyay alxer s əddənət? Kala kala, ənəməzray a sər-əs d-ewaya.

52 Id a ibazan ḡur əmərədda, səmmos aytedan n ahan iyyanda ad nəməzrəyan, əwaran karad aganna fəl əššin, əššin deḡ əwəran aganna fəl karad.

53 Ad inəməzrəy aləs əd barar-net, barar deḡ inəməzrəy d abba-net, tənəməzrəy təntut əd tabarart-net, tabarart deḡ tənəməzrəy d anna-net, tənəməzrəy tədaggalt əd təntut ən barar-net, tənəməzrəy deḡ təntut əd tədaggalt-net.»

54 Inna Ƴaysa deḡ i tamattay: «Wərgəḡ as tənəyam tagarak as du-təgmad daḡ ataram ad tannim əddi da: "Akonak izay-du." Təzzar agu adi da.

55 As tənəyam deḡ əhud as d-igar, ad tannim: "Ad tagu tuksay." Təzzar agu adi da.

56 Əlmunafıqan, təssânam emel n alḡalamaten šin əganen fəl amaḡal əd šin əganen daḡ

jønnawan, mišan adis wər tægrem azzaman win fall-awan əganen da?

⁵⁷ Mafel za wər tægrem kawanay iman-nawan awa oƷadan?

⁵⁸ Masalan as kay-iƷra awedan s adag n əššəriƷa, təgməya təməwit əs tənamaknam daƷ tarrayt. As wər təgeƷ adi, a kay-ilwəy har kay-issəbdəd dat əlqali. Əlqali amaran a kay-agu daƷ fassan ən soji wa kay-z-iƷəran daƷ kasaw.

⁵⁹ Əsilakanax-ak âs: Wər du-za-təgməda iket wər tərzema. Wala tamma iyyadda wər din-za-taqqam.»

13

Addararat əs tətubt

¹ Harwada iššewal Ʒaysa as d-ənkaran aytedan əllanen den, əssoƷalan-as isalan ən meddan wiyyad ən Galilaya as isisaga ənaxkim Bilatəs iman-nasan alwaq a daƷ taggin šikutawen daƷ Ahan wa Zəwwəran n ƏlƷibada daƷ Yerusalam.

² Inn-asan Ʒaysa: «Awak tordâm as, Kəl-Galilaya win di ogaran Kəl-Galilaya kul win hadatnen tišit ən nəsbakkadan fəl as əgan arak təmattant tədi?

³ ƏnneƷ-awan, kala! Amaran kawanay da, as wər tətubam, ad təhləkam ketnawan.

⁴ Ma tənnam za s aytedan win maraw d əttam win fəl ibarajjat suru was itawannu Silowam daƷ əƷrəm ən Yerusalam, inƷ-en? Tordâm as, ogaran Kəl-Yerusalam kul win hadatnen tišit ən nəsbakkadan?

⁵ Ænneḡ-awan, kala! Amaran, kawanay da, as wər tətubam, ad təhləkam ketnawan.»

⁶ Ig-asan Ƴaysa tangalt iyyat, inn-asan: «Kala inbal aləs iyyan ašək as itawannu fig daḡ afaragnet n alḡanab. As təga tamert n ara-net, os-ay-du y ad d-inkəd aratan-net, mišan wər daḡ-as igrew wala.

⁷ Təzzar inna y amaššaxal wa innəttafan d afarag: "Ænəy! Æmərədda karad elan a əgeḡ tasa-du, gammaya-du aratan n ašək wa, mišan wər kala daḡ-as əgrawa wala. Daḡ adi əxtəs-t-in! Ma ikannu daḡ amaḡal wər t-idu-təgəmməd tənfa."

⁸ Inn-as amaššaxal wen: "Məšši, are daḡ-ak a tu-tayya tenewa da ḡas, ad əḡəzax amaḡal wa t-iḡlayan, ənḡəla daḡ-as tamaqqost.

⁹ Iha mijas awatay wa d-izayan ad arəw, as wər erew, təssəxtəsaq-q-in."»

Təməzzəyt ən təntut iyyat daḡ əzəl ən təsanfawt

¹⁰ Əzəl iyyan ən təsanfawt isasaḡru Ƴaysa daḡ ahan n əlḡibada ən Kəl-Əlyəhud.

¹¹ Təlla təntut iyyat den təlât maraw elan d əttam issirantat aggəsuf, imos əruru-net təganzay, wər təfreg aqqad ən tabadday-net.

¹² As tat-inay Ƴaysa, iḡr-et-du, təzzar inn-as: «Təntut, təwərna-nam təzzayax daḡ-as!»

¹³ Issəwar-tat ifassan-net, toḡad tebadday-net alwaq wen da, ad təmmâl Məššina.

¹⁴ Mišan iggaz alham əmuzar n ahan n əlḡibada wen fəlas izzozay Ƴaysa awedan daḡ əzəl ən təsanfawt, inna əmuzar en i tamatay: «Wərgəḡ sədis adan as imməkkan a

daḡ-san itəwəggu əššəxəl? Asiwat-du daḡ-san təgməyam təməzzəyt, wərgex əzəl wa n təsanfawt!»

¹⁵ Inn-as Ƴaysa: «Əlmunafıqan, məni daḡ-wan wa wər nətəkkəs tewaxnay y azgar-net madeḡ itrəg ajad-net daḡ əzəl wa n təsanfawt y a t-id-aššašəw?

¹⁶ Tahayawt n ənnəbi Ibrahim ta amaran, ikrād Iblis a ilân maraw elan d əttam, adis wər imməkkan ad tətəwəzuzəy daḡ əzəl ən təsanfawt?»

¹⁷ As inna Ƴaysa awen, təbaz təkarakit aytedan kul win nəmməzray-net, aytedan sa hadan amaran, ketnasan sidawen-tan mazalan əknanen šihussay win itaggu.

Əlmital n amasa n annabat igân esəm mutard əd wa n xamira

¹⁸ Inna Ƴaysa: «Ma dər tola Taymar ta n Məššina? Mas tat-z-ammattala?

¹⁹ Tolâ d amasa n annabat igân esəm mutard, idkal awedan inbal-tu daḡ afarag-net, idwal, iqqal ašək, ad taggin gəḡad šisəllula daḡ zəlannet.»

²⁰ Inn-asan Ƴaysa deḡ: «Mas z'ammattala Taymar ta n Məššina?

²¹ Tola əd xamira tərway təntut əd karad annafaxaten n agel n alkama har ikuf agel ketnet.»

Tarrayt ta n Taymar ta n Məššina

Iguz ən Taymar ta n Məššina

²² Iгла Ƴaysa, illil iḡərman əd təḡarmaten, isassaxru aytedan, idâg sa sər Yerusalam.

23 Inn-as awedan iyyan: «Ɛməli, awak aytedan wər nəggət ƣas a z'assafsu Məššina?» Təzzar inna Ƴaysa i tamattay:

24 «Imi ən Taƣmar ta n Məššina i kəruzan, daƣ adi ballanat təgməyam d iguz-net. Ɛnneƣ-awan aytedan aggotnen a z'əgməynen d iguz-net, mišan a dasan-indər.

25 As ijwar məššis n aƣaywan iƣfal-in fəl man-net təsəhərt n ahan, kawanay təbdâdam dat-əs, ad təggəzam šin əkukəw, təgannim: "Mandam, aləm-anay!" Ann-awan: "Wər kawan-əzdayaƣ za wər əssena da du-təfalam."

26 Alwaq wədi a das-tannim: "Wərgəƣ nədraw dər-ək tettay əd tassay, təsisayra deƣ daƣ ƣərman-nana?"

27 Mišan a dawan-annu: "Nak wər kawan-əzdayaƣ. Ketnawan imaggan ən talbast a təmosam, ugagat-i."

28 As tənayam Ibrahim d Isəhaq əd Yaƣub d ənnəbitan kul əqqiman daƣ Taƣmar ta n Məššina, ənta kawanay iman-nawan tətawastayam daƣ-as, ad talim, ad tədaddam idədwən-nawan fəl təmagraz.

29 Ad d-əgmədan aytedan dənnəg d ataram əd tamasna d agala, təzzar nəƣimin ədrəwan iməgura daƣ Taƣmar ta n Məššina.

30 Ɛnəyat za! Aytedan win əhanen ələqqam əmərədda ad izaran, win azzarnen deƣ əmərədda ad əggəzan ələqqam.»

Igi n ənnəyat əd Herod

³¹ Alwaq wen da t-id-əhozan arat daɣ Farisaytan, ənnan-as: «Əgməd edag a, fəlas əmənokal Herod ira igi ən man-nak.»

³² Inn-asan Ƴaysa: «Aɣlat tannin y awaqqas wa igan Herod: "Takkasaɣ kələsuf daɣ aytedan, zuzəyaɣ imiranan azalada əd tufat, amaran əzəl wa n karad ad assanda əşşəxəl-in."»

³³ Dər iga awen da ya, əşşil a imos ad aɣla daɣ əşikəl-in, azalada əd tufat əd tufat ten, fəlas wər imməkkan ad iba ənnəbi daɣ adag wər nəmos Yerusalam.»

Tala ən Ƴaysa fəl Yerusalam

³⁴ Inna Ƴaysa: «Xa aytedan ən Yerusalam, iket təgam iman n ənnəbitan, tənɣam deɣ əs təɣur ən təhun win sər-wan d-izammazal Məşşina! Awak har mənəket taklaten, gammaya d a kawan-d-əşşidəwa s əmmək as du-təşadaw təkəjit ikərətan-net daw əfrutan-net, mişan tu-gayam s awen!

³⁵ Ənəyat za, Məşşina a daɣ-wan idkəl ifassan-net, iqqəl ahan-nawan əməjir. Amaran ənnəɣ-awan, wər di-za-tələsam anay iket wər d-osa əzəl wa daɣ za tannim: "Wa d-osan s esəm n Əməli, igrâw arraxmat."»

14

Əzuzəy ən Ƴaysa aləs iyyan daɣ əzəl ən Kəl-Əlyəhud wa n təsanfawt

¹ Əzəl iyyan ən təsanfawt, iggaz Ƴaysa ehan n iyyan daɣ muzaran n Farisaytan fəl a ɣur-əs atşu. Əgaran daɣ-as Farisaytan əllânen den şittawen.

² Illa aləs iyyan den as ibəyaxat alam-net ketnet, iqqîm dat Ƴaysa.

³ Issəstan Ƴaysa imusanan n Ƴttawret əd Farisaytan, inn-asan: «Awak əzuzəy n awedan daɣ əzəl wa n təsanfawt xalâl, meɣ wər xalal?»

⁴ Mišan wər daş-ənnen wala. Amaran idas Ƴaysa əmiran en, izzozay-tu, issəgl-ay.

⁵ Təzzar inn-asan: «Məni daɣ-wan was z'ihannayan barar-net madeɣ azgar-net har iqqəl daɣ anu əzəl wa n təsanfawt, aqqam wər t-id-ikkəs daɣ-as tamazayt tədi da?»

⁶ Wər əssenən a das-ənnan daɣ batuten šin iga da.

Idaggan win saymar

⁷ Igr-in Ƴaysa əsənnəfran wa əgan naftaxan idaggan win taggazan aytedan win tawasaxmarnen təzzar ig-asan ahol, inn-asan:

⁸ «As daɣ-ak igmay awedan izazlayan a das-in-təməgureɣ, ad wər təsənnəfrənax edag wa taggazan aytedan win tawasaxmarnen fəlas mijas igmây daɣ awedan iyyan a kay-ogaran almaqam a das-in-iməgurət,

⁹ təzzar as-ik-du məššis n ahan wa kawan-d-iɣran əs məgura-net, ann-ak: "Əgməd edag y aləs wa." Təbəz-kay təkarakit, takkaɣ dəffər aytedan taqqama.

¹⁰ Kalar as daɣ-ak itawagmay a din-tasax iməgura, takka dəffər aytedan taqqama. Ƴddi, as d-osa məššis n ahan, a dak-annu: "Əmidi-nin, zənkəz-du s adag ofân wədi." Akf-ik adi ətəwəsəɣmar ɣur naftaxan kul win hadatnen.

11 Fəlas awedan kul wa idkalan iman-net, ad itəwəsərəs, wa issərəsan iman-net dəx ad itəwədkəl.»

12 Dəffər awen inna Ƴaysa i Farisay was innəftax: «As du-təxarray aytedan y a tantašsatšax ezal madex ehad, a du-wər-taxra imidawan-nak, wala imədrayan-nak wala išəqqaxan-nak wala imahharagan-nak ən məggərgas, fəl a kay-du-wər-ayrin əntanay da, əzəl iyyan, ərzəman-ak awa dasan-təgeç.

13 Kalar as iqqal as təšatšax aytedan, šatšu šiləqqawen əd nəbdan əd məggudal əd məddərgal.

14 Təbbilalax as təgeç adi, fəlas əntanay wər əfregan a dak-ərzaman. İrruzmatan-nak a tantəgrəwa əzəl wa n tanakra n alxadilan.»

Elmital wa n məgura win zawwarnen

15 As isla iyyan dəx naftaxan i batu ten, inna i Ƴaysa: «İbbilal awedan wa z'atšin dəx məgura win z'aginen dəx Taxmar ta n Məššina.»

16 Inn-as Ƴaysa: «Aləs iyyan a itaggan iməgura zawwarnen, igmay dəx aytedan aggotnen a t-idasin.

17 As d-əmməgnen mensewan, izammazal akli-net y ad annu i naftaxan: "Asiwat-du, imensewan əmərədda əmmotagan."»

18 «Mišan əggazan-tu ketnasan s iyyan iyyan əd sur. Inn-as wa azzaran: "Səket əzzənza tawagost, kundaba oseq-qat ənəyaq-qat. A di-wər-təššəkax."

19 Inn-as-du iyyan: "Səket d-əzzanza maraw zəgran y agayak, amaran areç a tan-ərəma. A di-wər-təššəka."

20 Inn-as-du iyyan: "Səket əzlafa, dağ adi wər əfrega a kay-in-asax."»

21 «As d-iqqal əkli, iga i məşşis isalan kul win den. Iggaz alham labasan məşşis n aḡaywan, amaran inn-as: "Aglu tarmad, tilalax aḡrəm, tidawa-du əd tələqqawen əd nəbdan əd məddərğal əd məggudal."»

22 «As d-iqqal əkli, inna i məşşis: "Məşşi, əgeḡ awa di-tənnəḡ, mişan ehan harwa da ih-ay adag."»

23 Inn-as məşşis: "Əgməd aḡrəm, tilalax əd tarrayen əd tamawen ən fərgan, təşəhhəşşələḡ aytedan a d-asin fəl ad idnəy ahan-in.

24 Illikan as aytedan win as əzzara əgmaya daḡ-san a di-d-asin, wər tan-iha i z'irəman imensewan-in."»

Əşşərədan win əhanen ləkkum i Ƴaysa

25 Imalallay-in Ƴaysa tamattay təknaḡ igət ta dər-əs təddewat, inn-asan:

26 «Awedan wa iran a di-ilkəm, ənta wər di-iga tara togarat ta iga y abba-net, d anna-net əd tətut-net əd bararan-net əd mədrayan-net əd təmədrayen-net d ənta iman-net, wədi wər ifreg ad iqqəl anattalib-in.

27 I wər nəger iri y ad idkəl təgəttawt-net, agu imateran-net ilkəm-i, wədi wər ifreg ad iqqəl ənalkim-in.

28 Id nənna masalan ad ira iyyan daḡ-wan ad ikrəs ehan imosan suru. Wərgəḡ təḡimit a itaggu, ixsəb awa t-ikrasan təzzar, issən kud ila azrəf a t-issindan wala?

²⁹ As wər iga awen, as t-issənta akaras har t-orna əsəndi-net, a daɣ-as agin aytedan kul win t-ənaynen tamakkakkayt,

³⁰ annin: "Awedan wa, issənta akaras n ahan, orn-ay ad t-isəkkəsəw."

³¹ Madex nənna masalan, əmənokal iyyan as inkar əməgər gar-es d iyyan. Wərgex təximit a z'agu təzzar, isəmmədrən, issən kud ənta wa ilan maraw əgim n aləs, ifrâg terazay n əmənokal wa hadan ilân ənta sanatat təmərwen n əgim n aləs?

³² As inay as wər t-ifreg, harwa da iggug əmənokal wa hadan as tu-z-issuku inəmmuzal, igməy daɣ-as alxer.

³³ Kawanay da za əmmək di da, i daɣ-wan wər nəmməzzay d awa ila kul, wər ifreg ad iqqəl anattalib-in.

³⁴ Tesəmt arat olâɣan a təmos, mišan as tat-təgməd tembay-net, məni təməwit tas tat-za-tətəwəsuxəl?

³⁵ Ab-as tat-təha tənfa waliyyat y amaɖal wala deɣ tah-et tənfa i tamaqqost. Tanaxla ɣas a din-za-tətəwəggu. Wa isallin, aslet!»

15

Isalan əkkânen aytedan win əxraknen

Elmital ən tilay ta aba

¹ Osan-du nabazan n amana əd nasbakkadan kul ɣaysa y a das-əssəsəman.

² Eɣgazan Farisaytan əd musanan n Ettawret šin əgətəntən, gannin əs ɣaysa: «Awedan

wa iqbâl inasbakkadan, idarraw deŷ dər-san imensewan.»

³ Təzzar ig-asan Ƴaysa əlmital wa, inna:

⁴ «As ila iyyan daŷ-wan temeday ən tilay har daŷ-asnat təssəggal iyyadda, awak wərgəŷ ad ayyu tazayat təmərwen əd tazayat šin hadatnen ədânnat, təzzar azəl iswəd i ta təssəggalat har tat-d-igrəw?»

⁵ As tat-d-igrəw, a tat-issəwər izeran-net fəl awa iga daŷ tədəwit,

⁶ as d-iqqal aŷaywan a d-aŷru imidawan-net əd mahharagan-net, ann-asan: "Ayewat, tagim tədəwit ta əgəŷ, fəlas agaraw a d-əgəŷ tilay-nin ta təssəggalat."

⁷ Ənneŷ-awan zund əmmək di daŷ as, təfalawist ta z'agin win əhanen ijənnawan fəl tətubt n anasbakkad iyyanda, togar ta tan-za-təsəssugu tazayat təmərwen n alŷadil əd taza as ŷur iga as wər əddəraran əs tətubt.»

Tamma n əzrəf ta aba

⁸ «Madəŷ nənna masalan, təntut iyyat a təlat marawat tammaten n əzrəf har daŷ-as aba iyyat. Wərgəŷ ad tassarŷu fətəla, təfrəd ehan-net ketnet, təswəd-as s əlluŷ iket wər tat-təgrəw?»

⁹ As tat-təgrəw, a du-taŷru šimidawen-net əd tamahharagen-net, tann-asnat: "Agimat tədəwit ta əgəŷ, fəlas agaraw a d-əgəŷ tamma-nin ta daŷ-i aba."

¹⁰ Ənneŷ-awan zund əmmək di daŷ as, tətubt n anasbakkad iyyanda təsifəliwis angalosan ən Məššina.»

Barar wa ixrakan

¹¹ Inn-asan Ƴaysa deƳ: «Aləs iyyan a ilan əşšin bararan.

¹² As əzəl iyyan inna wa mədrəyan y abba-net: "Abba, akf-i adagar-in dəƳ təkəsīt." Izun-asan abba-nasan təla-net.

¹³ Arat n adan dəffər awen, inkar barar wa əndarran işšedaw awa ila kul, ikka akal iyyan iggugan. İlkam i tara ən man-net, ad iƳaşšad awa ila.

¹⁴ As inƳa awa ila kul, osa-du laz labasan akal wa iha, təzzar iggaz šin təməƳatirt.

¹⁵ Iqla, işƳal y awedan iyyan n akal en da. Issok-ay šiwəgas-net y a das-idən dəƳ-asnat iladayan-net.

¹⁶ Awa das-iga laz dəƳ iguz, isidaran tettay ən šətša win tattin ladayan, mišan wər t-illa i das-tan-ikfân.

¹⁷ Amaran isammadran dəƳ man-net, inna: "Awak wərgəƳ imaššəƳalan n abba-nin əggətan mišan ketnasan əlân a ətšan har t-id-əgləzan, ənta nak inaqq-i laz da!

¹⁸ Ad ənkəraƳ, əqqəla abba-nin, annaƳ-as: 'Abba, əmmizrayaƳ Məššina, kay dəƳ əbbodaraq-qay,

¹⁹ ab-as əhora d a di-itəwənnu barar-nak, ag-i iyyan dəƳ maššəƳalan-nak."

²⁰ Təzzar inkar iqqal abba-net. İzây-in ehan dəƳ igəg as t-ogga abba-net, təggaz-tu təhanint-net, ozal sər-əs, izalammat-tu, a das-itamallat.

²¹ Təzzar inna barar y abba-net: "Abba, əmmizrayaƳ Məššina, kay dəƳ əbbodaraq-qay, ab-as əhora d a di-itəwənnu barar-nak."

²² Mišan inna abba-net y eklan-net: "Tarmâd awəyat-du takatkat ta təhossayat,

təzzəzləgam-as-tat, tagim təsəndərt dəy adad-net, təssəsəlam-tu.

²³ Tabəzəm-du əhəri wa iddərən, təgzəməm-tu, ad natšu, nagu saksas,

²⁴ fəlas barar-in wa, šilat n as t-aba, amaran əmərədda idar-du; kala ixrak, amaran əmərədda igraw-du." Amaran əssəntan dəy saksas.

²⁵ As itaggu awen, barar-net wa n aɣafadday iha šiwəgas. As d-iqqal, ihoz-du aɣaywan, isla i səwat d awəx.

²⁶ İxra-du iyyan dəy eklan-nasan, issəstan-tu d awa itaggan den?

²⁷ Inn-as əkli: "Amadrəy-nak a d-iqqalan, igzam abba-nak əhəri wa iddərən, fəlas tewaxlay a t-id-iga barar-net wər ila malad."

²⁸ İggaz-tu alham, ugay s iguz n ahan. İqqab-du abba-net ad t-itansay.

²⁹ Eges inna y abba-net: "Wərgəx a ilan elan əşxələx-ak, wər kala əmməzrayəx tənna-nak, harkid awen, wər kala di-təkfəx wala ɣas eɣayd əgzama aga fall-as saksas nak əd midawan-in.

³⁰ Rurek amaran wa ixsadan eharay-nak dəy təkarwaten ənta, osa-du ɣas təgazamaɣ-as əhəri wa iddərən."

³¹ Inn-as abba-net: "Barar-in, kay fawda təlley xur-i, awa ələx ketnet i-nak.

³² Mišan immikkan ad naddawat nagu saksas, fəlas amadrəy-nak, šilat n as t-aba, amaran əmərədda idar-du; kala ixrak, amaran əmərədda igraw-du."»

16

Taryəmt fəl tara n əddənet

Amaşşaxal wa ilan tayttay

¹ Inna Ƴaysa i nəttulab-net: «Kala a t-illa aləs iyyan n əməgğergəs ilân amaşşaxal isinattaf d ərrəzəx-net, amaran itawann-as ixaşşat-tu.

² Təzzar isassaxr-ay-du, inn-as: "Ma imos awa fall-ak sallaḡ? Əməl-i awa təgeḡ y ərrəzəx-in, nak ab-as areḡ əşşəḡəl-nak."

³ Inna amaşşaxal wa gar-es əd man-net: "Awak əmərədda ma z'aga as di-ikkas amuzar-in daḡ əşşəḡəl? Nak, wər əfregəḡ agayak, mansay deḡ isikarakad-i.

⁴ Əssânaḡ awa z'aga as kud tawakkasa daḡ əşşəḡəl-in da, a di-əqbəlan aytedan daḡ nannasan."

⁵ Təzzar isassaxra-du aytedan win irwas aləs was işxal s iyyan iyyan. Inna i wa azzaran: "Ma kay irwas əmuzar-in?"

⁶ Inn-as: "Temeday ən tanaw ən wədi wa n azzayt." Inn-as amaşşaxal: "Ƴam, tədkəla şirawt-nak ta n əmarwas, təktəbaḡ fall-as tarmâd səmmosat təmərwen ən tanaw."

⁷ Dəffər awen inna y iyyan: "Kay za ma tətawarwasax?" Inn-as: "Temeday ən bəhu n alkama." Inn-as: "Ədkəl şirawt-nak ta n əmarwas, təktəbaḡ fall-as əttamat təmərwen."

⁸ Təmərkest ten, isl-et aləs wa işşəşxalan ark amaşşaxal wen, təzzar ad t-immâl fəl təla-net tayttay. Tidət a imos as aytedan win wər nəksud Məşşina, ogaran win t-əksudnen təla ən tayttay daḡ taḡawşiwen şin əllanen gar-essan.

⁹ Nak za ənneḡ-awan: Agiwat imidawan s ərrəzəḡan ən bannan win n əddənet ta; əddi as kawan-əḡmadan, ad tətəwəqbalam daḡ adag ən təməxsurt iylâlan.

¹⁰ Awedan wa təha təfləst daḡ arat əndərran, wa zəwwəran da təh-ay daḡ-as. Wa wər təha təfləst daḡ a əndərran, wa zəwwəran da, wər daḡ-as tu-təha.

¹¹ Daḡ adi, da kawan-wər-təha təfləst daḡ ərrəzəḡ ən bannan wa n əddənet ta, ma kawan-z-izəzzigəzan ərrəzəḡ wa n tidət, wa ihan alaxirat.

¹² Amaran kud wər kawan-təha təfləst daḡ arat wa wər təlem, ma kawan-z-akfin arat wa təlam daḡ alaxirat?

¹³ Wər t-illa amaššəḡal ifrâḡan ad išḡəl y əššin muzaran. Wa ḡas ikyad iyyan, iru wa hadan; madəḡ abbardag y iyyan, alku wa hadan. Wər təfregam ad təḡbədəm Məššina, taglim dəḡ tozâlam dəffər əddənet.»

¹⁴ Əssisaman Farisaytan y awa inna ḡaysa den kul, taggin daḡ-as tamakkakkayt fəlas imaran n əzrəf a əmosan.

¹⁵ Inn-asan ḡaysa: «Kawanay təsaknim dat aytedan as alḡadilan a təmosam, Məššina amaran issân awa ihan iwallan-nawan; fəlas arat wa əzzəzwaran aytedan, Məššina ənta tagəlfat a t-iga.»

Əttawret d Əlinjil

¹⁶ «Əttawret d Əlkəttaban win Ənnəbitan əntanay ḡas a tawasasəḡrinen har əzəl wa d-osa Yaxya wa isalməḡan aytedan daḡ aman. Əddi amaran ad əḡgazan salan win Əlinjil šin

ətəwəgga, əmosnen isalan n assa ən Taɣmar ta n Məşşina, amaran ad igamma awedan kul iguz-net s assahat əd tallabəst.

¹⁷ Dər iga awen da za, ogar tərɣasay ta iga ad iba ijənnawan d amaɗal, ta iga ad iba wala ɣas əsakkal iyyanda n Əttawret.

¹⁸ Adi a fəlas, aləs kul wa izammazzayan tantut-net, izlaf iyyat, wədi iga əzzəna. Aləs deɣ wa izlafan tantut təmmizzayat, ənta da igâ əzzəna.»

Əməgğergəs iyyan əd təlaqqay təgât Lazarəs

¹⁹ Inn-asan ɣaysa deɣ: «Kala ad t-illa aləs iyyan n əməgğergəs n amayyawan əs faw izlâg isəlsa win hossaynen, əzzəwatnen, faw deɣ inniflay issiksas.

²⁰ As itaggu awen, dat əmi n ahan-net, isrâd aləs iyyan ən təlaqqay igân Lazarəs, əs əlsânat šiqqas elam-net.

²¹ Isidaran tettay ən kərəmrəman win durattaknen daɣ mensewan n əməgğergəs en. Wala idan, tasin-t-idu tallaxan šiqqas-net.

²² Har əzəl wad aba taləqqay ten, təzzar ewayan-tu angalosan s ənnəbi Ibrahim daɣ aljannat. Əməgğergəs ənta da, aba-tu itawanbalin.

²³ Iha Jahannama, itaxazzab daɣ-as as idkal asawad-net, ogga Ibrahim daɣ igəg, illâ ɣur-əs Lazarəs.

²⁴ Ad iyarru Ibrahim, igann-as: "Ya Abba Ibrahim, hənəttət-i, təzəmmizəla-du sər-i Lazarəs y ad issəlməɣ kuddeɣ imi n adad-net daɣ aman, issəsməd-i sər-əs iləs-in, fəlas alxazab a tagga daɣ təmsay ta."

²⁵ Mišan inn-as Ibrahim: "Barar-in, Akta-du as kay təgrâwax arat kul wa tarex day təməddurt-nak, as iga awen, Lazarəs ənta wər inay ar alxazab. Amaran əmərədda ənta as tawaknan man, kay tətayazzaba.

²⁶ Wa dəffər adi as, illâ əxəxi wər nəla eder gar-ena dər-wan, fəl ad wər iru waliyyan day-na a kawan-in-akku, ifrəg adi, wala dəx ifrəg waliyyan day-wan a dana-d-akku."

²⁷ Inna əməgğəgəs: "Day adi Abba, əgmâya day-ak ad tətəmmizəla Lazarəs s aɣaywan n abba-nin,

²⁸ fəlas ələx səmmos mədrayan, y a dasan-irxəm fəl a du-wər-əgğəzan əntanay da edag n alxazab wa."

²⁹ Mišan inn-as Ibrahim: "Imədrayan-nak əttâfan əlkəttab wa n Əttawret d Əlkəttaban n ənnəbitan win hadatnen, əlkəmanet-asan."

³⁰ Inna y Ibrahim: "Kala kala Abba-nin Ibrahim, adi wər igda, mišan as tan-in-iqqal awedan a d-inkâran day nəmməttan, ad utaban."

³¹ Mišan inn-as ənnəbi Ibrahim: "As wər əssəsəman y ənnəbi Musa d ənnəbitan win hadatnen, wər z'utaban kuddeɣ ig-asan awedan a d-inkâran day nəmməttan isalan."»

17

Əsəssəɣri ən ɣaysa day batu n abakkad əd təsureft d əzəgzan

¹ Əzəl iyyan inna ɣaysa i nəttulab-net: «Wər t-illa a tu-wər-əmelan aratan as za səssuginen

aytedan ibakkadan, mišan iket alyazab ill-ay y awedan wa dasan-d-igan əssəbab.

² A das-afu ad itəwəqqən əzəzəd zəwwəran ən təhənt dəx iri-net itəwəgər-in dəx agarew, tišit n əssəbab n abakkad i wala iyyanda dəx aytedan win madrornen di.

³ Agat ənnəyat əd man-nawan!

As kay-idlam amadray-nak, tərçəməx-as. Kud imməgraz, təssurəfəx-as.

⁴ Kud imos as ig-ak əssəyat tadmən dəx əzəl, ig-ak-du əssa assatan igammay təsureft dəx əzəl wen da, da surəf-as.»

⁵ Ənnan nəmmuzal y Əməli Yaysa: «Šitu əzəgzan-nana.»

⁶ Inn-asan Əməli Yaysa: «As təlam əzəgzan ogdân əd wala imi ən təzuxay n əšənnan ad təfrəgam ad tannim y ašək wa: "Əlbəy-du iman-nak, taхта dəx agaraw en", agu awa tənnam.»

Tangalt n amaššaxal wa wər nəla maruzat

⁷ «Məni dəx-wan wa du-z-adəw akli-net iddânan madəx igayyakan, ann-as: "Ayo tarmad tammansawax!"

⁸ Wərgəx tənna a das-za-tagim: "Saŋŋ-i a ətšəx təzzar, tawəyax-i-t-id, təšxəla har atša, ašwax, dəffər adi amaran tatša tašwa kay."

⁹ Awak aləs en ad iggudəy y əkli-net fəlas iga awas t-omar?

¹⁰ Kawanay da za, as təgam arət kul was tətawamaram, tannim: "Nakkanay wər nəmos ar eklan, wər nəga ar awas danax-iwar igi-net."»

Assa n Ag Aggadəm

Agoda iga aləs iyyan n aw Samarəya i Məššina

11 Ȳur iki  n Ȳaysa Yerusalem, illam g r akal wa n Samar ya  d wa n Galilaya.

12 As d-iggaz ta r mt iyyat,  ss lk dan-as-du maraw meddan igr w k tru,  bdadan-as-in da  ig g.

13  dkalan imaslan-nasan,  nnan-as: «Ya Ȳaysa,    ex-nana, h n tt t-ana!»

14 Iswad da -san, inn-asan: «Aglat saknat iman-nawan i limaman.»  gl n  kk n ilimaman y a dasan- m lan, as  zzayan zaddogan.

15 As din-igra iyyan da -san t m zz yt ta iga den, iqqal Ȳaysa, idk l  m sli-net, imm l M   ina.

16 As t-in-osa iss jad dat- s, a das-itigud y. Al s en in akal  n Samar ya.

17 Inna Ȳaysa: «W rgex marawessan as  zzayan, zaddogan, ma  gan taza win hadat-nen?»

18 Adis w r tan-iha i d-iqq lan iggud y i M   ina ar  nafta  wa?»

19 Amaran inna Ȳaysa y al s wen: « bd d, aglu,  z gzan-nak a kay-i lasan.»

Assa  n Ta mar ta n M   ina

20 Ȳaysa, as t- ss stanan Farisaytan d alwaq wa du-za-tasu Ta mar ta n M   ina, inn-asan: «Ta mar ta n M   ina w r du-t t ggu assa il n anay.

21 W r mad z'it w nnu: " nta da", wala " nta den".  ss nat as, Ta mar ta n M   ina t lla gar-ewwan.»

Assa n Ag Aggad m

²² Døffer awen inna Ƴaysa i nöttulab-net: «Elkâman adan a day za tösaddirënam anay ën tawaylay-nin nak Ag Aggadëm, kuddey anay n ëzël iyyanda, mišan wër di-za-tënëyam.

²³ Amaran a dawan-itëwënnu: "Ënta den" madëy "Ënta da". Ad wër taglim, wala tëlkämam y awen.

²⁴ Ëbëlëzlëz a itaggu essam day jënnawan, isëmmëlëwlëw tama n amaḍal ta har ta, a dër z'alu assa-nin nak Ag Aggadëm day ëzël-in.

²⁵ Mišan dat adi, ilzâm-i nak Ag Aggadëm anay n alḳazab aggen, unkaran-i dey aytedan n azzaman win.

²⁶ Awa igan day azzaman n ënnëbi Nux, a z'agin day adan win day du-z-asa nak Ag Aggadëm.

²⁷ Azzaman win den, aytedan tattin, sassin, zallafan, zâzlafan har ëzël wa d-iggaz Nux aylal n aman, tëzzar osa-du alwabil, ihlak-kan ketnasan.

²⁸ Zun d awen da dey a igan day azzaman ën Lot. Aytedan tattin, sassin, zanzan, satagan, nabbalan, gayyakan, karrasan,

²⁹ har ëzël wad igmad Lot ayrëm ën Sëdom, tëzzar issofay-du Mëššina fël ëyrëm en adaḳas-ën-tahart ibilaglagan, ihlak aytedan-net ketnasan.

³⁰ Zun d adi da a z'agin ëzël wa du-za-tëwësëñëfilëla nak Ag Aggadëm.

³¹ Ëzël wëdi, awedan wa iqqiman day adag wa n afalla n ahan-net, amaran ëhân lalan-net ehan-net, a du-wër-azzabbat y a tan-in-idkël. Wa ihan tawagost-net dey, ad wër iqqël aḳaywan.

³² Aktiwat-du awa igrawan taḳur Lot.

³³ Id awedan wa wər nəgəmməy ar aggaz ən man-net daɣ əddənet ta, ad affatu daɣ alaxirat; mišan wa isaffatan iman-net daɣ əddənet ta, ad iɣləs.

³⁴ Ənnəɣ-awan ahad wədi, ad ənsân əššin aytedan daɣ tessat iyyadda, ammadkal iyyan, itəwəyyad-du wa hadan.

³⁵ Ad taddinat sanatat tədoden daɣ adag iyyanda, tammadkal iyyat, tətəwəyyad-du ta hadat.

³⁶ Ad əhân əššin meddan tawagost iyyadda, ammadkal iyyan, itəwəyyad-du wa hadan.»

³⁷ Əssəstənan nəttulab Ƴaysa ənnan-as: «Əməli, wədi arat mənid z'agu?» Inn-asan: «Edag təggaz təmaxsayt, a daɣ-as iddawan jadaran.»

18

Əlmital n əmaşray əd təntut as wər idder aləs-net

¹ Iga Ƴaysa i nəttulab-net əlmital iyyan a daɣ ira a tan-issusən as, ihor ad tansayan Məššina faw, a daɣ-as wər əkkəsan attama.

² Inn-asan: «Aɣrəm iyyan a iha əmaşray wər nəksud Məššina, wər issəɣmar deɣ awedan waliyyan.

³ Amaran aɣrəm en, təh-ay təntut as wər idder aləs-net a du-tətasit əmaşray en, təgann-as: "Akf-i alxaq-in daɣ amakkarad-in."

⁴ As iga tamert itugəy-as, inna gar-es əd man-net: "Kud wər əksudaɣ Məššina, wala əssiɣmaray awedan waliyyan,

⁵ da tantut ta, tɛdgaz-i. A tat-akfa alxaq-net fəl a daɣ-as əgrəwax iman-in."»

⁶ Təzzar inna Əməli Ƴaysa: «Təsallam y awa inna arak amaşrax wa?»

⁷ Tordâm as Məşşina wər z'akfu aytedan win isannafran alxaq-nasan, tu-tansaynen hallan ehad ezal? Tordâm as a fall-asan-in isahhagu tadhəlt-net?

⁸ Ənney-awan, a tan-akfu alxaq-nasan tarmad. Mişan harkid adi, əzəl wa du-z-əqqəla nak Ag Aggadəm, awak a d-agəzax daɣ əddənət aytedan əzzigzannen?»

Tilwat n əlyillas

Əlmital wa iga Ƴaysa fəl Farisay d ənabaz n amana

⁹ Dəffər awen, iga Ƴaysa əlmital y aytedan əttâfnen iman-nasan daɣ tişit n alɣadılan, as iga awen olkân aytedan, inn-asan:

¹⁰ «Kala ad əggəzzayan meddan əşşin s Ahan wa Zəwwəran n Əlɣibada fəl ad agin šiwatriwen. Iyyan Farisay, wa hadan anabaz n amana.

¹¹ Farisay za, ibdad ad itattar, igannu daɣ man-net: "Ya Məşşina, əgğodayax-ak as wər oley d aytedan win hadatnen əmosnen inarkaban əd nəmməzray əd maggan n əzzəna, wala deɣ oley d anabaz n amana wa.

¹² Əssa adan kul, tuzama daɣ-san əşşin. Takkasax təməssədək daɣ awa garrawa kul."

¹³ Mişan anabaz n amana ənta, ibdad-in daɣ igəg, wər ihel wala adakal n asawad-net sa sər

jənnawan, iggât idmaran-net fəl awa əgan man-net dağ əğšud, igannu: "Ya Məşšina təggəzet-kay təhanint-in nak n anasbakkad."

¹⁴ Ənnəx-awan, anabaz n amawan wa, iqqal ehan-net igrâw taqqat dat Məşšina, mišan Farisay wen ənta wər igrew taqqat dat Məşšina; fəlas i idkalan iman-net, ad t-issərəs Məşšina, i issərasan iman-net ad t-idkəl Məşšina.»

Təwatray ən Ƴaysa i bararan

¹⁵ Harkid bararan win janɣayan tawayan-tandu aytedan əs Ƴaysa fəl a tan-issəwər ifassan-net, ittər-asan. Ənayan nəttulab-net awen, əşşewalan fəl aytedan win den.

¹⁶ Mišan iyr-en-du Ƴaysa əs man-net, inna i nəttulab-net: «Ayyat bararan a di-d-akkin, a tan-in-wər-təwəɣam; Taɣmar ta n Məşšina, šin aytedan win šilaten-nasan.

¹⁷ Əggəyex silakanax-awan as, awedan wər nəga i Taɣmar ta n Məşšina əlqəbulat šilat ən ta das-iga barar, wədi wər das-ilkem a tat-iggaz.»

Əddənet meɣ alaxirat

¹⁸ Issəstan əmuzar iyyan ən Kəl-Əlyəhud Ƴaysa, inn-as: «Əşşex olâɣan, mas di-iwar igi-net y ad əgrəwa təməddurt ta təɣlalət?»

¹⁹ Inn-as Ƴaysa: «Mafel as di-təganna Əşşex olayan? Wər t-illa i olâɣan ar Məşšina.

²⁰ Təssânaɣ alwajiban-net: Ad wər tagax əzzəna, ad wər tagax iman, ad wər takəra, ad wər tagax təgəyya ən bahu, səxmər abba-nak d anna-nak.»

²¹ Inn-as aləs wen: «Aratan win di kul harwa da mədrəya as tan-əssəbdada.»

²² As isla Ƴaysa y awen, inn-as: «Arat iyyanda a dak-in-iqqıman əmərədda: Aglu zanz-in awa tələx kul, tuzanay inazzan-net i tələqqawen ad təgrəwəx ərrəzəx a dak-z-ansin dəx alaxirat. Dəffər adi amaran tagla-du təlkəməx-i.»

²³ As isla y awen, əxşadan man-net wəllen fəlas təgərgist tagget a iga.

²⁴ As inay Ƴaysa as, əxşadan man n aləs en wəllen, inna: «İket əzzəwi ig-ay iguz ən Taymar ta n Məşşina fəl win əggərgasnen.

²⁵ Ogar tərhasay ta iga fəl ałam aradaş dəx təbuday n ənazməy, i ta iga fəl əməgğərgəs iguz ən Taymar ta n Məşşina.»

²⁶ Təzzar ənnan-as aytedan win das-əssəsəmnen: «Adi za ma ifragan ad ixləs dəx təmsay?»

²⁷ Inn-asan Ƴaysa: «Awa imosan muxal xur aytedan, Məşşina ifrâk-ku.»

²⁸ Inn-as Butros: «Nakkanay za, a oyyanen awa nəla kul, nəlkam-ak?»

²⁹ Inn-asan Ƴaysa: «Əggəyex əsilakanax-awan as, wər t-illa i din-z-ayyin ehan-net madeş tantut-net, madeş imədrayan-net, madeş imarwan-net madeş bararan-net fəl əddəlil ən Taymar ta n Məşşina,

³⁰ əs wərgex ad igrəw inədfusan-nasan dəx harwa əmərədda, igrəw dəx təməddurt ta təxlalat dəx azzaman win əlkəmnen.»

İhəz n alxazab wa z'inəy Ƴaysa

³¹ İkkas Ƴaysa inəttulab-net win maraw d əşşin dəx aytedan, inn-asan: «Səsəmat: nakkanay da əggəzzaynen əs Yerusalam da,

amaran den da ad z'andu arat kul wa əktaban ənnəbitan daɣ salan-in nak Ag Aggadəm.

³² Ad tawagga daɣ fassan n aytedan wər nəmos Kəl-Əlyəhud, agin daɣ-i tamakkakkayt, agin-i šisəssəlka, əssutəfan fall-i,

³³ ayyawanan-i šiwwit, agin iman-in, təzzar ənkara-du daɣ təmattant əzəl wa n karad.»

³⁴ Mišan wər t-illa a əgrân nəttulab-net daɣ awa inna den, ittinkal-asan almaɣna-net, wər əgren awa daɣ dasan-iššewal.

Əzuzəy ən Ƴaysa əmədderyəl iyyan

³⁵ As d-ihoz Ƴaysa aɣrəm wa n Yerikaw, okay fəl əmədderyəl iyyan iqqiman fəl afay ən tarrayt, itansay.

³⁶ As isla əmədderyəl i tamattay ta fall-as tətakayat da, issəstan d awa imos awen.

³⁷ Itawann-as: «Ƴaysa wa n əɣrəm ən Nazaret a itakayan.»

³⁸ Amaran idkal əməsli-net, igannu: «Ya Ƴaysa wa n Ag ənnəbi Dawəd, hənəttət-i!»

³⁹ Sannaryaman-as aytedan win azzarnen y ad affastu, mišan idkal əməsli-net wəllen, igannu: «Ya Ag Dawəd, hənəttət-i!»

⁴⁰ Təzzar izzəkkat Ƴaysa, omar s a das-d-attalway. As t-id-osa, issəstan-tu, inn-as:

⁴¹ «Mas tareɣ a dak-k-aga?» Inn-as əmədderyəl: «Əməli, a əreɣ a di-d-iqqəl asawad-nin.»

⁴² Inn-as Ƴaysa: «Iqqələt-kay-du asawad-nak, əzəgzan-nak a kay-iɣlasan.»

⁴³ Iqqal-du asawad əmədderyəl tamazayt ten da, igla ilkam i Ƴaysa, immâl Məššina. Aytedan

kul win ənaynen awa igan den, əntanay da əmmâlan Məşşina.

19

Zakkəyas wa n anabaz n amana

¹ Iggaz Ƴaysa aƳrəm ən Yerikaw, okay daƳ ammas-net y ad t-irdəƳ.

² AƳrəm en ih-ay aləs igân esəm Zakkəyas imosan əmuzar ən nabazan n amana n əməgğergəs.

³ Ad igammaƳ d anay ən Ƴaysa, mişan təgdal-as-tu tamattay fəlas təgzələy a iga.

⁴ Təzzar ozal, azzar i tamattay, iftan aşək igân esəm sikamor fəl ad inəy Ƴaysa fəlas den da a du-z-akəy.

⁵ As d-ewad Ƴaysa edag wen, idkal asawad-net, inn-as: «Zakkəyas, zabbat-du tarmâd, azalada kundaba əzzəbbəy daƳ aƳaywan-nak.»

⁶ Izzəbbat-du Zakkəyas tarmâd, iqbal awen, iflawas.

⁷ As ənayan aytedan awen, gatantanan ket-nasan, gannin: «Izzəbbat Ƴur aləs n anas-bakkad.»

⁸ Amaran ibdad Zakkəyas dat Əməli Ƴaysa, inn-as: «Ya Əməli, ad akfaƳ təzunt ən təla-nin i tələqqawen, kud dəy ill-ay i daƳ ətşey arat, a das-t-əssuxələ imos əkkoz nədfusan.»

⁹ Təzzar inna Ƴaysa: «Azalada, ehan wa iggaz-t-id əlƳillas, fəlas aləs wa, ənta da ahaya n ənnəbi İbrahim a imos.

¹⁰ Nak Ag Aggadəm oseƳ-du gammayaƳ aytedan win əxraknen y a tan-əxləsa.»

Əşşəxəl ən Ƴaysa daƳ Yerusalam

Tangalt ta n tammaten

¹¹ Æssisaman aytedan y awa igannu Ƴaysa ketnet. Ig-asan Ƴaysa tangalt iyyat fəlas ihoz Yerusalām amaran əxilan alwaq wad za tənəfiləl Taɣmar ta n Məššina ewad-du.

¹² Inn-asan: «Kala ikka aləs iyyan n ag əket akal iyyan iggugan y a daɣ-as d-igrəw təmənukəla, iqqəl-du.

¹³ Dat teklay-net, iɣra-du maraw daɣ eklan-net. Akk iyyan daɣ-san ikf-ay tamma inn-asan: "Agiwat daɣ-asnat jola har d-əqqəla."

¹⁴ Amaran aləs en, wər t-əren aytedan n akal-net. As igla, əssəglan inəmmuzal s əmənokal wa zəwwəran y a das-annin: "Aləs di, wər nəra ad iqqəl əmənokal-nana."

¹⁵ Mišan igraw taɣmar, iqqal-du akal-net. Isassaɣra-du eklan-net winād ikfa tamatten da, fəl ad issən awa sər-san d-iggazan daɣ jolanasan.

¹⁶ Os-ay-du wa azzaran, inn-as: "Məšši, tamma ta di-təkfəɣ əgrawa-du fall-as marawat šiyyad."

¹⁷ Inn-as məššis: "Alafəyet! Illikan as akli olâxan a təmosa. Zamas təh-ik təfləst daɣ awa wər nəggət, adi za a kay-əzzuzəraɣ i maraw xərman."

¹⁸ Os-ay-du wa n əššin, inn-as: "Məšši, tamma ta di-təkfəɣ əgrawa-du fall-as səmmosat šiyyad."

¹⁹ Inna i wa: "Kay, ad tizarəɣ i səmmos xərman."

²⁰ Os-ay-du wa n karad, inna: "Məšši, tamma ta di-təkfəɣ ənta da. Akamas a tat-əgeɣ daɣ əlkəšifa-nin, ogazaq-qat.

²¹ Təksəda a kay-əgeç, fəlas əssânay as aləs labasan a təmosa. Tədakkalay a wər təssənsa, tətəlaya deç tawagost wər tənbelə."

²² Inn-as məşşis: "Kay, ark əkli a təmosa, awa d-igmadan imi-nak as kay-z-abəzay. Dad təssanay as əmôsay awedan labasan, idakkalan a wər issənsa, italay deç tawagost wər inbel,

²³ ma fel as wər təgeç azrəf-in daç bank, əddi as du-z-əqqəla əgrâwa fall-as təttəyt."

²⁴ Təzzar inna y aytedan win əllanən den: "Abəzat daç-as tamma ta ittaf, takfım-tat i wa ilan marawat."

²⁵ Ənnan-as: "Məşşikkana, wərgəç ilâ marawat?"

²⁶ Ijjəwwab-asan, inna: "Silakanay-awan as, wa ilan, wədi a das-itəwəşitu awa ila; amaran wa wər nəla, arat n arat wa ila da, a daç-as attarmas."

²⁷ Amaran aytedan win zənga-nin, wər nəra ad əqqəla əmənokal-nasan, awəyat-tan-du, təçzəmam-tan dat-i.»

Ihəz ən Ƴaysa Yerusalam

²⁸ As inna awen, iggaz eçaf ən nəttulab-net, iggəzzay əs Yerusalam.

²⁹ As din-ihoz təçrəmt ta n Betfajay əd ta n Betanəy, dəgma n ədçay was itawannu wa n "Eşkan ən Zaytun", izammazal əşşin daç nəttulab-net.

³⁰ Inn-asan: «Akkiwat təçrəmt ten dat-wan den. As tat-in-təggazam, ad tənəyam əhulel n əzdan iqqânən əs kala wər ittəwan. Ariwat-t-id, təlwəyam-t-idu.

³¹ As kawan-issəstan awedan, inn-awan: "Xa, ma tətəggim əddi?" Tannim-as: "Əməli a sər-əs iddəraran."»

³² Əglan nəttulab win den, ənayan arat kul s əmmək wa dəx as dasan-t-inna Ƴaysa.

³³ Târan əhulel, as dasan-ənnan məssawəs: «Xa, ma tətəggim əddi?»

³⁴ Ənnan-asan nəttulab win əşšin en: «Əməli a sər-əs iddəraran.»

³⁵ Əlwayan-t-id i Ƴaysa. Ədfaran-as fall-as isəlsa-nasan, əssəwanan-as-tu.

³⁶ Imatakway, a das-tissəwan aytedan isəlsan-ənan dəx tarrayt-net.

³⁷ As d-ewad Ƴaysa edag wa dəx təzagaday tarrayt adxax wa n Eşkan ən Zaytun, dəx ənəmiəhaz ən Yerusalam, ədkalan nalkiman-net ketnasan imaslan-nasan, əssəggadan dəx təmmalen i Məşşina dəx batu ən təlməxjujaten kul šin ənayan.

³⁸ Gannin:
«İga Məşşina albaraka y əmənokal
wa d-osan s esəm n Əməli.
Attadet alxer əd tanaya
dəx jənnawan win ədkalnen!»

³⁹ Təzzar ənnan Fərisaytan əhanen tamattay en i Ƴaysa: «Əşşex, ərxəm i nalkiman-nak!»

⁴⁰ Inn-asan Ƴaysa: «Ənnəx-awan, as əffəstan, šihun a, a za səyxərətne.»

Awa iqqalan i Yerusalam

Tala ən Ƴaysa fəl Yerusalam

⁴¹ As din-ihoz Ƴaysa axrəm ən Yerusalam, ogg-ay, iggaz fall-as šin tala;

⁴² igannu: «Ya Yerusalam, ənnar kam dâ, təssânaɣ əmmək was za təgrəwax alxer azalada; mišan wər tu-təssena, fəlas aɣabar a dam-iga.

⁴³ Əlkâman adan a daɣ kam-za-ɣəliɣələyan zənga-nam, agin-am afarag issohen n əməgər, ədgəzan-kam fəl gannatan kul.

⁴⁴ Addagdagan-kam, kam d aytedan-nam. Wər daɣ-am du-z-ayyin təhunt təwârat iyyat, fəlas tugayax s ad tagrax assa wa dam-d-iga Məşşina y dam-agu arraxmat-net.»

Asatay ən Ƴaysa imassatagan daɣ Ahan wa Zəwwəran n Əlyibada

⁴⁵ Dəffər awen, iggaz Ƴaysa aɣalla wa iɣlayan Ehan wa Zəwwəran n Əlyibada, a daɣ-as isattay imassatagan.

⁴⁶ Igann-asan: «Wərgəɣ iktâb as, inna Məşşina: "Ehan-in ad iqqəl ehan ən təwatriwen." Kawanay amaran təgâm-tu "əsəlɣəs ən baydagan"?"»

⁴⁷ Akk əzəl isassaxru Ƴaysa daɣ Ahan wa Zəwwəran n Əlyibada. Ad gammayan muzaran ən limaman əd musanan n Əttawret əd muzaran ən Kəl-Əlyəhud d igi ən man-net,

⁴⁸ mišan ab-asan təməwit tas z'agin awen, fəlas aytedan kul əknân-as əsəsam.

20

Əsəssəɣri ən Ƴaysa daɣ Ahan wa Zəwwəran n Əlyibada

Ma ikfan Ƴaysa tarna ta ila?

¹ Ëzəl iyyan isassaxru Yaysa aytedan daɣ Ahan wa Zəwwəran n Əlxibada, immal-asan Əlinjil as t-id-osan muzaran ən limaman əddewan əd musanan n Əttawret əd muzaran ən Kəl-Əlyəhud,

² ənnan-as: «Əməl-ana da du-təgrawa tarna n igi n aratan win təttagga da? Ma dak-kat-ikfan?»

³ Inn-asan: «Nak da a dawan-agax əsəstan iyyan, amaran əməlat-i:

⁴ Awak əsəlməx wa iga Yaxya aytedan daɣ aman, Məşşina a xur d-ifal awen mex ag-gadəm?»

⁵ Təzzar namaşawwaran gar-essan, ənnan: «As das-nəna "Məşşina a xur d-ifal" a danax-annu: "Mafel za wər təzzəgzənam s awa inna?"

⁶ As das-nəna "Aggadəm a xur d-ifal", tamattay ta, ketnet as dana-za-tanxu əs zabaw ən təgur, fəlas təkkâs aşşak as Yaxya ənnəbi a imos.»

⁷ Ənnan-as amaran: «Wər nəssen wa xur d-ifal.»

⁸ Inn-asan Yaysa: «Nak da za, wər dawan-z-əməlay dad d-əgraway tarna n igi n aratan win.»

Əlmital ən magyakan n alxanab

⁹ Amaran imalallay-in Yaysa tamattay ig-as əlmital wa, inna: «Kala ad ila aləs iyyan afarag n alxanab. Təzzar issəxfar afarag-net en i magyakan wiyyad, išşokal, ig-in tamert tagget.

¹⁰ As du-tewad tamert ta n əmiləy n alxanab, izammazal sər-san iyyan daɣ eklan-net y a t-id-akfin adagar-net daɣ awa d-eraw afarag, mişan əgan-as šiwwit, əsoxalan-tu məşşis isikarayray ifassan.

11 Izammazal sər-san iyyan akli. Ēnta da, əgan-as šiwwit, safallasan-tu, əssoḡalan-tu wər eway wala.

12 As taklat ta n karadat, izammazal sər-san iyyan akli. Ēnta da sabbasan-tu, əstaḡan-tu.

13 Dəffər awen inna məššis n afarag: "Awak ma z'aga? A sər-san zəmmizəla ruray wa əkney tara, mijas ənta a t-əssəḡməran."

14 Mišan as ənayan magyakan win əḡfarnen afarag barar-net izay-tan-du, namannan gar-essan: "Ēnta əddi amakkasu n afarag. Anḡiwatanaq-qu kərəz, fəl ad təqqəl təkasiť šin-nana."

15 Ēkkasan-tu daḡ afarag, ənḡan-tu kərəz.» Amaran inna Ḡaysa i tamattay: «Ēmərədda ma tordam ma z'agu məššis n afarag i win den meddan?

16 Adi za ad aglu ənta iman-net, agu iman ən magyakan win, issəḡfər afarag-net i magyakan wiyyad.» Ēslan aytedan y awen ḡas, ənnan: «Məššina ya wər təgeḡ adi!»

17 Təzzar idak-kan Ḡaysa s asawad, inn-asan: «Daḡ adi ma imos almaḡna ən batu ta tənnat daḡ Ēlkəttaban: "*Təhunt ta din-əgaran makrasan, ənta a təqqalat təhunt ta təkbalat ehan*"?

18 Awedan kul wa udan fəl təhunt ta, ad addagdag, wa fəl tuda deḡ a tu-təlkəš.»

19 Ēgran musanan n Ēttawret əd muzaran n limaman as əntanay a fəl iga Ḡaysa əlmital wen, təzzar əgmayan d abbaz-net amazay wen da, mišan wər əgen awen, fəlas tamattay a əksudan.

Arazam n amana i Qaysara

²⁰ Adi a fæl ewalan Ƴaysa, ənkhândan-as. Æssokan-t-idu meddan əgânên iman-nasan almat alyadılan, fæl a tu-şəşşiwəlan sassannin-tu arat wər nətəwənnu, abəzən-tu sər-əs, agin-tu daɣ fassan n əmuzar n akal d əlxəkum-net.

²¹ Æssəstanan Ƴaysa, ənnan-as: «Ēşşex, nəssân as awa təganna d awa təsassaɣra oɣâd; wər tətəgga təmərît gər aytedan. Təsasaɣra əs tidət awas danax-iwar igi-net daɣ tarrayt ta n Məşşina.

²² Amaran əməl-ana, awak xalal-ana arazam n amana y əmənokal wa zəwwəran Qaysara meɣ?»

²³ Igra Ƴaysa tənagmayt-nasan, inn-asan:

²⁴ «Saknat-i tefelt n əzrəf. Ma ilan udəm d esəm win t-əwarnen?» Ğnnan-as: «Īn Qaysara.»

²⁵ Inn-asan: «Adi za agiwat i Qaysara awa kawan-issəwar, tagim deɣ i Məşşina awa kawan-issəwar.»

²⁶ İndar-asan a tu-səssugin ark awal dat aytedan. Isammaklal sər-san aljawab wa dasan-iga den, əffəstan.

Æsəstan igân daɣ batu ən tanakra daɣ təmattant

²⁷ Dəffər awen osan-t-id arat daɣ aytedan ən taggayt ta n Sadusaytan. Sadusaytan əttâfan as wər tu-təlla tanakra dəffər təmattant. Æssəstanan-tu,

²⁸ ənnan-as: «Ēşşex, inna ənnəbi Musa daɣ Əttawret: "As aba aləs, oyya-du tantut dər wər ila barar, a tat-izləf amadray-net fæl ad agu əzzurrəyya y əmidi-net wa aba den."

29 Amaran kala a t-ëllan əssa mədrayan. Izlaf wa dasan-waššaran ketnasan, aba-tu wər ila barar.

30 Izlaf wa n əššin tantut ta d-oyya əmaqqrar-net, ənta da aba-tu wər d-oyya ara.

31 Wa n karad deɣ awen da. Əssa mədrayan en ketnasan igraw-tan awen da, wər tan-iha i d-oyyan ara.

32 Dəffər awen, aba tantut ənta da.

33 Awak əzəl wa n tabadday, ma imos daɣ əssa mədrayan win den was za təqqəl təntut ten taɣurəs, dad zamas ketnasan əzlâfan-tat?»

34 Inn-asan Ƴaysa: «Daɣ əddənet ta nəha da, zallafan meddan, tawazlafnat tədoden,

35 mišan aytedan win isannaha Məššina əd tanakra daɣ təmattant fəl ad əggəzan aljannat, win di wər dasan-t-illa azalaf gər za meddan wala šidoden.

36 Id ab-as daɣ-san təlcam təmattant, olân d angalosan, əqqalan bararan ən Məššina id tanakra a d-əgan daɣ təmattant.

37 Amaran daɣ awa iqqalan tanakra ən nəmməttan, ənnəbi Musa ənta iman-net as isat-tadda awen daɣ Əttawret, daɣ batu ən təfsəq, assaɣa wad inna Məššina imos "Əməli n Ibrahim, d Isəhaq əd Yaqub."

38 Daɣ adi Məššina wər imos Əməli ən təməxsə, kalar Əməli ən win əddarnen a imos, fəlas ɣur-əs aytedan kul əddâran.»

39 Ennan wiyyad daɣ musanan n Əttawret i Ƴaysa: «Əššex, təgêɣ awal olâɣan.»

40 Dəffər adi ab-as əhalan əsəstan-net d arat waliyyan.

Ɔsəstan igân day batu n awa imos Ɔlməsix

⁴¹ Dəffər awen issəstan-tan Ɔaysa inn-asan: «Manəmmək as itawannu Ɔlməsix Ag əmənokal ənnəbi Dawəd a imos?

⁴² Ɔnta Dawəd iman-net as sər-əs inna day əlkəttab wa n Azzabur: "Inna Ɔməli y Ɔməli-nin: 'Qamu day əxil-in,

⁴³ *har aga izəngə-nak daw daran-nak."*

⁴⁴ Day adi dad zamas Dawəd iman-net iyra Ɔlməsix s esəm wa n Ɔməli, manəmmək as z'iqqəl barar-net?»

Ɔnnəkud i təlmənufəqa ən musanan n Ɔttawret

⁴⁵ Harwada əssísaman aytedan kul, as inna Ɔaysa i nəttulab-net:

⁴⁶ «Ɔnkədat i musanan n Ɔttawret, ərân əsəxləy əzlâgan šikadkaden zagrotnen, d ətəwəsəslam igân əs saɣmar day sammanayan, ərân təximit day daggan win əlanen almaqam day nan win əlxibada ən Kəl-Ɔlyəhud, əd daggan n aytedan win tawasaymarnen day məgura.

⁴⁷ Tattan eharay ən tədoden šin as aba meddan-nasnət, as iga awen, taggin imaddan tahaginen wər nəmos ar sokni. İlkâm a dasan-itəwəxkəm attadib labasan.»

21

Takutay ən təntut as aba ələs-net

¹ Idkal Ɔaysa asawad-net, inay iməggərgas taggin azrəf wa əkkatan day əssənduq wa day itiddaw ərrəzəɣ n Ahan wa Zəwwəran n Ɔlxibada.

² Inay deŷ tantut iyyat ən tələqqay as wər idder aləs-net as təga daŷ əssənduq en sanatat təfelen.

³ Təzzar inna: «Əggəyyeŷ silakanax-awan as, tantut ten ən tələqqay en as wər idder aləs-net en, togar aytedan a ketnasan tehakkay.

⁴ Fəlas ketnasan awas wər əddərarən a əkfən, ənta amaran, addararat-net a daŷ təkkał awa təla kul təkət-tu.»

Assa n əzəl wa ilkaman

Əbərəjji wa ilkaman daŷ Ahan wa Zəwwəran n Əlyibada

⁵ Əššewalan aytedan wiyyad daŷ batu n Ahan wa Zəwwəran n Əlyibada, əmmâlan adalag wa iga əs təhun hossaynen d aratan win əkfən aytedan daŷ təkutawen-nasan. Inna Ƴaysa:

⁶ «A wa təhannayam da, əlkâman adan a daŷ-as du-wər-za-taqqam təhunt təwârat təmidit-net, ketnet ad itəwəjəbbərejjet.»

Ənkədat y awa ilkaman

⁷ Təzzar əssəstanan-tu, ənnan-as: «Əššex, əmmay ad z'agu wədi arat? Ma za təqqəl alxalamat ta za tassaknit as ibuk y igi?»

⁸ Inn-asan Ƴaysa: «Ənkədat ad wər tətəwəsəxrəkam, id aytedan aggotnen a du-z-asinen əttafan esəm-in. Akkiyyan daŷ-san igannu: "Nak a imosan Əlməsix", "Taqqan tewad." A dasan-wər-təlkəmam.

⁹ As təslam i tərmuq ən məgiran d əlfəllagatan, ad wər təššəwəšam fəlas, aratan di kundaba izâran-du, mišan wər dasan-za-təlkəm təzərəst n əddənet əddi da.»

10 Inn-asan deɣ: «Ad əknəsnaŋ addawlaten gar-essanaŋ, əknəsnaŋ taɣmareŋ gar-essanaŋ,

11 əməlan-tu nəgəynəgəyan n amaɗal labasnen; iməl-tu laz əd təwərnawen əssiksadnen daɣ daggan aggotnen, əməlan-tu deɣ aratan əssiksadnen d aɣalamaten əsimaklalnən daɣ jənnawan.

Ətəwədgaz ən nalkiman

12 Mišan dat adi kul, ad tattarmasam, tətəwəzəxəzzəbam, tammawayam əs nan win əlxibada ən Kəl-Əlyəhud, tətəwəggim da kasaw, tətəwəsəbdədam dat mənokalan əd naxkiman, tətəwəsəstənam fəlas kawan-iwar esəm-in.

13 A kawan-akfu adi tarrayt n a fall-i taggayem.

14 Daɣ adi sansiwat taytween-nawan, ad wər təsəmmutəgam awa za tannim y ad təkkəsam iman-nawan,

15 fəlas a kawan-akfa masnaŋ n awal əd təla n əgərri as tu-wər-illa azangaw-nawan a dasan-z-ifrəgan wala deɣ ifrəg isəbbəhəw-nawan.

16 Wala imarwan-nawan a kawan-səttərməsən, səttərməsən-kawan mədrayan-nawan əd šəqqaɣan-nawan əd midawan-nawan, təwənyin wiyyad daɣ-wan kərəz.

17 A kawan-əgzəran aytedan kul fəlas kawan-iwar esəm-in,

18 mišan wər dawan-z-ixšəd adi wala a odgan əd təzuyay n əmi n əššənnan.

19 Zəmmerat-nawan as za tagəzam iman-nawan.

Ətəwəşray wa ilkaman daɣ əxrəm ən Yerusalam

20 As tēnayam aȳrēm ən Yerusalam ȳilayȳalayan-tu gēnan ən sojitan, tēssēnam as ijwâr itiwadagdag.

21 Eddi, aytedan win ahanen akal ən Yahudēyya, win di addaggaganet s ədȳaȳan. Win əhanen aȳrēm ən Yerusalam, əgmədanet-tu, win t-əgmadnen əs saffan-net, a t-idu-wər-əqqəlan,

22 fəlas adan win di, ad əqqəlan adan a daȳ z'awwaddab Məššina aytedan, fəl ad andin aratan kul win ənnan Elkəttaban.

23 İket aȳazab ad t-əginat tədoden šin əganen šidusen əd šin sankasnen daȳ adan win den, fəlas ad tagu tēssust labasat daȳ akal, azzabbat-du attadib ən Məššina fəl tamattay ta.

24 Arat daȳ tamattay ta ad itəwənyu əs takoba, awa hadan ikfəl əs kallan kul, əggəznat tēmattiwen wər nəmos Kəl-Əlyəhud aȳrēm ən Yerusalam, a tu-tataftafnat har tandu tēmastant ta tanat-ikfa Məššina.

Assa n Ag Aggadəm

25 Ad təwənəyan aratan saksodnen əmosnen aȳalamaten as z'əginen da təfuk əd təllit d etran. Ad əššəwəšnat tēmattiwen n əddənet wəllen, iqqən əməsli labasan wa tagginat tanaz-zamaren n aman ən gərwan iȳafawan-nasan.

26 Aytedan a tan-tanȳu tasa n aratan win hannayan əzayan-du əddənet fəlas ad təwəsənəgəynəgəynat təxəllak šin əlānen tarna daȳ jənnawan.

27 Alwaq wədi, a di-ənəyan aytedan nak Ag Aggadəm as du-z-asa, əhəȳ tagarak, ələȳ tarna əd tanaya tagget.

²⁸ As əntan aratan win di, təsəmmutəgam, an-nalamanet man-nawan, fəlas alwaq ən tədarfit-nawan ihôz.»

Əlmital wa iga Ƴaysa s ašək ən fig

²⁹ Ig-asan Ƴaysa əlmital, inn-asan: «Ənzərat-in daƳ ašək ən fig d eškan win hadatnen.

³⁰ As əggazan šin tanazra, ad təssənam kawanay iman-nawan as tamert ta n akasa təhôz.

³¹ Zund əmmək en daƳ âs as tənayam aratan win dawan-əmalax əddi, təssənam as TaƳmar ta n Məššina təhôz.

³² Əggəyyey əsilakanax-awan as tamattay ta da n azzaman win nəha da, ad tənəy ənətti n aratan kul win dawan-əməla da.

³³ Ijənnawan d amaɖal ilkâm ad ib'as t-əllan, mišan batuten-in əllanat-tu har faw.»

Səmmutəgat, tənəkədam

³⁴ «Ənkədat fəl man-nawan! Ad wər iƳşəd igət ən tattay əd tassay n esmad əd medranan n əddənət ənnəyatən-nawan, ag-awan əzəl wədi aƳadar,

³⁵ zun wa tətəggu taftaw y awedan. Arat wədi ad agu fəl aytedan kul win əwarnen tesayt n amaɖal.

³⁶ DaƳ adi agat ənnəyat, ad tətənsayam Məššina alwaq kul a kawan-issəfragan ikus ən man-nawan daƳ awa d-izayan ketnet, təfrəgam a dat-i təbdədam nak Ag Aggadəm.»

Əššəxəl ən Ƴaysa daƳ Ahan wa Zəwwəran n Əlxibada

³⁷ Faw isasayru Ҷaysa aytedan daɣ Ahan wa Zəwwəran n Əlxibada, amaran as iga ahad, ad adəw adɣaɣ igân esəm wa n Eşkan ən Zaytun.

³⁸ Id affaw, a d-ənzəyan aytedan kul s Ahan wa Zəwwəran n Əlxibada y a das-əssəsəman.

Tamattant əd tanakra ən Ҷaysa Əlməsix

22

*Tadrəwt ən Ҷaysa ta təlkatat əd nəttulab-
net imensewan*

Anu ən təɣdərt wa itawayazan i Ҷaysa

¹ Amud wa daɣ tattin aytedan şigəlwen şin wər iha xamira, was itawannu wa n Akkay, ihôz.

² Imuzaran ən limaman əd musanan n Əttawret gammayan təmərkest tas z'agin iman ən Ҷaysa, mişan əksudan ad t-anɣin ijənnəjərwəy awen tamattay.

³ Iggaz Aşşaytan Yahuza was itawannu Isxarəyuti imosan iyyan daɣ nəttulab ən Ҷaysa win maraw d əşşin.

⁴ Iglə, ikka imuzaran ən limaman əd muzaran n aytedan win ogaznen Ehan wa Zəwwəran n Əlxibada, imaşawal dər-san daɣ batu n əmmək was z'agu Ҷaysa daɣ fassan-nasan.

⁵ Isaddawat-tan awen; ərɗan s ad t-akfin azrəf.

⁶ Ird-asan, təzzar ad igammay təməwit tas z'agu Ҷaysa daɣ fassan daɣ amazay a ɣur-əs wər təlla tamattay.

Imutag n əmud wa n Akkay

⁷ As d-ewad əzəl n əmud wa n tögəlwen šin wər iha xamira, wa daɣ tawagzaman jəɣal win əmud wa n Akkay,

⁸ izammazal Ƴaysa Butros əd Yaxya, inn-asan: «Aɣlat təsəmmutəgam-anax imensewan win əmud wa n Akkay.»

⁹ Ənnan-as: «Mənid tareɣ a tan-nəsəmmutəg?»

¹⁰ Inn-asan: «As din-təggazam aɣrəm, ad tammanayam d aləs a d-iktâran ətəkin-net. Əlkəmat-as s ahan wa z'iggəz,

¹¹ tannim i məššis n ahan wədi: "Inn-ak Əššex: 'Məni tu daɣ ahan-nak edag wa n naftaxan, wa daɣ za nammansaw nak əd nəttulab-in daɣ əmud wa n Akkay?'"

¹² A kawan-assaknu daɣ suru-net, ehan wa n afalla, elwân, əhân-tu mutag kul. Əddi da ad za təsəmmutəgam imensewan.»

¹³ Əɣlan, ənayan arat kul s əmmək was dasant-inna Ƴaysa; təzzar ad simutugan imensewan win Akkay.

Imensewan win əmud wa n Akkay

¹⁴ As iga alwaq ən tattay, inaxama Ƴaysa əd nəmmuzal-net, əggazan šin tattay.

¹⁵ Təzzar inn-asan: «Əkneɣ deran ən tədrəwt ta dər-wan əgeɣ imensewan n əmud wa, harwa wər əɣxəzzaba.

¹⁶ Silakanax-awan as, wər di-ilkem a tan-ələsa tettay iket wər d-osa əzəl wa daɣ z'andu almaɣna-nasan daɣ Taɣmar ta n Məššina.»

¹⁷ Təzzar idkal-du Ƴaysa təkabart iha esmad n alɣanab, iggoday i Məššina, inna: «Abəzat təkabart ta, tənəməgləzam awa tat-ihan,

¹⁸ fəlas əsilakanax-awan as, wər ilkem ad əšweɣ esmad n alɣanab, iket wər du-tosa Taɣmar ta n Məššina.»

Əsəbdəd ən mensewan win əmosnen isaktan n Əməli

¹⁹ Dəffər awen idkal Ƴaysa tagəlla, iga igodan i Məššina, irz-et izun-asan-tat, inn-asan: «taɣəssa-nin adi, tətɪwakfat fəl əddəlil-nawan. Tuzanat-tat əs təməwit ta da, imos adi isaktan-in.»

²⁰ Zund əmmək en da əs as ətšan, idkal təkabart, inn-asan: «Təkabart ta, arkawal wa aynayan ən tassaɣ a təmos gər Məššina əd tamattay-net. Arkawal wa, azni-nin a z'inɣəlan fəl tənfa-nawan a t-isattaddan.»

Emel ən Ƴaysa ətəwəkəddal wa z'itəwəggu

²¹ «Fadda ənəyat, aləs wa di-z-aggin daɣ fassan, illa da da, idrâw dər-i.

²² Illikan as nak Ag Aggadəm a di-iba əs təməwit ta d-ixkam Məššina harwa dat alwaɣ, mišan iket alɣazab ad t-inəy awedan wa di-igan daɣ fassan.»

²³ Təzzar ad tinəməsəstinan nəmmuzal-net gar-essan əd wa daɣ-san z'agin wen daɣ arat.

Ma imos wa daɣ-wan ogaran

²⁴ Dəffər awen tənkar tamazaɣ gar-essan təgât daɣ batu ən was əttafan as ənta a daɣ-san ogaran.

²⁵ Inn-asan Ƴaysa: «Imənokalan ən təmattiwen n əddənet saknin tarna y aytedan win as azzaran, zamazalan fall-asan deƷ əlxəkum-nasan; mišan dər iga awen da əttâfan as imadhalan n aytedan a əmosan.

²⁶ Mišan kawanay, ad wər tagim awen. Kalar, wa daƷ-wan ogaran almaqam, iqqəlet zun wa daƷ-wan mədrəyan. Wa daƷ-wan azzaran, iqqəlet zun amaşşaxal.

²⁷ Awak ma ogaran awedan wa iqqiman itattu əd wa das-işxalan? WərgəƷ wa iqqiman itattu? Mišan nak imosan əmuzar-nawan aheq-qawan əmosa zun amaşşaxal-nawan.»

İşşəƷəl wa ilkaman daƷ nəttulab win maraw d əşšin

²⁸ «Kawanay win da, a d-əqqimnen təl-kâmami daƷ jarrabatan win ənaya.

²⁹ Adi as, tehakkay ta di-iga Abba-nin taƷmar, ənta a dawan-z-aga y-as nak əmərədda.

³⁰ Fəl a dər-i tədrəwam tettay əd tassay daƷ taƷmar-in, taqqamim fəl təsəqqima ən təmənukəla y ad təsrəƷam i tawşeten marawat əd sanatat šin İsrayil.»

Emel ən Ƴaysa ikus wa das-z-agu Butros tazdəyt

³¹ «SimƷon, SimƷon! Ənkəd! Aşşaytan igmây turagat n a dawan-agu əsəkənsəki wa itawaggin y alkama.

³² Mišan nak onsâyaƷ-ak Məşşina fəl a kay-wər-igməd əzəgzan wa sər-i təgəƷ. Amaran as di-du-təqqala, təsəssuheƷ əzəgzan ən mədrayan-nak.»

³³ Inn-as Simyōn Butros: «Ēmēli, nak simataga s a dər-ək idawa kuddeḡ əs kasaw, əd tēmattant.»

³⁴ Mišan inn-as Ƴaysa: «Butros, silakanax-ak as, wər z'aḡru əkəji aḡora ahada da wər di-təggeda har karadat tāklaten.»

Ēnnəkud i tēməḡutar šin d-əzaynen

³⁵ Dəffər awen inna Ƴaysa i nəmmuzal-net ketnasan: «Alwaḡ wa kawan-zammazala wər tewayam azrəf, wala aḡrəḡ, wala təsəsəlt ta n sanatat, awak ill-ay arat a din-todānam?» Ēnnan-as: «Kala.»

³⁶ Inn-asan: «Ēmərəddə za, wa ilan azrəf awəyet-tu, wa ilan aḡrəḡ awəyet-tu. Wa wər nəla takoba, azzanzet-in əbərnuz-net, azzanzet-du.

³⁷ Silakanax-awan as, awa fall-i itawannan daḡ Ēlkəttab ən Məššina n as "iddun daḡ maggan ən təkma." Kundaba inda. Awalla, arat kul wa fall-i itawannan ad andu.»

³⁸ Ēnnan-as: «Ēmēli, sanatat təkabiwen da.» Inn-asan: «Ayyat batu di, wər di-təgrem.»

Ētərməs ən Ƴaysa d əššəriḡa wa das-itawaggan

Təwatray ən Ƴaysa

³⁹ Iḡmad Ƴaysa, iddêw əd nəttulab-net, ikka adḡax wa n Eškan ən Zaytun, imos awen arat itaggu faw.

⁴⁰ As din-ewadan, inn-asan: «Ansəyat Məššina a kawan-ogazan daḡ jarrabatan n Iblis.»

⁴¹ Ēnta amaran izzəkaz-in fall-asan, əddukad ən taggor ən təhunt, igaraffat ad itattar,

42 igannu: «Abba, kud immikkan adi, tæssəgəgax-i təkabart ta n alxazab di! Dər iga awen da ya, taget tara ta-nak wərgəx ta-nin.»

43 Amaran inafalal-as angalos y ad t-isəssuhət.

44 Təzzar ədgazan man Ƴaysa, idgaz wəllen daɣ təwatriwen, har təqqal tarraft-net šilat n əzni, ad tətattab daɣ amaɗal.

45 As iɣrad šiwatriwen, ibdad, iqqal-du inəttulab-net, os-en-du issins-en əxšud ən man.

46 Inn-asan: «Mafel tənsâm? Ɛnkərat tansəyam Məššina a kawan-ogazan daɣ jarra-batan n Iblis.»

Ɛtərməs ən Ƴaysa

47 Harwada iššewal-asan as tan-təggaz tamattay təgget as azzar Yahuza wa n iyyan daɣ nəttulab-net win maraw d əššin. Ihoz-du Yahuza Ƴaysa y ad t-izələmmət.

48 Mišan inn-as Ƴaysa: «Adis kay Yahuza, təzələmmət as di-za-təsəssuga daɣ fassan, nak Ag Aggadəm?»

49 As ənayan nəttulab win hadatnen awa ibukan y igi da, ənnan: «Ɛməli, ma iqqal nəššəšxəl šikabiwen-nana?»

50 Təzzar iwat iyyan daɣ-san akli n Ɛlimam wa Zəwwəran, ifras-du təməzzuk-net ta n əxil.

51 Mišan iharaššat-tan Ƴaysa, inn-asan: «Ayyat adi!» Təzzar idas təməzzuk n əkli wen, izzozay-tat, təqqəl əmmək-net.

52 Amaran inna i muzaran ən limaman əd muzaran n aytedan win tagaznen Ehan wa Zəwwəran n Ɛlɣibada əd muzaran ən Kəl-Ɛlyəhud, əs ketnasan osân-du y ad t-əbəzan:

«Awak əjajəb iyyan n abaydag a əmosa as sər-i du-tewayam şikabiwen əd təburəgen?

⁵³ Wərgex əzəl kul ərtâya dər-wan day Ahan wa Zəwwəran n Əlyibada mişan wər di-tobezam? Əmərədda za alwaq-nawan a d-ewadan, kawanay əd taɣmar ta n İblis əd şiyay-net.»

Ikus ən Butros tazdəyt i Ƴaysa

⁵⁴ Təzzar obazan Ƴaysa, ewayan-tu s aɣaywan n Əlimam wa Zəwwəran. Ig-asan Butros ləkkum zagren.

⁵⁵ As din-osan, tətawasarɣa təmsay day ammas n aɣalla, əqqiman sər-əs aytedan. Iggaz-tan-in Butros.

⁵⁶ Tənay-tu təmaşşaxalt iyyat iqqim əs təmsay, təzaggazd-ay wəllen, amaran tənna: «Aləs wa, ənta da, iddew əd Ƴaysa.»

⁵⁷ Mişan iggad Butros awen, inna: «Tantut, wər t-əzdaya.»

⁵⁸ Arat n amazay dəffər awen, inay-tu iyyan awedan, inn-as: «Kəy da, iyyan day-san.» Mişan inn-as Butros: «Xa aləs wa, kala wər t-əmosa.»

⁵⁹ As iga adag n alwaq dəffər awen, inna aləs iyyan s assahat: «İllikan as aləs wa iddew dər-əs, fəlas ənta da in akal ən Galilaya.»

⁶⁰ Inn-as Butros: «Xa aləs, wər əssenax awa day-i təşşewalax.» Harwa da işşewal Butros alwaq wen da as iɣra əkəji aɣora.

⁶¹ Təzzar imalallay-in Əməli Ƴaysa iswad day Butros. Den da a d-ikta Butros awal wa das-iga Əməli, as das-inna: «Wər z'aɣru əkəji aɣora azalada wər di-təkkesax tazdəyt har karadat təklaten.»

⁶² Təzzar Igməd Butros, ad ihallu fəl awa əgan man-net dəx əxşud.

Tamakkakkayt ən sojitan dəx Ƴaysa

⁶³ Alwaq wen, meddan win əttafnen Ƴaysa, əgân dəx-as tamakkakkayt, əggâtan-tu.

⁶⁴ Əgan-as abanaban, a das-gannin: «Kay ya ələwli! Əməl wa kay-iwatan.»

⁶⁵ A das-taggin batuten şiyvad aggotnen labas-nen.

Tebadday ən Ƴaysa dat Asaggawar wa Zəwwəran

⁶⁶ As affaw aḡôra, immənay Asaggawar wa Zəwwəran ən muzaran ən Kəl-Əlyəhud, əhân-tu əmuzaran ən limaman əd musanan n Əttawret, itawasabdad dat-san Ƴaysa.

⁶⁷ Ənnan-as: «Kud kay Əlməsix, təmələx-ana?» Təzzar inn-asan: «Kud dawan-əmala da wər di-za-təzzəgzənam,

⁶⁸ kud kawan-əssəstana dəx wər di-za-tajjawwabam.

⁶⁹ Mişan a obazan xur əmərədda, Nak Ag Aggadəm ad aqqama dəx əxil ən Məşşina di n Əməli ən Tarna.»

⁷⁰ Ənnan-as ketnasan: «Dəx adi kay Barar ən Məşşina?» Inn-asan: «Kawanay iman-nawan as tənnam əmosaq-qu.»

⁷¹ Təzzar ənnan: «Ma nəkka y iyyat təgəyya? Wərgəx nakkanay iman-nana nəslâ y awa d-igmadan imi-net?»

23

Tebadday ən Ƴaysa dat Bilatəs

¹ Tənkər aljamaɣat ketnet, teway Ƴaysa əs Bilatəs wa n ənaxkim.

² A ɣur-əs tu-ɣattasan gannin: «Aləs wa, as t-in-nosa isaxrak tamattay-nana. Igaddal deɣ y aytedan ad ərzəman amana i Qaysara wa n əmənokal wa zəwwəran, harwa igannu ənta a imosan Əlməsix, əmənokal.»

³ Awen da a fəl t-issəstan Bilatəs, inn-as: «Awak kay daɣ a imosan əmənokal ən Kəl-Əlyəhud?» Inn-as Ƴaysa: «Kay iman-nak as tənneɣ adi.»

⁴ Inna Bilatəs i limaman win zawwarnen əd tamattay: «Wər hənnəyax əddəlil waliyyan a fəl obazaɣ aləs a.»

⁵ Mišan ədɣazan wəllen daɣ təɣəttas-net, gannin: «Ijinəjərwəy aytedan əs səssəxritan-net daɣ akal ən Yahudəyya ketnet. Issənta-du awen daɣ Galilaya har awas d-ewad Yerusalam da.»

Tebadday ən Ƴaysa dat əmənokal Herod

⁶ Isla Bilatəs y esəm wa n Galilaya ɣas, issəstan kud Ƴaysa in akal ən Galilaya wala.

⁷ As issan as taymar ta n Herod a das-tazzarat, issok-as-tu fəlas iha Yerusalam daɣ adan en.

⁸ Herod isidawat-tu wəllen anay ən Ƴaysa, irəw ira anay-net fəl əddəlil n aratan win sər-əs isallu. Igâ deɣ attama n a dat-əs agu Ƴaysa təlməxjujat.

⁹ Ig-as isəstanan aggotnen, mišan wər das-inna Ƴaysa wala.

¹⁰ As itaggu awen, imuzaran ən limaman əd musanan n Əttawret əllân den, siɣaren da təɣəttas ən Ƴaysa.

¹¹ A das-itaggu Herod əd sojitan-net şisəssəlka, taggin daɣ-as tamakkakkayt; əzzəzlagan-tu takatkat təkñât əbələzləz, amaran issoɣal-tu Herod i Bilatəs.

¹² Eway-du awen əzəl wen da as immedaw Bilatəs əd Herod, id dat awen nimagzaran.

Ətəwəxkam ən təmattant i Ƴaysa

¹³ İşşedaw-du Bilatəs ilimaman win zawwar-nen əd muzaran ən Kəl-Əlyəhud win hadatnen əd tamattay,

¹⁴ inn-asan: «Tewayam-du sər-i aləs a, tənnam isafallag aytedan. Əşraɣaɣ-as dat-wan, mişan wər ənaya əddəlil waliyyan a fəl t-əbaza daɣ aratan win tu-təssəwaram.

¹⁵ Wala deɣ inay-tu daɣ-as Herod, fəlas issoɣal-anaq-q-id. Amaran ənəyat! Aləs wa, wər iga arat waliyyan a t-issiwaran təmattant.

¹⁶ Daɣ adi a das-səssuga šiwwit, amaran ayyaq-qu.»

¹⁷ Təll-ay alɣadat təmosat as i d-iɣlay əmud wa n Akkay, iwâr Bilatəs a dasan-ikkəs awedan iyyan daɣ kasaw.

¹⁸ Jajjayen adakal ən maslan-nasan ketnasan daɣ jənnawan gannin: «Agu iman n aləs di, təkəkəsəɣ-ana-du Barɣabbas.»

¹⁹ Barɣabbas wen, ənəjərway as kala ad t-əgan aytedan daɣ əxrəm n Yerusalam d igi ən man n awedan a fəl iggaz kasaw.

²⁰ İlas-asan Bilatəs awal fəlas tara a iga ad ayyu Ƴaysa.

²¹ Mişan əqlan sıɣaren daɣ jənnawan, gannin: «Taytay-tu fəl təgəttawt! Taytay-tu fəl təgəttawt!»

²² Ig-asan Bilatəs tənna ta n karadat: «Mafel za? Ma iḡšad? Wər hənnəyax əddəlil waliyyan a t-issiwaran təmattant. Daḡ adi a das-səssuga šiwwit ḡas, ayyaq-qu.»

²³ Mišan əššotan šiḡaraten wəllen, gammayan daḡ-as ad itəwətəytəy Ḡaysa fəl təgəttawt. Əḡlaban Bilatəs əs takat.

²⁴ Təzzar ixtas Bilatəs i Ḡaysa əššəriḡa wa daḡ-as təgməy tamattay ten.

²⁵ Ikkas aləs wa daḡ-as gammayan, iggāzan kasaw fəl ənəjərway n aytedan d igi n man n awedan. Ḡaysa amaran, ig-ay daḡ fassan-nasan, y a daḡ-as itəwəxkəm awas əran.

Tamattant ən Ḡaysa

Iki ən Ḡaysa edaḡ wa daḡ z'itəwətəytəy

²⁶ Əzzərgazan sojitan Ḡaysa. Əḡlân dər-əs as əmmənayan d aləs iyyan n əḡrəm ən Qərwan igân esəm Simḡon a d-ifâlan šiwwəḡas, təzzar əbazan-tu, sassawayan-tu təgəttawt ta fəl z'itəwətəytəy Ḡaysa, ilkam-as dər-əs.

²⁷ Təlkâm-as tamattay tagget, əhânat tədoden aggotnen a fall-as hallinen, sikalalnat.

²⁸ Iswad-in daḡ-asnat Ḡaysa, inn-asnat: «Aššet Yerusalām, ayyimat fall-i tala. Kalar alimat fəl man-nakmat, əd maddannəkmat,

²⁹ fəlas əlkâman adan a daḡ z'itəwənnu: "Əbbilalnat tədoden šin wər nətilu bararan, əd šin əs kala wər tan-ələnat, əd šin əs kala wər əsənkasnat."

³⁰ Adan win-di ad annin aytedan y ədḡaxan: "Bərəjjətət fall-ana", annin i kaşwaran: "Alsawat-ana";

³¹ fəlas dad itawagga əmazal wa y ašək wa ibdagan, wədi ma d-innayan wa iqquran?»

Ətəwətəytəy ən Ƴaysa fəl təgəttawt

³² Əllan meddan den əššin ən nəsgufa labasnen s əntanay da tiwazargazan s adag ən təmattant.

³³ As ewadan sojitan edag igân esəm Təkəyya, əttəytəyan Ƴaysa fəl təgəttawt, əssəxtan-tat dər-əs. Əgan awen da i meddan win əššin en. Iyyan əgan-tu dağ əxil ən Ƴaysa, wa hadan əgan-tu dağ zalgat-net.

³⁴ Inna Ƴaysa: «Ya Abba, surəf-asan; wər əssenən awa taggin.»

Əzunan tabdoq ən Ƴaysa əs təşaxeren.

³⁵ Tamattay təbdâd den təswâd. Imuzaran amaran əgân tamakkakkayt dağ Ƴaysa, gannin: «Ənta wa issəfsan aytedan, assafset iman-net kud ənta a imosan Əlməsix, Tafrent ən Məšşina.»

³⁶ Sojitan da, əgân dağ-as tamakkakkayt. Tihazan-t-in, tazzalan-as-in bənəgər.

³⁷ Gannin-as: «Kud kay əmənokəl ən Kəl-Əlyəhud a təmosağ, tassafsəğ iman-nak.»

³⁸ Əttəytəyan dəğ dənnəg-əs əsellum a fəl iktâb as: «Awa Əmənokəl ən Kəl-Əlyəhud.»

Meddan win əššin ən nəsgufa

³⁹ A das-itaggu iyyan dağ meddan ən jujab ən baydagan win dəgman-əs tawatəytəyənən ark batuten, igann-as: «Wərgəğ kay Əlməsix? Səfsu za iman-nak, tassafsəğ-ana.»

⁴⁰ Isannaryam-as wa hadan, inn-as: «Kay taksæda a wær tæge Mæššina, kay wa obaz æššærixa imosan tæmattant wa t-ibazan?»

⁴¹ Nakkanay æššærixa wa danaḡ-itawaggan oḡâd, awa dær æhoran mazalan-nana a danaḡ-itawaxkaman, mišan aləs wa, ænta wær iga ark amazal waliyyan.»

⁴² Tæzzar inna i ḡaysa: «ḡaysa, aktæw-i-du as du-tæqqala taheḡ taḡmar-nak.»

⁴³ Inn-as ḡaysa: «Æggæyæḡ æsilakanax-ak as, azalada ad nænæmægæz aljannat nak dær-æk.»

Tamattant æn ḡaysa Ælmæsix

⁴⁴ Awen itaggu attayan n ammasnazal. Tæzzar ælsanat šiyyay amaḡal ketnet har tæga tazzar,

⁴⁵ fælas tæfuk a igmad ænnur. Afær deḡ wa izammazzayan edag wa zæddigan æd wa ogaran tazdak daḡ Ahan wa Zæwwæran n Ælḡibada, izzærrat daḡ ammas.

⁴⁶ Tæzzar ikkas ḡaysa æmæsli issohen, inna: «Abba, ægeḡ iman-in gær fassan-nak.» Inna awen ḡas ægmadan-tu man.

⁴⁷ As inay kabtan æn sojitan æn Kæl-Ærrum win ættæytaynen ḡaysa awa igan den, iga tæmmal i Mæššina, amaran inna: «Illikan as aləs wa alḡadil.»

⁴⁸ Æddêwan aytedan aggotnen den y ad ænæyan awa z'agin. As t-ænayan, æqqalan æggâtan idmaran-nasan fæl awa ægan man-nasan daḡ æḡšud.

⁴⁹ As itaggu awen, imidawan æn ḡaysa kul, æhânat tædoden šin das-d-ælkammen harwa daḡ akal æn Galilaya, æbdâdan sædi, æswâdan.

Tanakra ən Ƴaysa daƷ təmattant

Ƴetawægga ən Ƴaysa daƷ əzəkka

⁵⁰ Ill-ay aləs igân Yusəf ihân Asaggawar wa Zəwwəran ən muzaran ən Kəl-Ƴlyəhud, imosan awedan olâƷan n alƷadil.

⁵¹ Ənta wər irda əs tanat ta əgan muzaran win, wala deƷ s arat wa igan. Yusəf wa, in əƷrəm ən Kəl-Ƴlyəhud igân esəm Arimatay, amaran igâ attama-net daƷ assa ən TaƷmar ta n Məššina.

⁵² Ikka Yusəf Bilatəs wa n ənaxkim n akal, igraw-du Ʒur-əs turagat n ad itkəl taƷəssa ən Ƴaysa.

⁵³ Təzzar ikkas-tat-du fəl təgəttawt, ig-et daƷ šifit, ig-et daƷ əzəkka imosan akazam əs wər kala a daƷ-as itawægga ənəmmettən.

⁵⁴ Awen itaggu daƷ əzəl wa daƷ simutugan aytedan y əmud wa n təsanfawt, ibukan y ənətti.

⁵⁵ Šidoden šin d-əddəwnen əd Ƴaysa harwa daƷ Galilaya, əlkâmnat i Yusəf. Ənaynat əzəkka d əmmək was daƷ-as tətawægga təƷəssa ən Ƴaysa.

⁵⁶ Ƴqqalnət aƷaywan, təzzar ad simutugnat ađutan əzodnen d alwarditan win za təwənyəlnen fəl təƷəssa-net. As d-ewad əzəl wa n əssəbət əssənfanat, imos awen alwajib n əššəriƷa wa n Ƴttawret.

24

Agamad ən Ƴaysa əzəkka

¹ As əzəl wa n alxad, ənzaynat tədoden šin den s əzəkka ən Ƴaysa, ewâynat ađutan win sammatagnat.

² Osanat-in tēhunt ta tēharat əzəkka, tētiwasaxararad, tēlla den y əzəkka.

³ Əggaznat əzzəka mišan wər daḡ-as ənaynat taḡəssa ən Ƴaysa.

⁴ Əqqanan xafawan-nasnat y awen. Wala a ihogan əbdadan-du əššin meddan dəgmanasnat əlsānen isəlsa bilazlaznen.

⁵ Ərmaḡnat, oyyanat idmaran s amaḡal, təzzar ənnan-asnat meddan win əššin en: «Mas təsaggadmat y i iddāran daḡ nəmməttan?»

⁶ Ab'as illa da, inkər-du daḡ tēmattant. Aktimat-du awa inna harwa iha akal ən Galilaya,

⁷ as inna: "Ag Aggadəm ilzām-tu ad itəwəggu daḡ fassan ən nasbakkadan, itəwətəytəy fəl təgəttawt, ibə-tu, təzzar inkər-du daḡ tēmattant əzəl wa n karad."»

⁸ Amaran əktanat-du awa inna Ƴaysa.

⁹ Əfalnat əzəkka, əqqalnat əssoḡalnat awen kul i nəmmuzal ən Ƴaysa win maraw d iyyan əd nalkiman kul win hadatnen.

¹⁰ Šidoden šin əmosnat Maryama Madəl əd Taxya əd Maryama ta n anna ən Yaqub əd tədoden šiyad dər-əsnat əddawnen. Əntanatay a əssoḡalnen aratan win i nəmmuzal.

¹¹ Mišan wər sər-san əlen aratan en almaḡna; adi a fəl dasnat-wər-əzzəgzanan.

¹² Dər iga awen da ya, igga-du Butros, ozal s əzəkka. As t-in-osa, iššəgga daḡ-as, wər daḡ-as inay ar šifit, təzzar iqqal, iqqân awen eḡaf-net.

Tarrayt n Emayos

¹³ Əzəl wen da iman-net ad əkkan nalkiman ən Ƴaysa əššin taḡrəmt iyyat təgāt Emayos as tēlla teklay n əššin alwaqan gar-es əd Yerusalām.

14 Mišawalan daɣ batu n aratan win əganen den kul.

15 Mišawalan den da as tan-d-ewad Ƴaysa ənta iman-net, iddew dər-san.

16 Hannayan-tu mišan wər t-əzdayan.

17 Inn-asan: «Ma daɣ təmašawalam da?» Əbdadan, təwâr təkenzert udmawan-nasan.

18 Inn-as wa daɣ-san igan esəm Kləyubas: «Adis kay ɣas daɣ aytedan win əhanen Yerusalam a wər əhen salan n awa daɣ-as igan daɣ adan win?»

19 Inn-asan: «Ma daɣ-as igan?» Ənnan-as: «Arat wa igrawan Ƴaysa wa n Nazaret, imosan ənnəbi itaggan imazalan d awalan ən təla tarna dat Məššina d aytedan kul.

20 Sattarmasan-tu limaman win zawwarnen əd muzaran-nana, tətawaxkam-as təmattant, sattaytayan-tu fəl təgəttawt.

21 Nakkanay dat awen, nəgâ attama n as ənta a z'isəddərfeŋ tamattay n Israyil. Mišan azalada, əzəl n aratan en wa n karad d igi.

22 Dər iga awen da ya, əqqânnat tədoden-nana šiyyad iɣafawan-nana, ənzaynen s əzəkka,

23 mišan wər daɣ-as ənaynat taɣəssa-net. Əqqalnat-du, ənnanat nifalalan-asnat angalosan, ənnan-asnat iddâr.

24 Təzzar əkkan wiyyad daɣ-na əzəkka, osan-in, ənayan arat kul wa ənnanat tədoden en, mišan ənta wər t-ənayan.»

25 Amaran inn-asan Ƴaysa: «Xa kawanay za aljahilan! Izzəwwat fall-awan əzəgzan s arat kul wa ənnan ənnəbitan daɣ Əlkəttaban.

²⁶ Wərgex Elməsix ilzâm âs ad inəy alɣazab təzzar, amaran igrəw tanaya-net?»

²⁷ Təzzar a tan-isasagru Ƴaysa awa sər-əs ənnan Əlkəttaban kul. İbaz-du ɣur Əlkəttaban win ənnəbi Musa har win ənnəbitan kul win hadatnen.

²⁸ As din-əhozan taɣrəmt ta əkkan, issəkna Ƴaysa as okây.

²⁹ Mišan əwaxan-tu, ənnan-as: «Ƴam ɣur-na fəlas əzəl igla, ehad ibuk y igi», təzzar izzəbbat ɣur-san.

³⁰ As əggazan šin tattay, idkal Ƴaysa tagəlla, iggoday i Məššina, irz-et ikf-asan-tat.

³¹ Əmmoranat šittawen-nasan alwaq wen da, əzdayan-tu, mišan iggaz-asan ətənkul tamazayt ten da.

³² Təzzar namannan gar-essan: «Zaxnin awen da fəl əknan man-nana təfalawist alwaq wa danax-iššewal daɣ tarrayt, isasagr-ana Əlkəttaban n ənnəbitan.»

³³ Ebdadan tamazayt ten da, əqqalan Yerusalam. Osan-in inəmmuzal win maraw d iyyan əd nalkiman win hadatnen əddewan daɣ adag iyyanda,

³⁴ gannin: «Tidət daɣ a imos as Əməli Ƴaysa inkâr-du daɣ təmattant, amaran inifalal i Simɣon.»

³⁵ Əssoxalan-asan meddan win əššin əntanay da awa ənayan daɣ tarrayt, d əmmək was t-əzdayan alwaq wad irza tagəlla.

Ənəfilal ən Ƴaysa i nalkiman-net

³⁶ Harwada əşşewalan dağ awen as d-ibdad
 Ƴaysa iman-net gar-essan, inn-asan: «Alxer fall-
 awan.»

³⁷ Əgan tərəmməq zəwwərat, təggaz-tan tasa
 fəlas əxilan aggəsuf a hannayan den.

³⁸ Təzzar inn-asan Ƴaysa: «Ma fel
 təşşiwaşam? Ma fel deş təgâm aşşak?»

³⁹ Ənəyat ifassan-in əd daran-in, nak iman-in
 awa. Ədəsat-i ad tənəyam, fəlas aggəsuf wər ilə
 taşəssa wala işasan win as di-təhannayam da
 ələq-qan.»

⁴⁰ As dasan-inna awen, isakn-en ifassan-net əd
 daran-net,

⁴¹ mişan əqlan wər dağ-as əkkesan aşşak fəl
 awa əgan dağ təfalawist, ikna deş sər-san awen
 əsəmməkləl. Adi a fəl a dasan-inna: «Awak
 təlâm a itamatsan da?»

⁴² Əkfan-tu tablalt ən kifi təŋgât.

⁴³ İbaz-tat, itş-et dat-san.

Əşşəxəl wa dağ iga Ƴaysa inalkiman-net

⁴⁴ Dəffər awen inn-asan Ƴaysa: «Əntanay
 da aratan win dawan-ənnə harwa kawan-əheş:
 Aratan kul win fall-i əktabnen dağ Əttawret
 n ənnəbi Musa d Əlkəttaban win hadatnen d
 Azzabur əşşil ad andin.»

⁴⁵ Amaran ora işafawan-nasan alwaq wen da
 y ad agrin Əlkəttaban.

⁴⁶ Inn-asan: «Wərgəş iktâb as, Əlməsix ad inəy
 alşazab, iba-tu, inkər-du dağ təməttant əzəl wa
 n karad,

⁴⁷ təzzar təwəggin salan ən tətubt s esəm-net
 i təməttiwen kul fəl ad əgrəwnat təsureft ən
 bakkadan, antu awen dağ Yerusalam.

⁴⁸ Kawanay tēmôsam šigöyyawen n aratan win.

⁴⁹ Amaran nak a fall-awan du-zëzzäbbey Infas wa Zëddigan s Abba-nin a igan arkawal-net. Daḡ adi ad wër tægmedam aḡrëm wa da har d-azzabbat Infas wa Zëddigan, akf-iwan tarna ta du-tëfalat Mëššina.»

Tewaylay ən Ḡaysa ijënnawan

⁵⁰ Dëffër awen, iddew dër-san, əgmadan aḡrëm, har din-əhozan taḡrëmt ta n Betanøy, tëzzar idkal ifassan-net, ittar-asan a tan-ikfan albaraka.

⁵¹ Itattar-asan harwa da as dër-san immëzzay, immëdkal əs jënnawan.

⁵² Əntanay amaran, as das-əssəjadan, əqqalan Yerusaläm əknân tëfalawist.

⁵³ Faw əhân Ehan wa Zëwwëran n Əlḡibada, əmmâlan Mëššina.

**Ēlinjil ən Ȳaysa Ēlməsix Itawann-as dex
Arkawal wa Aynayan
Tamajaq, Tawallammat: Ēlinjil ən Ȳaysa Ēlməsix
Itawann-as dex Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

3aaeb7b2-4a3b-51fe-8c2d-ed8c05d4be0f